

**NATIONAL ASSEMBLY OF
SEYCHELLES**

Monday 12th December, 2022

The Assembly met at 09.01am

National Anthem

Moment of reflection

Mr Speaker in the chair

MR SPEAKER

Bonzour tou Manm Onorab. Bonzour nou bann zofisyé ki pe asiste nou dan nou travay ozordi. E manm piblik ki pe swiv nou fidelman, mersi pou zwenn nou.

I en plezir pou mwan revwar Lasanble ankor apre labsans en semenn e pou rezwenn zot dan zot travay.

Pou komanse *Leader Biznes Gouvernman* Onorab Bernard Georges, ti'n demann mwan pou diriz en pti lentervansyonn alor mon a pas laparol avek li.

HON BERNARD GEORGES

Mersi Mr Speaker. Bonzour Mr Speaker, bonzour tou bann manm Onorab, *staff* Lasanble ki la avek nou, e tou dimoun ki pe swiv nou dan lakour.

Mr Speaker efektivman la ki ou'n retourne dan pei, mon'n demann ou permision pou dir

detrwa mo bomaten. Akoz ou'n al koman *Speaker* Lasanble Nasyonal Sesel, me ou'n retourne koman *Speaker* Lasanble Nasyonal Sesel e Prezidan SADC PF.

E mon krwar e mon konvenki ki sa set en gran loner, en gran lazwa. En gran loner pou nou pei, pou nou Lasanble e pou nou tou bann manm isi.

Avek ou permision Mr Speaker, mon pa pou koz pli lontan. Me avek ou permision permet mwan pas laparol avek Lonorab Regina Esparon ki'n en manm SADC PF pandan en kantite lannen, e ki ava kapab dir pli byen dir sa detrwa parol ki mwan bomaten. Mersi.

MR SPEAKER

Mersi Onorab Georges. Mon a pas laparol avek Onorab Esparon.

HON REGINA ESPARON

Mersi Mr Speaker. Mersi *LGB*, bonzour tou dimoun a lekout. Mr Speaker mon annan gran loner bomaten pou pran laparol pou felisit ou dan ou nominasyon koman Prezidan SADC PF (*Southern African Development Community Parliamentary Forum*)

Ki en platform rezyonal ki group bann Parlmanter rezyon Sid Lafrik. En pozisyon ki mon konnen dabor, I anmenn gran lafyerte pou ou

personnelman e pou ou fammir e pli gran lafyerte pou nou Lasanble Nasional e osi pep Seselwa an antye.

Sa nominasyon I plas ou Mr Speaker a latet *SADC PF* ki en lorgann *SADC* en lorganizasyon ki konpri bann pei dan Sid Lafrik, ki annan pou bi avans korperasyon sosyoekonomik, politik ek sekirite e osi promot e ankouraz lentegrasyon rezyonal pou kapab annan lape, stabilite redwir koripsyon e ki pou ede anmenn plis larises parmi son bann Pei Manm.

SADC I travay dapre 4 gran laliny ki konpri komers ek lendistri ek finans e lenvestisman, lenfastroiktir e servis, sekirite alimanter, lagrikiltir e resours naturel ek devlopman imen ek sosyal.

SADC PF li I en lorganizasyon rezyonal ki an legzistans depi le 8 Desanm 1997 e ki konpri plizyer plis ki anviron 3 mil Parlanter sorti dan bann diferan Parlman rezyon sid.

Bi sa *forum* I pou donn en platform pou siport en amelyor lentegrasyon rezyonal atraver partisipasyon Parlman, pou promot bann bon pratik dan rol Parlman. E entegre ek korporasyon, lentegrasyon e korperasyon rezyonal.

Tenm sa 52enm plenyer ki'n fek fini semenn pase, kot

ou menm ou Speaker ou'n ganny nominen Prezidan *SADC PF* ti deroul anba temm, "Nou Bann Parlanter Dan Ranforsman Lape Ek Sekirite Dan Rezyon *SADC*."

Bann lobzektif *SADC PF* li I pou promot drwa imen egalite *gendre*, bon Gouvernans, la demokrasi, latransparans e etablir lape, sekirite ek stabilité. E fer ki korporasyon ekonomik devlopman ek lentegrasyon lo baz ekitab, ek benefis mityel I mars pli vit.

I osi en platform pou fasilit rezo kominikasyon avek lezot Lorganizasyon Parlanter, promot partisipasyon Lorganizasyon Non-gouvermantal, Biznes ek Komite Entelektyel dan son bann aktivite.

Donk, mon bann koleg Onorab ek tou sitwayen zot a dakor ek mwani, ki sa responsabilite ki Speaker Mancienne in aksepte, I enn ki pou demann bokou. E mon napa dout ki avek sa lekspertiz, I byen plase pou fer li.

Azanda I san dout enn ki byen sarze depi komansman menm. E pli gran *challenge* se pou travay pou transform *SADC PF* dan *SADC Parliament* pou li vin en organ pli for.

Mr Speaker, koman en Manm Egzekitiv *SADC* e Dirizan bann Madanm dan

rezyon SADC a kote lezot Manm ki konpri Onorab Bistoquet, Onorab Samynadin, Onorab Labrosse, Onorab Uranie, Onorab Vidot ki form par delegasyon SADC PF Sesel, nou fyer pou annan ou a latet sa lorganizasyon.

An menm tan ki nou dir ou felisitasyon de lapar tou manm SADC PF e tou lezot manm Onorab e osi nou Lasanble Nasyonal, mon osi mon oule asir ou tou nou sipor dan sa travay ki devan ou pandan sa 2 prosen lannen. Mersi bokou e ankor felisitasyon Mr Speaker.

(APPLAUSE)

MR SPEAKER

Mersi. Wi Onorab Pillay ou ti a kontan azout en mo, dan sa entervansyon silvouple.

HON SEBASTIEN PILLAY

Mersi Mr Speaker. Bonzour Mr Speaker e bonzour tou koleg Onorab, e bonzour tou dimoun ki a lekout.

Mon'n ekout mesaz - mon'n ekout sa pti prezantasyon ki Onorab Espanon in lir devan nou Lasanble, *regarding* ou nominasyon koman Speaker pou SADC PF e loner ki sa I donn nou Lasanble Nasyonal.

Depi en bon pe lannen di-si la - I a fer petet en 15an - ki nou pe enterakte avek SADC

PF e tou bann Manm ki'n kontribye ofil letan pou fer ki partisipasyon Lasanble Nasyonal, I enn ki toulstan enn ki ganny respekte o sen sa lorganizasyon.

In annan plizer Manm ki'n partisipe lo nivo SADC PF. I annan Manm ki'n *sadly* in kit nou. La mon mazin Onorab Geovana Charles ki ti deza a en moman donne partisip avek SADC PF. E osi I annan plizer lezot manm ankor ki'n kontribye pou ede ki Lasanble Nasyonal Sesel, I kontinyen ganny rekonnet lo nivo bann lorganizasyon enternasyonal.

Resaman dan nou *caucus* lo nou kote latab ti annan Onorab Egbert Aglae ki ti en dimoun ki ti konekte avek SADC PF e ozordi nou annan novo Manm dan la personn Onorab Rocky Uranie e nou menm rapel Onorab Audrey Vidot ki ki'n osi partisip lo nivo SADC PF.

Mon krwar sa ki enportan I osi annan nou bann manm ki partisip lo nivo *Pan African Parliament* e nou tou nou'n vvar ki mannyer sa langazman ki nou bann Manm Lasanble I pran lo tou le de kote latab, pou kapab kontinyen os bannyer Sesel e os bannyer sirtou Lasanble Nasyonal.

Alors mon krwar mon devret osi felisit ou pou ou nominasyon koman Speaker

SADC PF. E mon swete ki sa I ava donn loportinite osi pou Lasanble Nasyonal Sesel koman en kolektiv pou kontinyen ganny sa louvertir, pou kapab fer son travay lo en nivo enternasyonal.

E sa ki nou apel sa diplomasi Parlmanter ki en keksoz ki'n komans ganny plis lelan, I ava kontinyen devlope. E nou swete ki atraver ou nominasyon, ou a kapab osi met en pe plis presyon lo Gouvernman Sesel, pou kapab met en pe plis resours a dispozisyon Lasanble Nasyonal, pou li kapab kontinyen fer sa langazman dan bann lezot groupman enternasyonal. Mersi Mr Speaker.

(APPLAUSE)

MR SPEAKER

Mersi Lider Lopozisyon, *Leader* Biznes Gouvernman e Onorab Esparon pou zot parol, bann parol felisitasyon ki mon apresye bokou.

E mon osi remersye bann manm ki'n eksprim direkteman personnelman bann mo felisitasyon e lankourazman, dan sa 2 dernyen zour e osi bann manm piblik ki'n zwenn mwan dan sa parkour.

Byensir sa bann parol felisitasyon I osi bann parol sipor e lankourazman, parey

Onorab Esparon in temwaye. E se sa ki konte. Mon oule dir mon ti pou war li difisil aksepte sa pozisyon e son responsabilite, san sipor premyerman Parlman Sesel. Sa loner - e I en loner byensir - I pa en loner pou mwan personnelman, me I sirtou en loner pou Lasanble Nasyonal Sesel.

Akoz se atraver Lasanble Nasyonal ki Speaker Lasanble Nasyonal in ganny apwente pou pran as pozisyon. Donk- e osi I annan lezot dimoun pou mwan remersye;- mon remersye mon *staff* dan mon biro e mon osi remersye *staff* SADC enkli son Sekreter Zeneral ki'n ankouraz mwan pou pran sa responsabilite.

SADC mon oule dir I apresye bokou partisipasyon Sesel e kontribisyon ki in fer pou plizyer lannen prezan dan bann Parlman avan - dan bann Lasanble Nasyonal avan nou. In annan bokou travay ki'n ganny fer lo lapar bann Manm Lasanble Nasyonal Sesel.

Menm an se moman nou annan en prezans enportan laba;- Onorab Esparon in mansyonn bann Manm Komite e in mansyonnen Onorab Esparon li menm. I *Chairperson* en Komite enportan ki regroup *Caucus* bann Madanm e Onorab

Bistoquet osi I en *Chairperson* en Komite enportan.

E mwan osi fer remarke ki Onorab Mondon in deza servi koman trezorye sa lorganizasyon e lo Manm son Komite Egzekitiv. Me I osi le moman parey Onorab Pillay in mansyonnen, pou rekonnnet bann Manm avan nou ki'n servi dan sa lorganizasyon.

Lo nou kote, mon krwar nou apresye *SADC PF* akoz I en lorganizasyon ki aktiv. E I toultan pran son louvraz o serye. I angaze lo plizyer size ki konsern larezyon. Tou bann size kle ki enportan pou devlopman bann pei larezyon, I ganny bokou latansyon dan *SADC*.

E an se moman dan dernyen konferans ki nou'n ale, nou'n annan bann prezantasyon lo bann size ekonomik, lo bann size sosyal parey *gender equality*, vvolans domestik, ledikasyon e plizyer lezot ankor. E I annan osi bann size ki konsern lanvironnman ki ganny bokou latansyon dan *SADC*.

Lefe ki I en lavwa enportan pou nou rezyon, ki anmenn bann Parlamanter ansanm e ki permet zot adres sa bann size, mon krwar I donn li en lenportans spesyal e se sa ki nou apresye war ki travay ki nou, nou konsernen avek, I osi ganny apiye lo nivo rezyonal.

Byensir I en gran loner! Deryer loner I annan travay e responsabilite. E se pou sa ki nou kont lo zot tou e non-selman lo kote Manm, me lo kote *staff* nou Sekretarya pou kapab ed mwan desarz sa responsabilite. Mersi bokou zot tou.

Mon a pran zis en pti moman pou fer en temwayaz lo en lot size, mon le lo lapar Lasanble zis rann en pti omaz en ekritten, istoryen *Bill McAteer* ki'n desede e ki son fineray pe ganny observe ozordi. Mon santi ki Mr *McAteer* in en personnalite enportan dan Sesel, ki'n rikord dan plizyer liv e lartik ki'n rikord listwar nou pei.

E petet I istoryen ki pli rekonnnet dan nou pei. Son travay dan Sesel koman en fis adoptif mon kapab dir - in met li dan nou leker e nou anvi remark non-selman son lakonplisman me osi *legacy* ki I kit deryer dan nou konesans nou prop listwar.

Mon eksprim mon kondoleans pou lafanmir e zanmi Mr Makatea pou son dese. Mersi.

Bon nou a prezan kapab pas lo travay ki'n programmen lo nou *Order Paper*. Onorab Georges ou annan en pwen pou fer?

HON BERNARD GEORGES

Wi Mr Speaker, mon krwar dan tou nou remersiman e bann kondoleans ki nou'n pase bomaten, nou'n bliy en bon levensman, mon aprann ki se ou laniverser ozordi. E si sa I vre permet mwan lo non Lasanble Nasyonal pou swet ou en bon laniverser, e *many more to come*. Mersi.

(APPLAUSE)

MR SPEAKER

Mersi mon ti pe espere ki sa I a pas inapersi, me mersi Onorab Georges e mersi Lasanble.

Nou a pas lo Staz Komite e madanm rapporter I ava apel Minis avek son delegasyon pou nou kapab kontinyen travay lo *Bills*.

Bon nou travay ozordi I lo *Accommodation Turnover tax Bill*, e mon'n konform en pti gin mon ti ankor krwar nou ankor dan *Appropriation Bill* lo Komite. Me nou'n fer tranzisyon pou ariv lo bann Lalwa. Alor nou pa dan staz Komite la, nou dan staz Lasanble pou nou komans travay lo *Second Reading* sa *Bill*.

E mon ava apel Onorab *Leader Biznes Gouvernman* pou anmenn Mosyon pou *Second Reading*.

HON BERNARD GEORGES

Mersi Mr Speaker. Bonzour Minis, SS e *Commissioner General* e ou delegasyon.

MR SPEAKER

Eskiz mwan. Onorab mon kapab aret ou en pti kou. Mon'n mank en pti *step e sa se* pou entrodwir Minis ek son delegasyon. Mon annan plezir swet labyenveni Minis Naadir Hassan Minis pou Finans, Plan Nasyonal e Komers e dan son delegasyon Mr Patrick Payet Sekreter Deta, Mrs Veronique Herminie *Commissioner General* pou Tax.

Ms Rebekah Labiche *Senior Policy Analyst* dan sa departman e Mrs Gulmette Leste *Assistant Legal Draftsperson*. E osi avek nou pe akonpanny zot I annan madanm Gayathri Andre *Director Tax Payer Services*. Eskiz mwan pou sa pti mankman.

Mon aprezan kapab pas laparol avek Onorab Georges pou Mosyon pou *Second Reading*.

HON BERNARD GEORGES

Mersi Mr Speaker. Mr Speaker anba *Order 69(2)* nou *Standing Orders*, mon move ki *The Accommodation Turnover Tax Bill, 2022* I ganny lir en Dezyenm Fwa. Mersi.

MR SPEAKER

Silvouple mon a ganny segonnman pou sa Mosyon? Onorab Arissol?

HON SANDY ARISSOL

Mersi Mr Speaker. Bonzour Minis avek ou lekip. Bonzour tou Manm Lasanble, bann Manm Lasanble, tou dimoun ki alekout. Mon ti a kontan segonn Mosyon propoze par Onorab Georges. Mersi.

MR SPEAKER

Mersi Onorab. Prezan nou kapab prosede avek lentrodiksyon *Bill* par Minis Hassan.

MINISTER NAADIR HASSAN

Mersi Mr Speaker. Mr Speaker, Onorab *Leader Lopozisyon*, Onorab *Leader Zafer Gouvernman*, tou bann Manm Onorab e tou dimoun a lekout, bonzour.

Parey mon ti anonse dan Bidze 2023, Gouvernman pe al entrodwir en *tax* lo reveni bann mwayen e gran lotel. E zisteman ozordi, mon pou prezant avek Lasanble sa Prozedlwa *Accommodation Turnover Tax 2022*.

Sa nouveau *tax* pe ganny enplimante apartir le 1 Zanyye 2023 a en to 2poursan. Lendistri Tourizm I premye pilye ekonomik nou pei e nou ekspekte sa sekter pe

kontribye plis anver koleksyon *tax* lo biznes.

Me sa I reste ankor en tre gran defi. En analiz ki'n ganny fer lo rezim *tax* lo biznes, in montre ki sa sekter I kontribye selman 8poursan anver *tax* lo biznes. Mr Speaker, eski sa I zis? Pou note sa analiz ti ganny fer avek lasistans Lorganizasyon pou Korperasyon Ekonomik ek Devlopman (*OECD*).

Mr Speaker, mon'n deza mansyonnen ek Lasanble oparavan, ki nou okouran an rezulta *transfer pricing*, pei pe perdi bokou reveni. Vandredi passe Lasanble Nasyonal ti aprouv Prozedlwa lo Lamannman *Tax Biznes*, pou met nouveau provizyon ki pou ranforsi nou bann Lalwa e Minimiz sa pert dan reveni.

Me selman, menm avek sa, nou konstate ki bokou reveni pa pe ganny kolekte. Avek lentrodiksyon sa Prozedlwa *Accommodation Turnover Tax*, nou ekspekte kolekte R118milyon an 2023.

Mr Speaker, sa nouveau *tax* pou aplikab selman lo serten letablisman touristik dapre Premye *Schedule* sa Prozedlwa. Sa I pou bann lotel, *guesthouse*, *self-catering*, *yacht* e bato krwazyer.

I bon note ki *tax* pou aplikab lo sa bann kategori letablisman, selman si zot

rikord en reveni R25milyon ou plis, dan sa lannen oparavan.

Baze lo bann *tax returns* ki'n ganny soumet pou lannen 2021, nou ekspekte ki sa *tax* pou aplikab lo aepre 11 lotel selman. Dan sa 11 lotel ki tonm anba sa kategori, zot ti fer environ 4.75bilyon an reveni an 2021. Me zot in pey selman R60.1milyon anba biznes *tax*, ki reprezent selman 1.3 poursan lo zot reveni total.

Parmi sa 11 gran lotel, selman 4 lotel ki'n pey biznes *tax* an 2021. Par kont Mr Speaker, an 2021 bann pti letablisman touristik in fer environ R34.9milyon reveni e pey R3.03milyon, ki reprezent 8.7poursan lo zot reveni total.

Menm si sa *tax* pou depan lo reveni total pou sa lannen oparavan, pou determinen si sa letablisman I kalifye pou sa *tax*, bann biznes I annan ziska 21 dan sa mwan ki swiv pou zot pey sa *tax*.

Mr Speaker, mon pe prezant avek Lasanble Nasyonal sa Prozedlwa *Accommodation Turnover Tax Bill, 2022* pou zot konsiderasyon e aprouvasyon. Mersi Mr Speaker.

MR SPEAKER

Nou ava prezant ouver deba par bann Manm lo sa *Bill* e mon annan pou le moman 2 Manm ki'n lev lanmen. Onorab

Gill e apre Onorab Hoareau. Onorab Gill?

HON CHURCHILL GILL

Mersi Mr Speaker. Bonzour Minis ek ou delegasyon. Bonzour tou Manm e tou dimoun ki pe ekout nou. Mr Speaker lobzektif e rezon prensipal sa *Bill*, se pou fer provizyon ki I en lobligasyon pou pey 2poursan akomodasyon *tax turnover*, lo bann biznes ki pe fer reveni R25milyon e par lao.

E sa I aplikab pou sa bann biznes swivan;

Tou biznes akomodasyon touristik, tel parey lotel, *guesthouse, self-catering, yacht e cruise ship*.

Sa *threshold* I ganny definir koman reveni anyel pou en dimoun oubyen biznes pou lannen *tax*, avan ki lannen sa biznes pou bezwen pey son *tax*.

Sa *Bill* I osi al pli lwen pou klarifye ki ler 2 oubyen plis biznes pe ganny fer par en sel dimoun, sa bann biznes, pou ganny konsidere koman en sel biznes pou en sel dimoun.

Dan sa *Bill* I osi annan lezot provizyon miner, ki an relasyon avek sa bann provizyon mazer.

Mr Speaker, sa *Bill* I en *Bill* tre enportan e I pou dan benefis pei. Si son lenplimantasyon entern I

ganny fer strikteman byen, tel parey en tim ki pou strikteman *monitor* e fer bann lodit sirpriz tanzantan dan sa bann kategori biznes ki tonm dan sa *threshold*.

Pou asire ki tou reveni sa bann biznes pou ganny byen *capture* e an retour garanti ki sa ki SRC, pou konnekte I egzakteman sa ki devret konnekte. E osi pou asire ki bann peyman I pe ganny fer a ler, pli enportan ankor evite ki aryeraz I akimile.

Mr Speaker, en keksoz ki pa dan sa Prozedlwa se penalti, pou bann biznes ki pa respekte sa Lalwa, eski *panel* I kapab donn en leksplikasyon lo la dan *Right of Reply*.

I tre enportan pou sa bann kategori biznes dan sa *threshold* konpran sa byen. Mon ti a kontan demann panel osi, akoz ki sa *Bill* in vin la. Me pa pli avan? Ki konstrent ki sa bann zofisyen ki ti pe travay lo la ti pe eksperyanse?

Mr Speaker, mon'n toulstan lev konsern a plizyer repriz ki mon ti ganny loportinite pou fer li pou benefis pei. Konsernan serten laranzman avek bann gro biznes, ki annefe endirekteman pe ed sa bann biznes pou pa pey *tax*.

Akoz I kler ki sa bann biznes I fer profi, me sa bann laranzman I donn zot sa bon

loportinite ek zouti, pou zot kapab deklar pert.

Mr Speaker, donnek konsern serye sa size, le 15 Zilyet 2021 mon ti anmenn en kestyon irzan pou Minis Finans, lo sa 3 laranzman ki pe seryezman afekte koleksyon reveni *tax*.

E pou bann sonm ki tre sibstansyel ki pa devret kontinyen. Tou bann Manm enkli ou lofis Mr Speaker, I kapab get lo nou *master list* kestyon sorti kot Manm, zot a kapab trouv sa kestyon ki mon pe koz lo la.

Domaz Mr Speaker en kestyon sitan enportan pa'n zanmen met lo *Order Paper*, pou Minis kapab vin reponn. Petet sa ti a ede pou ki sa *Bill* ti'n kapab vin bokou pli avan dan nou Lasanble. E pei ti pou'n kapab anmas bokou plis larzan.

E zenn Baie Ste Anne ti an kapab ganny zot *sport complex* dan Bidze atraver *tax* ti pou'n kapab ganny anmase. Sa ki mon ti pe demande atraver mon kestyon ki mon ti soumet avek Lasanble, sete enn;- sa dirasyon 5an *carry forward loss*, me ki kontinyen *overlap* apre sak 5an.

Sa 200pourasan *marketable expenditure* ki'n totalman an faver sa bann biznes ki benefisye avek en tel laranzman, e an retour zot pa pey *tax*.

Sa 145poursan *accelerated depreciation* ki sa bann biznes I kontinyen benefisyé avek - e sa I fer ki SRC I tre dezavantaze pou zot kapab anmas *tax* pou pei. E la Mr Speaker nou pe koz lo bann gro, gro sonm.

Mr Speaker mon osi note I normal ki en pei I donn serten privilegez pou atrakte serten biznes dan nou pei. Me sa I annan en fason fer. I pou enportan ki *panel* I dir nou si ler sa *Bill* in pase, tou sa bann privilegez ki mon'n koz lo la 5an *carry forward loss*, 200 poursan *marketable expenditure*, 145poursan *accelerated depreciation*, I pou otomatikman ganny *revoke ouswa* I pou annan lezot lalwa ki pou vini apre pou *revoke* sa trwa benefis.

Mon ti a kontan ki *panel* I donn nou Lasanble en bon leksplikasyon ki ava osi benefisyé piblik an zeneral.

Mr Speaker, pli gran konsern parmi sa bann biznes, se biznes *yacht e cruise ship*.

Ozordi dan Sesel nou napa en striktir tre efikas pou nou kapab *capture* tou biznes, ki sa bann *yacht ek cruise ship* pe fer. Eski *panel* I kapab eksplik nou Lasanble, ki Gouvernman I anvizaze fer dan sa direksyon, pou tou sa bann kalite biznes ganny *capture to the maximum?*

Espesyalman kot *Eden Island* kot I annan en volim enorm dan sa kalite biznes enkli lezot landrwa. Mersi Mr Speaker.

(APPLAUSE)

MR SPEAKER

Mersi Onorab. Mon a pas laparol Onorab John Hoareau.

HON JOHN HOAREAU

Mersi Mr Speaker. Bonzour tou dimoun a lekout, bonzour tou Manm dan Lasanble e Minis ek ou delegasyon.

Mr Speaker I fer mwan en gran plezir ankor pou koz lo sa *Bill*, sa Prozedlwa ki devan nou, sirtou akoz koman en Lasanble irespektiv ki kote latab nou sorti, nou'n toultan demann Gouvernman pou fer mannyer pou ranmas tou bann *tax* kot I sipoze ranmase, pou benefisyé nou pei.

Pou fer sir ki sirtou lendistri tourizm ki pilye lekonomi, I met sa ki I devret mete dan pos Gouvernman. E sa parey nou dir I fer marse tou lezot servis ki nou bezwen dan pei, e ki pei I donn nou dan en fason gratwit si nou le dir. I gratwit dan lesans ki nou, nou pa pe peye me selman I peye atraver nou *tax*.

Mr Speaker ler nou pe get sa *tax* ki'n vin ki pe ganny aplike la, I en *tax* ki baze lo *turnover* vedir lo lakantite

reveni, ki en letablisman I fer. E sa I en *tax 2* poursan oubyen si oule I baze lo en reveni R25milyon an montan, egal oubyen an montan.

E sa *tax* I pou aplik plito pou bann gran letablisman touristik;- pou bann *cruise ship, yachts, bann guesthouse* e osi bann lotel. Mr Speaker mon krwar poudir ler nou pe get Sekter Tourizm, lafason ki sa *tax* In ganny mete baze lo *turnover* I annan en rezon vreman fondamantal, akoz I pa baze lo profi me I baze lo *turnover*.

Premyer ler nou get bann *incentive* oubyen bann - si oule - bann fason ki Gouvernman in zer sa biznes tourizm, pou ankouraz *foreign direct investment*, in fer ki bann lotel in toultan ganny bann gran, gran konsesyon.

Parey Onorab Gill in fer resorti, I annan sa *accelerated depreciation* ki 145 pourasan lo son bann *assets*, ou son bann *physical assets*. Vedir son bann *furnitures*, son lenfrastriktir, lotel tousala I annan en *depreciation rate of 145 percent annually*.

So, I fer ki si ou pe al takse li lo profi, I pou vreman annan ler ou'n kalkil sa bann *depreciation*, I annan osi 200 percent lo *marketing expenses*, I pou fer ki ler ou pou kalkil li lo profi, I pou napa vreman en gran profi ki ganny deklare.

Parski tousala in ganny retire, in ganny *knock out* lo son liv, lo son *tax return*.

Alor se pou se la rezon ki sa *tax* I aplik lo *turnover*. Ler I aplik lo *turnover*, I vedir nenport kantite larzan reveni ki ganny anmase, alor sa *tax* I takse li son 2 pourasan lo la.

Mr Speaker, kestyon fondamantal ankor ki nou bezwen demande e kestyon ki petet I enportan pou SS klarifye pli tar, se konbyen letan ki ler nou donn en letablisman touristik, oubyen en biznes ki vin dan Sesel I vin *operate*, bann *incentives*?

Konbyen letan sa bann *incentives* I bezwen aplike? Eski bann *incentives* I pou al par lao 5an, par lao 10an? Konbyen letan ki nou merit pe get sa size *incentives*? Akoz plis ki nou donn plis bokou letan, plis ki sa benefis I pase lo sa envestiser e nou pei li an rezulta I pa pe ranmas naryen.

Mr Speaker, sa *Accommodation Tax* pa en lenvansyon zis Sesel sa. I en keksoz ki enternasyonalman I byen ganny rekonnet, parske ler nou get *Belgium, Bhutan, Bulgaria, Caribbean Islands, Croatia*, laplipar bann pei zot osi zot annan en *tax* en pe parey.

E sa ki enportan osi dan sa *Bill* ki devan nou se ki menm si en gro lotel oubyen en gro lakonpannyen touris, I

le fer lentegrasyon vertikal, oubyen orizontalman, sa I pa pou anpes SRC ranmas sa *tax*. Parske si tou sa bann – si dizon I pe fer lentegrasyon orizontal, I annan plizyer lotel ki anba en sel konpannyen I pou ganny gete koman en sel konpannyen.

E son *turnover* pou vin sa akimilasyon par lao R25 milyon reveni. Osi menm si i le fer lentegrasyon vertikal, kot I annan plizyer pti lakonpannyen anba sa lotel ki pe *provide* bann lezot servis, ki asosye avek sa lotel; -

Dizon par egzanp pe fer *watersports* - I annan en lot ki pe fer se pa *diving*, ekskirsyon, so, tousala pou ganny gete anba en sel parasol anba sa parasol R25 milyon ou plis.

Alor dan lesans ki pe ganny aplike, mon krwar in byen ganny kalkile e I pe al dan bon direksyon.

Mr Speaker ler nou pe get sa bann *tax* dan plizyer pei, I ganny osi servi pou amelyor lenfrastriktir tourizm e pou fer sa lendistri li menm pli soutenab.

Sirtou apre letan *Covid* nou pe *bounce back*, prezantou pe annan plis larzan ki pe randre, apre sa *post Covid*, Alor I enportan ki nou ranmas sa bann *tax*.

Mr Speaker an zeneral, mon pa pou koz tro bokou lo la. Mon krwar Onorab Gill in

fer en tre bon prestasyon lo son prezantasyon, alor mon pou demann tou Manm pou vot an faver sa *Bill*.

Akoz I en *Bill* ki annan en gran merit I en *Bill* ki pe ranmas *tax* kot nou pa pe ranmase, sirtou akoz sa bann *accelerated depreciation* avek sa bann *marketing expenses*; ki an total ler ou pe get son valer I apepre 2bilyon par lannen, I ganny retire lo – si oule - lo bann *taxable income* ki Gouvernman pe ranmase.

Alor la I pe remet li dan sa *taxable income brackets*, so ki Gouvernman i a kapab ranmas sa *tax* lo sa bann larzan. Mersi.

MR SPEAKER

Mersi Onorab. Mon a prezantou pas laparol, Onorab Pillay *Leader Lopozisyon*.

HON SEBASTIEN PILLAY

Mersi Mr Speaker e bonzour ankor enn fwa. Bonzour Minis avek ou delegasyon e bonzour tou dimoun ankor enn fwa ki a lekout.

Mr Speaker mon'n ganny loportinite pou pas dan sa Prozedlwa ki'n vin devan nou, e osi konpar bann *statement* ki'n ganny fer dan Bidze par Minis pou Finans. Akoz sa lalwa I ankre serten pozisyon policy ki Gouvernman I le pran *going forward*, an se ki

konsern kolekte reveni dan sekter tourizm.

E mon bezwen dir apre ki mon'n regard sa Lalwa, mon annan serten konsern ase signifikan - ase enportan, akoz mon santi poudir I annan en pti pe konfizyon ki petet I bezwen ganny klarifye, pou ki nou konpran kwa egzakteman lentansyon Gouvernman.

Premyerman mon bezwen dir, ki mon dakor avek prensip sa *tax* li menm, an sa ki konsern bann gran letablisman. Mon dakor avek son prensip. Mon dakor avek son prensip, akoz I menm *tax* ki egziste dan bann pti ziridiksyon sirtou dan Kararib, par egzanp *Belize*, par egzanp *Turks and Caicos* kot zot annan esansyelman en tax preski parey.

Me selman mon bezwen demann Gouvernman pou klarifye. Nou fek pas en Lalwa ki sipoze in ganny travay lo la avek bann konsiltan etranze, an se ki konsern *transfer pricing*. Petet kestyion ki vini pou mwan la an premye lwe se, eski zot pa *trust* sa Lalwa *Transfer Pricing* pou anmenn en rezulta - e alors Gouvernman I bezwen vin avek en lot *tax* pou sey *capture* sa ki zot Lalwa *Transfer Pricing* pa pou kapab fer?

Akoz Lasanble dan linanimite in siport sa Lalwa lo *Transfer Pricing*, e mon ti a

kontan ki ler nou pe pas en Lalwa dan Lasanble Gouvernman I konnen ki I pe al fer avek.

Me ler mon pe regard sa Lalwa e mon'n ekout bann entervenan ki'n koz avan mwan, I kler poudir Gouvernman pa pe neseserman war rezulta dan sa Lalwa *Transfer Pricing* deswit. Me an ki konsern sa Lalwa ki la, rezulta pou vin en pti pe pli direk, en pe pli vit. Sa I premye kestyion ki mon ti a kontan Minis reponn.

Prezan dezyenm pwen ler mon vin lo sa Lalwa li menm e mon regard son merit, petet enn bann keksoz ki *strike* mwan as pli enportan la se mon pa vwar en definisyon pou akomodasyon.

Kwa ki sa Lalwa vreman I le dir pou an se ki konsern akomodasyon? Eski I pe dir akomodasyon. Akomodasyon I vedir *lodgings, sleeping accommodation* oubyen tou bann servis *facilities, ancillary* ki vin avek ler en touris I antre dan en lotel?

So, pou mwan mon ti a kontan konpran kwa ki vedir. E ler I pou definir akomodasyon - e ler ou pe koz lo sa *threshold* reveni, eski akomodasyon I enkli par egzanp bann bato ki la dan *Eden Island* ki pe pran touris, pe ale, vini partou?

Eski I enkli par egzanp bann *villas* ki pe ganny servi pou touris vin ladan? eski nou pe kapab *capture*? So, I bezwen annan en *top process* ki'n ale pou nou *define* akomodasyon.

Dezyenmman mon pa war kot nou pe koz lo bann *accommodation charges*, ki en lotel I deza pe sarz en kliyan dan son pri. Rezon pou sa se akoz ler nou enpoz sa *tax*, sa letablisman pou pas sa *tax* lo son konsonmater definitivman, akoz *that's the way* ki biznes I marse.

Ou takse mwan, mwan mon fer monte en pti pe mon *rate* pou mwan aziste ek sa. So, sa bann *charges*, eski nou'n konsider kwa ki nou pe dir par bann *accommodation charges* ki pou vini, ki ganny peye par sa *guest* li menm, pou akomodasyon ki in gannyen, ki'n ganny *provide* dan en lotel oubyen dan en letablisman *tourism*? Sa I enportan akoz pou nou kapab definir sa.

Prezan en lot pwen fondamantal ler nou pe koz lo akomodasyon, sa I vedir poudir e touris, e lokal ki al reste dan serten sa bann letablisman - I *mean* Seselwa ki al reste dan serten sa bann letablisman, pou bezwen war zot pe *fit the bill* pou sa *turnover tax*.

So nou bezwen konsider sa, as en *means* pou nou

konpran ki nou pe koz lo la dans on zeneralite sa Lalwa e pou nou konpran kote nou le ale avek. Petet en keksoz ki mon war ler mon pe get sa Lalwa, e sa Lalwa pe ganny *manage* par SRC, mon ti ava'n ekspekte ki nou etablir once and for all en *Registrar*, pou tou sa bann letablisman ki pe provide akomodasyon pou *tourism*.

E sa *Registrar* li son rol I ava pou fer sir pou dir si okenn antite, I le vin provide en servis akomodasyon, I a bezwen anrezistre. Ozordi I en pti pe - ler nou regard Lalwa ozordi mon bezwen admet ki ou ale, ou rod ou *license*, ou fer li I anba *Licensing*.

Me petet si nou ti annan oule pran sa sekter e regard ki mannyer, nou etablir en rezim *tax* otour sa sekter, then ti ava meyer ki nou annan en sistèm *Registrar* pou li, zis parey nou annan pou lezot sekter.

E preznan ler ou ganny sa lanrezistrem, se sa *Registrar* ki deside ki mannyer si ou pou al fer lezot aktivite - parey Onorab Hoareau in mansyonnen - ki mannyer sa bann lezot aktivite I fit in dan ou *portfolio* e ki mannyer sa I anmenn larzan ki I donn ou sa *turnover* ki ou sipoze gannyen. Ki mannyer preznan tax pou pran son bout dan sa *turnover*.

Mr Speaker, en lot keksoz ki mon pe regard dan sa Lalwa. E sa I keksoz ki pli enteresan se sa *threshold*, mon ti a kontan konnen si I annan en *guesthouse* Sesel ki fer en *turnover* R25milyon?

Mon pa krwar I annan en *guesthouse* ki fer en *turnover* R25milyon. E mon pa krwar osi ki I annan en *self-catering*, ki fer R25milyon par lannen.

So akoz ki dan nou definisyon – “*nature of business all tourism accommodation operators namely; hotels, guesthouse, self-catering establishments, yacht, cruise ship*” ki fer en *turnover* R25milyon?

Mon ti ava ekspekte ki I annan dan nou definisyon, en konponan ki pran ki retir sa bann sa bann pti letablisman ansanm, avek sa bann gro letablisman.

Akoz esansyelman si Gouvernman ti pe dir mwan son *tax* pe target bann gran letablisman, bann *super chains* - la mon pou nonm non bann *Hilton*, bann *Four Seasons* – yes, definitivman! Me ler nou sey anmenn tou nou bann pti lokal ansanm, nou bann pti letablisman lo La Digue, lo Baie Ste Anne lo lot se sa ki mon anvi konnen.

Eski sa I lentansyon Gouvernman *going forward*? EsKi lentansyon Gouvernman se pou dir *ok*, la *threshold*

ozordi I R25milyon, nou komans fer desann *threshold*, nou komans fer desann *threshold*?

Akoz ki mannyer I ete I just a figure that need to change ozordi. I zis sa R25 milyon ki bezwen sanze, sa larestan I fini met an plas. So, mon santi poudir lo sa pwennvi, mon annan en diferans avek Gouvernman pou mwan kapab aksepte sa.

Mon antyerman dakor 100 poursan dakor, avek *turnover* lo sa bann gran letablisman. No problem. Me ler nou pe met tou sa bann letablisman ansanm, mon pa krwar I fer zistis pou sityasyon ki nou bann pti letablisman lokal I pas ladan.

En lot size enportan Mr Speaker, se ki konsern par egzanp prezan ki lenpak sa pou annan lo *service charge*? Ler ou provide en akomodasyon I annan bann charges ki vin avek sa akomodasyon. Akoz I annan en dimoun ki vin netway sa lasanm, ki fer *turn down* lili, ki netway sa lasanm. I annan dimoun ki anmenn keksoz kot sa lasanm.

So, I annan en *service charge associated* avek sa. E sa *service charge* li I dekouraz byensir that one other things ki ganny dir letan ou kit *Airport* ou pe antre dan lotel ki staff I sipoze ganny en *service*

charge, e tipping I pa en keksoz ki sa. Me mon krwar ler ou tip en dimoun I en keksoz ki ed li dan sa servis ki I pe provide.

Be mon pa'n vvar ki si Gouvernman I annan lentansyon - mon ti ava'n ekspekte dan sa Lalwa. Akoz ler mon regard lalwa lezot bann pei ki annan sa menm kalite sistenm *tax*, zot in ale, zot in definir *service charge*, pou fer sir ki I ganny met dan en pti pe proteksyon si oule. Pou ki I pa ganny touse ler en pli gro mezir I ganny enpoze lo sa letablisman.

Akoz par egzanp si mon get par egzanp pou *Belize*, ki en pti zil parey nou, ki *rely* lo *tourism*, in menm al pli lwen pou li *define* ki savedir *service charge*. E ki mannyer anplwayer I devret annan en diskisyon avek anplwaye, an se ki konsern *service charge*.

E kote I *fit in* ladan, se akoz sa *tax* ki nou pe mete, mon pa krwar poudir sa bann *owners* - sa bann propriyeter pou al pey li *out of* zot bonn volante, non! Zot pou tir li *from somewhere*.

E ler nou pe dir 2 poursan pa signifikan pou en biznes or ou pe dir 2 poursan eksetera - konmsi ler ou get sa poursantaz. Me rezon sa bann boug I annan bann gran, gran lasanm lotel ozordi se akoz zisteman 1poursan I *matter* pou zot.

E *as far* ki zot pa pey pou zot pa pey sa 1poursan, zot pas li lo en lot dimoun, zot pou seye. Sa ki mon pe koz lo la mon pe koz dan merit sa Lalwa, e mon krwar ti ava annan ti devret annan en pe plis klarite, akoz *then* nou'n fini koz lo la dan Lasanble dan Bidze.

Bokou dimoun ti pe mazinen poudir be demen bann pti *guesthouse* pou al pey R25 bann pli gran pou al pey R50, bann pli gran pou al pey lot. So nou bezwen kler ki lentansyon ki pe vin avek otour sa lalwa.

E ler mon get sa Lalwa I kler ki nou annan en konfizyon *from the get go* e la aprezan nou pe vin avek bann mezir ki sipoze klarifye keksoz. Me *still* I les nou avek serten dout vizavi lentansyon e kote nou pe ale.

Mr Speaker an konklizyon mon oule dir poudir, mwan mon napa problem avek pou nou anmas larzan from sa bann gran lotel. E mon krwar pou bann *tourism incentive* anba TIA - bann *incentives* ki nou donn bann letablisman pou zot kapab vin lo lipye, pou zot kapab komans fonksyonnen, I neseser pour ki dan en klima ekonomik, pou sa lotel kapab ouver *in the first place* avek son 30 ekek, 40 ekek, 50 ekek lasanm, 60 ekek lasanm, ou

bezwen donn li en *something* pou li kapab ouver,

Me kestyon ki nou pa'n reponn e mon pou admet sa kestyon ki nou pa'n reponn nou, se ki apre ki ou'n donn li sa bout pou li ouver, kan ki ou antre prezan pou dir be *ok*, mon'n donn sa la, la prezan I fini ou komans peye. Sa ki nou pa'n fer.

Me mon krwar nou pa'n fer sa akoz parey tou lezot pei ki nou'n fer, tou dimoun I *sort of* pa oule tous sa kote sityasyon pangar sa bann dimoun I ale. Pangar I arriv en soz. Tou bann rezon otour sa. E byensir avek *covid* ki fek vini prezan si ou al enplimant en tel mezir - avek *Covid* ki'n ale ki bann letablisman pe repran, ou pa konnen ki mannyer I kapab ganny pran.

So mon konpran sityasyon Gouvernman ki i ladan. Mon konpran sityasyon ki difisil ozordi vizavi sa. Me selman I enportan ki bann mezir ki nou pe met an plas, I kler ki ler zot pou al ganny enplimante pou marse deswit;- pa pou bann mezir ki nou pou war nou pe retournen ,pe ale, vini pou nou kapab fer li sa.

E Mr Speaker, mon swete ki mon krwar Lasanble pou pas sa Lalwa akoz lot kote pou donn li sipor - byensir Gouvernman pou siport zot Lalwa. Mon swete dan sa

mezir ki nou pe fer pou nou kapab anmenn sa koleksyon reveni ki nou oule sa prozeksyon bidzeter, *almost 9. something billion Rupees* ki nou oule fer pandan lannen 2023, I pa anmenn nou pou pran bann desizyon ki pa byen kalkile.

I pa anmenn nou pou pran bann risk ki apre I kapab *disturb* en sekter. Dan sa konteks sa enn I pa vreman en *risk*, me selman I annan serten eleman ki bezwen ganny armonize, pou fer li vin en keksoz kapab bokou pli byen, bokou pli solid, bokou pli for. Mersi Mr Speaker.

(APPLAUSE)

MR SPEAKER

Mersi Onorab. Mon aprezan pas laparol Onorab Henrie.

HON GERVAIS HENRIE

Mersi Mr Speaker. Mon ava dir bonzour tou dimoun, sirtou *panel, welcome* dan Lasanble Nasional.

Mr Speaker sa Prozedlwa ki devan nou, *Accommodation Turnover Tax, Bill* i form parti sa reform dan sistem tax ki novo ladministrasyon pe met an plas e ki in eksplike depi Oktob 2020, ler in pran pouvwar.

E sirtou si nou ti swiv diskour Bidze pou 2023, letan Minis ti koz lo lentrodiksyon

en *tax* lo reveni bann mwayer e gran lotel, son lentansyon sa Prozedlwa ti kler dan prezantasyon Minis, akoz I ti dir nou ki en analiz ki ti'n ganny fer avek lasistans Lorganizasyon pou Korperasyon Ekonomik e Developman setadir *OECD*.

Nou ti'n vwar koman en pei ki Sekter Tourizm I kontribye selman 8poursan reveni anba biznes *tax*, konpare avek 47poursan anba reveni VAT ki kolekte dan sa sekter.

E alor nou koman en pei, nou konnen nou akoz sa bann gran lotel zot swazir pou vin Sesel, akoz nou labote I nou larises e nou trezor, nou lor, nou delwil. Zot kontan nou trankilate. Zot kontan nou zantiyes nou pep, donk zot vini.

E nou prezan koman en Nasyon ki kontribye bokou koman endividé, nou kontribye nou par, nou bezwen osi promouvwar sa largiman ki tou dimoun i bezwen pey son *fair contribution*. E sa I enkli pou bann lakonpannyen ki pe envestir dan nou pei.

Nou rekonnèt ki pou plizer lannen lendistri tourizm in ganny konsesyon, *tax break*, lo depan bann *tax payers* Seselwa, sa in permet zot grandi, devlope. E ozordi letan nou pe koze I annan 50an depi nou lendistri

tourizm I egziste, avek annou mark li avek louvertir Internasyonal *Airport*.

Donk mon krwar ki aprezan zot lo en baz solid pou zot kapab siport nou lekonomi frazil. E bokou pei ki'n entrodwir en *turnover tax*, partikilyerman bann pti ziridiksyon parey nou;- par egzanp *Aruba*, zisteman lentansyon sete pou kapab ogmant zot sirplis bidzeter pou fer ki zot lekonomi, I vin pli solid.

E alor ozordi, letan nou pe dir avek nou pe pep, ler nou pe demann zot pou vin pli responsab pou kontribye ekilibreman, menm lapel I merit al pou tou biznes. E Lalwa ki devan nou Mr Speaker I form parti sa redistribisyon larises nou pei. Kot bann ki'n benefisyé I bezwen e oblize kontribye sa ki zot merite.

E sa *turnover tax* pou mwan mon war li I pou senplifye I ava senplifye sistem *tax* ki pou nou ramase lo sa bann biznes. E I fer li en pe plis zis.

E Minis in dir nou ki I kler ki napa bokou biznes ki ganny afekte par sa. Selman 11 biznes dan son lentrodiksyon in dir. E SRC ler zot pou pe fer zot travay fasil zot pou kapab capture sa bann biznes ki par lao R25 milyon.

So, mon pa vwar rezon pou nou bann pti letablisman Seselwa ki pe debourye e ki pe fer tre byen dan zot kontribisyon - Minis in dir nou zot pe kontribye 8.7poursan reveni total.

Donk, zot napa rezon pou zot enkyet zot, ki ou *La Digue* ki ou Praslin, ki ou Takamaka sa I pa pou ou sa.

Akoz pou lemoman ki ou fer sa R25milyon, SRC I capture e ou ava peye. So mon pa war ki I annan konfizyon ladan Mr Speaker. E sa ki osi enteresan pou nou note pou dir ki akoz Onorab Gill dan son prezantasyon in demande akoz I pa'n vin pli boner.

Mon ava partaz ou lopinyon ki I vre. Koman en pei mon krwar nou ti'n merit fer pli boner sa demars, akoz si non nou ti'n ava benefisyé pli lontan e nou ti'n kapab re-investir dan pei. Dan nou lekonomi dan nou dimoun.

Be ler Gouvernman *LDS* in vini, in dir en keksoz ki mon oule dimoun ki pe ekout nou I sezi - in dir nou pou dir I annan trwa lobzekatif prensipal ki nou le fer. Dabor distribye en pe rezulta travay dir e latitud disiplinen, ki Seselwa e Gouvernman in observe pou sa dernyen 2 an.

Savedir tou dimoun nou dir, responsab travay dir konsyansyezman parey Lartik 40 nou Konstitisyon I demann

nou;- pey ou *tax* e alor apre sa I ganny redistribye premyerman.

Dezyenmman letan sa larises in antre, nou envestir dan lenfrastriktir Me pli enportan - e ki parey mon'n dir bann lezot ziridiksyon ki'n pran sa desizyon, se sa rezon se pou nou asire ki nou akonpli en sirplis bidzeter, ki ava ed nou asire ki det Gouvernman I reste soutenab.

Donk, ler Gouvernman pou ramas sa larzan - mon konnen I annan en largiman ki dimoun poudir be vwala nou pa bezwen al fer monte laz pansyon, akoz nou kapab pran larzan donn Fon Pansyon.

Fodore pa ki nou melanz sa bann largiman, akoz Fon Pansyon I en zafer ki dimoun I kontribye. Sa I en lot zafer sa, me annou pa blyie pou dir par egzanp, Gouvernman ozordi atraver sekirite sosyal, I pe pey deza plis ki R820milyon ki ti ganny bidzete an 2022 dan Bidze la.

So nou bezwen sa larzan, nou bezwen sa bann reform dan sistem *tax* pour ki Gouvernman I kolekte plis reveni e ki kapab ed sa bout sosyal nou pep. E mon swete ki dimoun I sezi pou dir menm ler en parti liberal ki o pouvwar, I touzour annan sa bout *compassionate* pou Lepep Seselwa.

E nou fer sir ki *social safety net* I ganny mentenir dan nou pei irespektiv ki sertern dimoun ti ava kapab fer nou krwar.

Donk, Mr Speaker, mon krwar poudir sa Prozedlwa si nou siporte I ava ed nou koman en Pei akonpli bann lobzektif ki nou'n met devan nou. E Sekter Biznes pa devret trakase krwar pou dir nou pe touf zot. Parski mazinen pou dir dan Bidze sa lannen, zot ti'n deza ganny en konsesyon an term zot *tax*.

Biznes *tax* ti redwir sorti 30poursan pou vin 25 poursan pou bann biznes ki pe fer par lao R1milyon. Nou rapel sa - e semenn pase nou'n fek redwir *tax* sorti 20 poursan pou vin 15 poursan, pou bann benefis non-monmeter pou anplwaye.

Donk, I en reform ki pe kontinyen e nou koman en Lasamble nou bezwen swiv sa. E nou bezwen siporte. An plis nou a rapel ki Gouvernman in donn en langazman pou revwar striktir VAT a lavenir avek sipor *IMF*. Kot I ava annan lentansyon angaz avek kominate biznes, adres bann febles lo lalwa aktyel e klarifye bann prosedir ki an plas.

E nou ekspekte I annan en *commitment* ki'n ganny fer ki pou annan en rapor lo sa size ki ava ganny prezante avek Bidze 2024. So, tousala

nou pe swiv Mr Speaker e nou pou donn nou sipor e asire poudir nou kapab akonpli sa bann target.

Sa ki mon ti ava zis demann mon bann koleg lo lot kote latab, pou *etre* en pe pli desiziv dan zot desizyon e en pe pli konsistan dan zot sipor avek aksyon.

Parski si nou swiv. Depi Bidze 2022, 2023 I annan en konsistans dan lentansyon Gouvernman. Donk par egzanp si zot pa siport prensip e merit zeneral Bidze, zot *abstain*, I montre pou dir zot pa pe siport sa Polisi selman apre zot siport sa Lalwa.

So I annan en lenkonsistans lo lapar lot kote latab ki nou ti ava demann zot, pou dir reget sa. So si nou pou siport akoz sa I vedir reveni pei pou re-investir dan nou pep. E asire ki det pei I soutenab, nou bezwen koz menm langaz, plis larzan pou travayer nou bann dimoun aze I kapab ganny soutenir.

Nou bann zanfan, sistèm ledikasyon, lasante napa naryen pou fer avek Fon Pansyon akoz Fon Pansyon sa ki kontribye I benefisyé, si ou pa kontribye, ou kale pa plennyen.

E alor Mr Speaker, mon ava terminen pou dir atraver ou Lonorab Woodcock, Lonorab Minis Finans e Lonorab Prezidan Larepublik.

Football is not coming home, be solman nou pou siport ou Prozedlwa pou asire ki ou ganny ou R9bilyon an term tax that's definitely coming home.
Mersi.

(APPLAUSE)

MR SPEAKER

Mersi Onorab Henrie, mon annan Onorab Georges ki'n leve lanmen I dernyen entervenan, alor mon a pran li e nou a ferm deba apre son entervansyon. Onorab Georges?

HON BERNARD GEORGES

Mersi Mr Speaker. Mr Speaker I pa ti mon lentansyon koze, me mon krwar ki I annan 2 pti keksoz ki I dan mon devwar pou eksplike oubyen koz lo la bomaten.

Dan tou lenvestisman ki arive dan en pei fodre I annan a en serten moman en *trickle down*. Non-selman sa lenvestiser I bezwen fer son larzan e sa se primordyal dan son latet, me sa lenvestisman fodre I anmenn en serten benefis pou sa kominate, oubyen sa pei kot sa lenvestisman I egziste.

E sa se en Lalwa iniversel kot ler I pa arive lazisteman I bezwen ganny fer pou ki I arive. E nou'n vwar sa fenomenn isi kot nou tre, tre byen. Touris Mr Speaker I en

lendistri profitab, I kler. I en lendistri ki fer bokou larzan I en lendistri ki bann dimoun I al ladan akoz zot fer larzan.

E dan serten landrwa dan nou Pei, sa I pli evidan e nou remarke par egzant dan bann pli pti - nou bann pli pti zil Praslin spesifikman avek La Digue, sa *trickle down* I bokou, bokou pli *obvious*. Ou vwar benefis ki sa lendistri touris I anmennen pou bann dimoun direkteman.

E ou vwar zot nivo lavi I pli elve dan en serten fason, ki dan bann lezot parti nou teritwar. E donk e se sa mon krwar model ki nou devret swiv, kot en lenvestiser I pa per pou son lenvestisman. Akoz I konnen son lenvestisman pou proteze, I konnen ki I pa pou ganny *taxed out of the market*.

I konnen ki ler pou annan en problem demen avek Lanplwa oubyen I annan en problem kot I pou al Ankour, i pou ganny zize selon *the rule of law* e I pa pou en zizman arbitrer.

Tousala se bann kondisyon ki egziste dan nou pei, ki fer ki lenvestiser I konnen ki zot in ganny proteze. E lo lot kote, nou pei I konnen ki nou pe ganny en benefis avek sa bann lenvestisman e sa benefis i al swa direkteman avek bann

akter dan sa lendistri, bann pti lotel prensipalman.

Bann restoran, bann *car hire, bicycle rental*, bann keksoz koumsa bann *boat charters* tousala;- bann dimoun ki ganny zot lavi direkteman. Me osi endirekteman atraver kontribisyon ki tax I fer. E ki tax I *then* partaze, atraver Bidze ki nou fek pase e ki nou pase tou-le-z-an.

Donk, mon krwar sa prensip I en prensip ki nou bezwen tenir antet e ler nou fer sa I nou realize ki lenvestiser I ganny proteze, zot sorti isi avek zot lenvestisman e zot lenvestisman I rantab. E ki I annan en retonbe dan lanmen pei kot lenvestisman I arive, I en lekilib ki bon e ki I en lekilib ki devret ganny mentenir.

E se egzakteman sa lekilib ki pa ti pe ganny mentenir, ki sa Lalwa I vin pou adrese ozordi, akoz dan en serten fason - parey Minis in eksplike - kontribisyon lenvestiser pa ti alaoter, ki i ti merite e donk sa retonbe sa *trickle-down* pa ti pe arive lo nivo bann gro lotel.

E mon retourn lo pwen ki mon ti pe fer dan bann pei kot I annan bann pti lotel, oubyen dan bann landrwa dan nou zil kot I annan plito bann pti lotel Praslin, La Digue spesifikman, retonbe I bokou pli evidan ki bann lezot landrwa.

E alor Mr Speaker, dan sa konteks nou kapab demande. Eski en *turnover tax*, en *tax* ki pa lo profi akoz toulstan nou koz lo *tax* e I devret lo profi ou pa devret pe takse kouraz en dimoun, ou devret pe takse son profi. Eski en *tax* ki pa lo profi, me ki li *turnover* eski I pa al kont sa prensip?

Mon pa bezwen return lo la akoz bann Manm ki'n koz avan mwan in eksplike ki annefe non, pou 2 rezon. Premyerman akoz ti annan sa de-balans ki ti bezwen ganny redrese;- e dezyenmman, akoz nivo sa *tax* I en *tax* ki nou kapab dir I minim. Akoz li R25milyon *turnover* ou pou pey zis R500mil, koman *tax*. Alor I pa en *tax* ki pou vin egorz sa lenvestiser e fer li ale.

And this is the whole purpose, Mr Speaker. Fodre annan en balans ki zis - en balans ki soutenab. Ou pa kapab parey nou dir *kill the goose that lays the golden egg*. Sa se premyer keksoz ki mon ti anvi dir.

Dezyenm keksoz ki mon ti anvi partaze, sete enn bann rezon kekfwa ki pa'n ganny evoke bomaten e ki nou devret touzour tenir antet - e mon rapel ki depi ler ki I ti Gouverner Labank Santral. Mr Abu Amir Rudy ler I ti Gouverner Labank Santral I ti pe eksplik mwan zot ti annan

en lide, fer menm zafer isi a sa lepok.

Me pou en rezon ou pou en lot I pa'n ganny aplike. E I ti pe eksplik mwan rezon akoz Gouvernman ti enkyet atraver sa ki bann gran lotel I fer annan de fwa e ki zot ti anvi ferm en laport kot I annan labi.

E mon pa pe koz Sessel la mon pe koz *Maurice*, akoz I pa ti pe koz neseserman pou Sessel akoz a sa lepok nou ti napa sa kantite gran lotel.

Me *Maurice* ti annan en kantite e I ti pe eksplik mwan enn bann fason ki lenvestiser dan tourizm *Ile Maurice* I fer. Ler zot konstrir en lotel, zot konstri li avek en baz en fondasyon byen solid, me son striktir par lo la, i en striktir ki mwen solid. E zot fer sa avek en lentansyon ki koman ou ariv lo sa *threshold* apre ki nou'n pey tou ou *loan*, koman ou ariv lo *threshold* kot ou kapab pey *business tax* akoz ou profi pou komans fer, pou kas lotel.

Ou re aranz li ou retir son striktir ou refer en nouveau striktir lo la e ou rekomans sa *cycle* ankor. E ou sa envestiser toultan ou prodwir I *top*, me ou pa zanmen ariv a en nivo profitabilite kot ou bezwen pey *tax*.

E lo lot kote sa ki zot fer avek zot bann *internal structures*, bann lekipman,

bann lili, bann *bedding, toweling* eksatera, se ki zot annan en konpanny apar.

E la osi a sak fwa sa I ganny renouvre regilyerman tou-le-zan *good or bad* zot zet tou keksoz, zot remet sa ki nef ankor enn fwa pou zot profite lo en lot lakonpannyen ki zot annan e pou zot nivo *tax* zot nivo profitabilite zanmen ariv a sa nivo kot zot pou bezwen pey *business tax*.

Sa se bann keksoz ki *tried and tested* e nou tou nou konnen ki arive. E ou pa kapab blanm en lenvestiser dan en serten fason. Akoz toultan I pou anvi sey *avoid* arive lo en sityasyon kot ou pou bezwen pey *tax*. Akoz sa se en larzan ki sorti e o kontrer I anvi renouvre son biznes e fer sir ki son prodwir, I toultan *optimal* pou li kapab ranmas otan larzan ki posib.

E se sa lekilib ant sa de keksoz - nou konnen ki sa bann sistenm I arive, me nou konnen osi ki nou bezwen annan en sistenm kot *income* kot reveni, kot *turnover* sa biznes I kapab *achieve* son nivo *tax* abilite, kot sa pei osi I benefisye.

Donk mon vwar sa Lalwa bomaten Mr Speaker, koman en loportinite parey tou dimoun in dir - ler ou pa kapab ariv lo en nivo profitabilite, akoz ou pe depann lo sa lendistri pou li

ariv profitab e nou'n realize, par bann *figures* ki Minis in donn nou bomaten, ki sa pa ti pe arive isi, ou bezwen pas lo en novo nivo pou ou kapab anmas sa *tax* ki pei I devret pe benefisyé avek sa lenvestisman.

Donk mon vwar sa balans ant nesesite pou gard en lendistri otan ki posib e perform san ki ou vin touy sa poul. Me an menm tan osi ou bezwen ki sa performans I anmenn en serten reveni pou ou pei. Mon vwar ki sa balans ki nou'n ki Minis avek son lekip in arive fer, atraver en *tax* lo *turnover*; premberman en *tax* zis 2 poursan.

Dezyenmman, I *achieve* sa balans e se pou sa rezon Mr Speaker ki lo nou kote latab - lo nou kote latab nou pou donn sipor avek sa Prozedlwa ki devan nou. Mersi Mr Speaker.

MR SPEAKER

Mersi Onorab Georges. Mon ava prezan apel Minis pou fer son repons lo deba.

MINISTER NAADIR HASSAN

Mersi Mr Speaker. Mersi bann Onorab ki'n fer bann komanter lo sa Prozedlwa.

Mon santi ki an prensip I annan sipor tou lede kote latab, lo merit sa Prozedlwa. E la mon ti a kontan *express* mon lapresyasyon a Onorab

Gill e Onorab Hoareau ki'n eksplik merit sa *Bill* e osi *raise* serten kestyon ki mon ava - serten kestyon pertinan ki mon ava adrese dan en pti moman.

Lo kote bann komanter *Leader Lopozisyon*, mon santi ki I annan enn de pwen ki mon devret klarifye, ki kekfwa I en pe konfizan pou li. Me lo kote *summing-up* se - 2 *summing-up* parfe sorti kot *Leader Zafer Gouvernman* e Onorab Henrie, ki in adres plizyer bann serten bann komanter ki'n leve.

Mr Speaker pou al en pe pli detaye, enn bann komanter ki'n leve se, akoz pa pli boner? Wi mon toutafe dakor I ti en Prozedlwa ki ti'n devret met pli boner. Me mon pa kapab komant lo avan ler mon'n pran lofis, me dan sa dernyen 2an ti annan plizyer *issues* pou - i ti priyorite lo priyorite pou *sort out*.

E nou dan Minister nou annan en tim ase minim ki travay lo bann *policy tax*, e zot annan zot en azanda ase sarze lo diferan laspe bann reform *tax*. Me parey I dir *better late than never*. So mon santi pou dir nou pe al dan bon direksyon.

E sa I zis ankor enn bann mezir dan bann plizyer lezot ki nou pou fer a longer di-tan, pou nou anmenn nou rezim *tax* pli modernize, me osi pli pratik pou fer koleksyon *tax*

vini. I pa zis en eleman annan en rezim *tax pli meyer* me enn ki pli pratik, dan son lenplimantasyon.

Lezot issue ki'n leve se lo kote *tax allowances*, wi sa ti en konsern ki ti leve e si zot rapel mon ti fer lanons dan Bidze ki I annan bann *tax allowances* ki ti pou redwir. Annefe sa ti dan premye Bidze ki mon ti prezante.

E apartir le 1 Zanye (lannen pase) - sa lannen 2022. I annan bann *tax allowances* par egzanp lo *capital depreciation*, lo *market*. Annefe in komans fini desann sa bann sa. So nou pe bouz dan sa direksyon.

Lo kote penalti zis pou klarifye se bann penalti I annan en *subsequent amendment* ki pe vini dan *Revenue Administration Act* ki pou cater pou penalti e ed SRC dan *enforcement* sa Lalwa.

Lo kote *yacht ek cruise ship*, sa osi I en priyorite. Parey mon ti anonse dan Bidze 2023, I annan louvraz ki Minister in komanse avek pou ganny lasistans avek *IMF*. Pou regard bann *issues around taxes* lo kote *yacht*.

So, sa lo nou azanda travay nou antisipe ki nou a finaliz li premye kar lannen prosen pou *submit* avek *Cabinet* e apre si I neseser pou vin kot Lasanble Nasional.

Lo kote *incentives*, wi, si zot rapel byen ti annan le fame *Tourism Incentive Act* plizyer lannen pase e pou mwan enn bann defayans dan *Tourism Incentive Act*, se ki son bann *incentive* ti permanan *ok?* E parey nou konnen tou *incentive* I sipoze met ou lo ou lipye.

Once ou lo ou lipye, ou kapab pey sa ki ou devret peye. Me avek bann reform ki'n pase, nou nepli annan *incentive in the tourism sector*. So, ozordi napa, napa sa bann *incentives* apard enn de lo kote parey konsesyon *fuel*, ki bann lotel ki prodwir zot prop elektrisite, bann ki lo bann lezot zil I gannyen.

So, an gro nou napa *incentives* dan Sekter Tourizm. Annefe sa lalwa I annan en provizyon ladan, ki anpes donn bann *incentives* lo kote *the turnover tax, ok?* E pou nou Polisi Gouvernman se ki nou santi pou dir Sekter Tourizm I ase for pou le moman.

I kapab debout lo son lipye. I pe fer byen, e annou konsantre dan bann lezot sekter ki nou oule devlope parey Sekter Lapes, Sekter *Digital Economic*. E sanmenm sa ki ou ti war pou dir dan Bidze 2023. Mon ti anons en nouveau *tax rate* pou Sekter *Fish Processing* avek *Aquaculture*.

Lo transfer pricing akoz?
 Si nou pa *trust* sa Lalwa?
 Rezon I senp se, lamannman ki'n fer pou minimiz *risk transfer pricing*, i fondasyon ki bezwen ganny met an plas, *ok?* Me annou pa krwar poudir akoz nou'n anmenn en Lalwa, *transfer pricing* I disparet. *Ok?*

Se I bezwen annan *building of capacity* dan SRC, akoz ler ou pe al get *transfer pricing* I en *issue compliance*. E ou bezwen build kapasite e sa in komanse;- bann *expert* ki la ki pe *build* kapasite SRC, I annan envestigasyon ki ou bezwen fer lo kote *compliance* lo la. Me son rezulta li menm li ou pou war plizer lannen *down the line*.

En lot *issues* ki pa adrese se bann *accurate losses*, *ok?* E li sa Lalwa lo kote *turnover tax accurate losses* pa ganny konsidere. Savedir ou pou pey ou *tax* lo *turnover*, so ou pa kapab servi *accurated losses as a means of* pa pey sa *tax*.

Definisyon
 lakomodasyon, mwan pou mwan dan Lalwa I kler, akoz dan *Schedule 1* i dir ou lekel bann lakomodasyon ki ganny touse e I dir ou "all tourism accommodation operators namely; hotels, guesthouses, self-catering establishments, yacht, cruise ship. So mon pa tro war en *issue* lo la.

Lo sa kestyon ki'n leve, eski akoz ou'n met R25milyon

si I pou *capture guesthouse*? Non, I pa pou *capture guesthouse*, me selman ou konnen mon pa war vreman merit sa largiman. Akoz premyerman parey mon dir I ki *Leader Lopozisyon* I *agree* se ki napa *guesthouse*, pou le moman ki fer R25milyon i.

E lentansyon I pa pou *capture* sa bann *guesthouses*, me nou pa konnen si I annan en *guesthouse by virtue of* son *business model*, I en *luxury type* ki li I kapab ganny *capture*, nou bezwen fer provizyon pou li, *ok?*

Savedir, lentansyon Gouvernman I kler, premyerman I pa pou *capture* nou *guesthouse* Seselwa. Me I fer provizyon e si I annan en *business model specific* ki li son *turnover* I pli o, nou *capture* li. So sa lo kote sa *threshold turnover*.

E dernyen pwen ki ti leve se lo kote *whether* si nou bezwen en Rezistrar pou lotel e bann akomodasyon? Mon pa santi ki nou bezwen akoz ozordi zot bezwen ganny *license*, zot bezwen anrezistre pou pey *tax* e SRC li menm li I pou annan en *Rezistrar of 2 license establishments* ki pou operate dan pei.

Mr Speaker avek sa, mon ti a kontan ankor lans lapel pou siport Lasanble Nasional dan sa Lalwa. Mersi.

MR SPEAKER

Mersi Minis. Mon ava aprezan apel bann Manm pou rikord zot vot lo sa *Bill*.

Manm ki an faver lev lanmen silvouple? Mersi. Mon krwar tou Manm in vote. Okenn Manm ki vot kont? Non.

Lo *general merit Accommodation Turnover Tax Bill, 2022*, 29 manm in vot pour, 0 kont e 0 abstansyon. Donk, sa *Bill* in aprouve lo *Second Reading* e Madanm Clerk a fer *formal Second Reading*.

MADAM CLERK

Mersi Mr Speaker. A *Bill for an Act to provide for the imposition of Accommodation Turnover Tax and for other connected and incidental matters*. Mersi Mr Speaker.

MR SPEAKER

Mersi Madam Clerk. Nou ava prezan pas da Staz Komite, pou nou kapab konsider amannman. Kestyon lo sa *Bill*. Onorab Hoareau *Acting Chair Bills Committee* I a kapab lead nou.

HON JOHN HOAREAU

Mersi Mr Chair. Nou pou komans nou seri lamannman lo *arrangement of sections*, ki in ganny *re-numbered* premyerman e *number 2*, I vin *application of Act (en insertion)*.

*Number 3 I vin “interpretation.” Number 4 I vin “imposition and liability of Accommodation Turnover Tax. Number 5 I vin “manner of payment of Accommodation Turnover Tax.” Prezan sa ansyen *number 5* I ganny deleted sa “application of the Act” kot I ti’n ganny mete.*

Sa I en re-aranzman pou fer li tonm annord avek parey bann gidans *legal drafting* I demande. Prezan nou pou al lo paz 3, paz 3 *the long title* “A *Bill for an Act*” nou retir “of”. Prezan nou komans lo *clause 1 short title* nou annan “*number 1*” ki ganny ekrir la I ganny inserted.

Apre anba application of Act ki’n ganny insert la I vin number 2 clause 2 (1) “This Act binds the Republic of Seychelles” prezan I vin number 2” notwithstanding any tax exemption to any person, under any law or agreement with, with made before or after the commencement of this Act, an exemption of tax, on a statutory corporation or any other person shall not be construed as an exemption from the payment of tax under this Act.”

MR SPEAKER

Wi, Onorab nou a *pause* en pti moman mon annan 2 Manm ki’n lev lanmen, onorab Georges, premye.

HON BERNARD GEORGES

Mersi Mr Chair. Mr Chair mon krwar I annan dan en “with” ki an tro dan (2). I ti’n ganny tire dan en *previous iteration* me in re antre ankor. Sa dezyenm laliny “or an agreement “with” made.” Mon krwar sa “with” I devret ale “or an agreement made before or after the commencement of this Act.” Mersi.

MR SPEAKER

Panel nou an akor avek sa, bann lezot Manm osi? Onorab Pillay.

HON SEBASTIEN PILLAY

It was the same point.

MR SPEAKER

Mersi. Nou a kapab kontinyen Onorab Hoareau?

HON JOHN HOAREAU

Anba *interpretation* ki vin clause 3, I annan “*definition of business*” ki nou’n *delete from the words “means to employee.”* Vedir sa bout ki la ki mon pou lir in ganny retire “*means a commercial or profit-making venture, a profession, trade, vocation or calling exercise by or any leasing of property or premises of any venture, in the nature of trade carried on by a person but does not include an employee*”. So tousala in ganny retire. Ok?

Prezan nou’n *include “has the same meaning provided under the Business Tax Act Cap 20”*.

MR SPEAKER

Mersi wi. Onorab Pillay?

HON SEBASTIEN PILLAY

Mersi Mr Chairman. Mr Chairman mon annan en klarifikasiyon mon pe rode la, mon bezwen avan mon demann mon klarifikasiyon prefas mon lentansyon.

Mon lentansyon se fer sir ki nou kapab *capture* tou biznes, ki pe fer en aktivite Sekter Tourizm, a leksepsyon nou bann pti *guesthouse*, nou bann pti aktivite. Me ki devret pe pey en reveni Gouvernman me selman sa Gouvernman pa pe kapab *capture*.

Sa I mon lentansyon e mon lentansyon pou demann sa kestyon I vin *from* sa. Mon ti a kontan demann Minis lefe ki ler mon ti pe koz lo definisyon pou akomodasyon, mon ti *mean* akomodasyon li menm. *What we mean by accommodation as per tourism - an relasyon avek tourizm.*

E la mon war biznes nou pe *define* li *cut and dry* parey Lalwa Business Act pe *define* li. Eski ou kapab zis donn mwan en klarifikasiyon, akoz anba sa Lalwa ou pa pe konsider annan en definisyon spesifik pou *capture* aktivite ki zot pe fer an relasyon avek

akomodasyon, *as it relates to tourism?*

Konmsi mannyer mon war ou pe kit levantay ase ouver, mon ti a kontan demann ou si mon bezwen demann sa kestyon Mr Speaker, akoz mon napa problem Mr Chairman avek sa definisyon ki la mwan. Me selman mon zis santi ki ler mon pe regard lezot Lalwa lezot pei, zot in al sa zistans pou definir sa.

So petet mon ti ava kontan konnen akoz Sesel nou pa pe al dan sa direksyon? Mersi Mr Chairman.

MR SPEAKER

Mersi. Minis a klarifye?

MINISTER NAADIR HASSAN

Mersi Mr Chair. Mr Chair mon a pas laparol avek SS I a klarifye sa kestyon. Mersi.

MR SPEAKER

Mersi, SS.

SS PATRICK PAYET

Mersi Mr Chair. Mersi Onorab e bonzour tou dimoun ki a lekout e tou manm Onorab.

Mr Chair, zis pou klarite parey Minis in mansyonnen dan *Schedule 1* nou'n mete ki dan sa *Schedule* sa novo tax I aplikab pou tou bann operator akomodasyon. E sanmenm sa nou'n anmenn plis en pe klarite ki nou'n donn

sa bann kategori biznes ki nou krwar ki I dan operator akomodasyon.

Me se pandan parey Minis in dir son *threshold* I zwe en rol, so menm si ou dan en operator akomodasyon si ou *threshold* pa plis ki R 25 milyon I pa pou aplikab pou ou. En lot keksoz ki nou bezwen *take into accounts*, se definisyon *turnover* dan seksyon definisyon linterpretasyon, ou pou vvar ki turnover I pou enkli menm si sa Lalwa I aplikab pou bann operator akomodasyon parey *the accommodation turnover tax*.

Me selman son *turnover* I pou tou son *turnover* son reset ki I pe gannyen;- savedir en lotel li si son *gross receipt* ki pou enkli son lasanm, son reveni ki I pe gannyen dan restoran, sa I pou aplikab dan sa 2 poursan.

So sanmenm sa ki nou'n anvi en pe sa klarite ki pou fer sir ki son klarite dan operator akomodasyon, me son definisyon *turnover* li nou'n fer sir ki I enkli pou regard son *gross receipt* of sa operator ki dan biznes. Mersi.

MR SPEAKER

Mersi nou a *move on*. Onorab Hoareau. Yes, SS ou ti annan keksoz pou azoute ankor?

SS PATRICK PAYET

Wi Mr Chair, zis avan kekfwa definisyon biznes akoz nou fer en pe *re-numbering, re-arrangement* mon krwar I annan keksoz osi ki nou bezwen amande, se “*accommodation turnover means the tax levied and payable under section 3.*” Me la mon krwar I pou vin section 4. So sa osi nou bezwen fer amannman lo la, akoz sa *re-numbering*. Mersi.

MR SPEAKER

Tre byen.

HON JOHN HOAREAU

Ok, nou ava pran kont sa.

MR SPEAKER

Fodre nou retourn en pti gin an aryer la.

HON JOHN HOAREAU

Yes, nou a pran kont sa *renumbering*. I pou vin section 4.

MR SPEAKER

Thank you.

HON JOHN HOAREAU

Mr Chair nou pou al lo lot definisyon. “*Entity means*” e la nou’n retir “*a*” avek “*b*” nou’n ranplas li par “*has the same meaning provided under the Business Tax Act (Cap 20)*” dan bracket. So, ki nou’n retire nou’n retir pou bann ki pe ekout nou, pou zot konpran

byen “*a body or association of persons corporate or unincorporate whether incorporated created or formed under the law of Seychelles or elsewhere, including a limited partnership and unit trust of ...*” Sa nou’n retire.

Apre ‘*b*’ “*a foreign association of persons that the Commissioner General has declared to be an entity under the Business Tax Act.*” Sa osi in ganny retire.

MR SPEAKER

Byen.

HON JOHN HOAREAU

Mr Chair?

MR SPEAKER

One moment, Onorab Georges ek Onorab Pillay I annan komanter. Onorab Georges?

HON BERNARD GEORGES

Mersi Mr Chair. Mr Chair mon swiv sa ki Onorab Hoareau pe fer. Annefe zis pou bann dimoun ki pe ekout nou konpran, sa bann definisyon ki pe ganny tire, ki pe ganny ranplase par “*has the same meaning under the Business Tax Act,*” se bann menm definisyon ki dan *Business Tax Act*, alor nou pa bezwen repet li ankor.

Me lo definisyon *entity*, I annan en mo ki fodre nou retire sa se sa mo “*means*”

apre "entity" akoz I pa pou lir byen, so that it reads "entity has the same meaning provided under" eksetera. Mersi.

MR SPEAKER

Mersi. Manm I aksepte sa? Panel? Byen. Onorab Pillay, ou ti annan en pwen?

HON SEBASTIEN PILLAY

Wi, Mr Chairman. En pwen vreman *straight forward*. Parey Minis I konnen I en largiman ki mon pe avanse *for a while now*, pou en pe letan se ki konsern serten landrwa. Serten lespas biznes dan pei, partikilyerman mon pa pou kasyet *Eden Island* par egzanp, akoz mon san ti ki I annan en kantite aktivite ekonomik ki pe pase, me ki nou pa pe kapab *capture*.

*Be it lo kote lanmer, be it li kote rezidansyel e pou mwan sa I en keksoz ki mon krwar nou bezwen fer. E apre ki mon ti tann National Bureau of Statistic dir ek nou dan en reyon, dan en meeting SS Payet mon krwar ti la, kot zot pa ti kapab antre *Eden Island* pou menm fer census. Mon krwar pou mwan I en konsern.*

Prezan ler mon pe regarde, re asir mwan ki si komisyoner Zeneral I anvi deklar sa bann aktivite koman en antite anba sa Lalwa, e nou annan en *threshold* ki nou

etablir anba sa Lalwa pou sa bann kalite antite, re asir mwan ki Gouvernman pou dan en pozisyon pou fer li vitman e deswit, e non pa bezwen espere pou nou al fer lezot letour avan ki nou kapab fer li?

Si zot pe konpran mwan byen ozordi Mr Speaker nou'n met en *threshold* dan sa Lalwa, I pa vedir ki nou bezwen *stick to* sa *threshold* nou an se ki konsern sa kategori biznes, akoz nou pa pe *capture* naryen. Nou pa konnen ki pe arive. So, petet donn mwan sareasiran ki nou pou kapab fer li. Mersi Mr Chairman.

MR SPEAKER

Thank you. Panel, Minis. ou ti a kontan adres sa.

MINISTER NAADIR HASSAN

Mersi Mr Chair. Mersi Onorab pou sa kestyon. Onorab parey ou konnen mon konsernen lo sa sityasyon. Annefe I annan en *task force* ki pou parey mon ti mansyonnen dan Lasanble detrwa semenn pase, premyerman nou bezwen konpran egzakteman - konpran egzakteman ki kalite aktivite ki pe pase.

Dezyenm, gete ki mannyer nou kapab anmas reveni ki nou sipoze kolekte dan sa bann aktivite ki pe pase. Sa an zeneral lo *issue Eden Island*. Me lo kote sa *tax*

napa naryen ki *exempt Eden Island*; - *Eden Island* I en ziridiksyon ki tonm anba Lalwa Tax. Savedir nou Lalwa I aplikab lo bann letablisman.

E koman Minis pou responsab pou Finans, mon pa pou tolere si I annan okenn *efforts* pou anpes nou anmas *tax* ki pe ganny kolekte. I parey nenport ki landrwa lo Sesel. Mersi.

MR SPEAKER

Mersi. Onorab Hoareau, ou a kontinyen *please*.

HON JOHN HOAREAU

Mr Chair nou ava kontinyen lo section c menm paz, paz 4, I pou lir koumsa “any other Act under which a tax duty fee, levy or charge is imposed of which” e la nou’n tir “if” nou’n met “of which the responsibility for the general administration of the tax, duty, fee, levy or charge is on the Commissioner General and” apre I kontinyen.

MR SPEAKER

Thank you. Mon kapab .. Lo sa section c sa? Mon pe zis remark en pti keksoz dan “b” “an Act listed” - “listed” I bezwen capital dan sans ordiner I pa bezwen, eski...?

HON JOHN HOAREAU

Mr Speaker, eski ou kapab dir mwan ki laliny ou pe koz lo la?

MR SPEAKER

“B” Revenue law means “b”, dan menm seksyon kot ou ti ete la. Zis en paragraf avan sa. “An Act listed.”

HON JOHN HOAREAU

Ok, “an Act listed” ...

MR SPEAKER

Tou senpleman tipografik, capital lo sa “L.”

HON JOHN HOAREAU

Yes, mwan osi mon tonm dakor avek ou.

MR SPEAKER

Thank you. Panel, ok? Thank you Onorab ou kapab kontinyen.

HON JOHN HOAREAU

Ok, nou al lo “imposition and liability of accommodation tax” - turnover tax” e la I annan en renumbering. Zis avan sa anba turnover - meaning of turnover, I annan en “s” ki’n ganny azoute avek provision trwazyenm laliny. Sorry “s” ki’n ganny tire, pa azoute, tire.

Apre nou ava al lo sub section 4 ki’n ganny met lo koman sub section 5. Anba manner of payment of accommodation turnover tax, so I vin 5(1).

MR SPEAKER

One moment, SS, I anvi komante.

SS PATRICK PAYET

Mersi Mr Chair. Mersi Onorab. Mr Chair anba *imposition and liability of accommodation turnover tax*, zis en pti typo 4(1) la I pe vin 4 (1), sa dernyen laliny at the rates specified in column 3 of Schedule 1. So dan plas column 4 I vin column 3.

MR SPEAKER

Thank you. Manm in note.
Onorab Georges.

HON BERNARD GEORGES

Briyevman osi Mr Chair, mersi. Lo dezyenm laliny sa clause 4, shall be imposed on a person mon war I annan en comma (,) ki'n ganny delete. "Subject section 2 shall be imposed on a person whose annual turnover..." Mersi.

MR SPEAKER

So, ou pe delete sa comma (,)?

HON BERNARD GEORGES

Wi, pa bezwen en comma la.
Mersi.

MR SPEAKER

Thank you. Mon krwar sa I rezonnab. Mon krwar in ganny aksepte, kontinyen Onorab Hoareau.

HON JOHN HOAREAU

Mersi Mr Chair. Nou pou al lo aprezan after sa sub clause 5, nou pou al lo "application of

the Act" ki nou'n retire. So nou'n tir antye 5 (1) avek 5(2).

MR SPEAKER

Yes.

HON JOHN HOAREAU

E nou al lo *Schedule 1*, lo latab *schedule 3 column* kot I met "rate of tax." "Percent" in retire pou met son senbol "%."

MR SPEAKER

Thank you. Yes Onorab Pillay.

HON SEBASTIEN PILLAY

Mersi Mr Chairman. Mon annan 2 pwen mon ti a kontan ganny klarifikasyon panel. Premye letan mon ti Lalwa orizinal dan son letan koz laplikasyon sa Lalwa, sa enn premye 5(1) mon konpran nou ti'n deza mete anler pa neseser repet li.

Me dezyenm I ti pe sort of en *out of abundance of caution* fer kler ki napa okenn *exemption*. Sa ki mon ti pe sey ganny klarifye, ok? So zis reasir nou ki ler nou pe pas sa Lalwa, pou napa okenn *existing exemption* ki pou aplikab pou okenn antite. Savedir lannen prosenn ler ou fer ou R45 milyon, on top of *business tax* nou pou pran 2 poursan lo ou *accommodation tax*. Dir nou sa.

And then mon dezyenm pwen Mr Chairman very simple, sa R25 milyon

threshold ki nou'n ariv lo la, la en? En bon pe larzan R25 milyon pou en letablisman fer. Me mon konnen I annan sa bann ki fer plis konmsi, mon pe le en gran lesplikasyon Mr Chairman san ki nou'n al gran detay, me *how did you come to the figure R25million. Why wasn't it petet R15million par egzanp?* Eski *R15million* pou tap nou bann operator lokal. So zis...

MR SPEAKER

Thank you. Minis ou ti a kontan...? SS Payet I ava adrese wi. SS?

SS PATRICK PAYET

Mersi Mr Chair. Mersi Onorab. Wi, nou kapab konfirmen ki parey Lalwa I ete ozordi, pou napa okenn *exemption*. Sa nou kapab fer konfirmen. E dezyenmman letan nou ti pe travay lo ki *threshold* nou ti pe mete, se letan nou ti pe konpar sa bann operator - sirtou bann lotel, letan nou ti pe konpar ki zot peye anba *business tax* konpare avek bann lezot operator.

So sanmenm sa ki nou'n vwar ki letan ou regard bann ki anba sa *threshold* R25 milyon, letan ou konpar zot *turnover* avek poursantaz, I *very low* konpare avek bann pti biznes. E parey Minis in mansyonnen, ti apepre 1.

keksoz pou zot, sanmenm sa ki nou ti'n met sa propozisyon.

Mr Chair zis en lot propozisyon *for lamannman anba sa schedule*, I annan sa seksyon 3 (1) mon krwar li osi I bezwen ganny amande pou li vin 4 - 4(1). Zis anba sa *schedule last part*. Mersi.

HON JOHN HOAREAU

So it's section 4 (1). Yes thank you.

MR SPEAKER

Thank you. Onorab Georges.

HON BERNARD GEORGES

Mersi Mr Chair. Mr Chair 2 pti *very minor points*. Enn se lo *schedule 1* anba *rate of tax 2 percent*, zot in tir *words* zot in *met the symbol*. Mon pa konnen si I devret annan en *full stop* apre. Mon'n poz sa kestyon, me mon konnen ki *legal draftsperson* I ava deside.

E nou pa bezwen pran sa desizyon la, me ler nou al lo *White Copy*, si I kapab ganny mete propreman. Me *the point that I wanted to raise* se lo premye *column*, sa lalis letablisman zot tou zot dan o *pluriel* sof ki *guesthouse* I *singular*. Mon krwar I devret pran en "s" li osi. So I "*hotels, guesthouses, establishments, yachts, cruise ships.*" Mersi.

MR SPEAKER

Yes, ok. Panel e Manm nou an akor? En pti koreksyon. Minor amendment. Thank you.
Onorab Hoareau?

HON JOHN HOAREAU

Mr Chair avek sa nou'n arriv lafen nou seri lamannman pou sa *Bill*, mersi.

MR SPEAKER

Ok. Eski mon kapab poz en pti kestyon, si ou pe soz - dan sa form SRC mon war en soz an rouz, eski it's intended to be an amendment, en koreksyon, oubyen zis son form I koumsa? Dan sa form accommodation turnover tax.

HON JOHN HOAREAU

Mon krwar I ti lo *original Gazette*.

MR SPEAKER

So, sa rouz I part of the form. Ok, thank you.

Mersi nou'n arriv a lafen bann amannman. Nou napa naryen ki nou bezwen pas lo la, alor nou a kapab pas dan Staz Lasanble, pou pran *Third Reading*. E mon apel Lonorab Lider Biznes Gouvernman pou anmenn Mosyon pou *Third Reading*.

HON BERNARD GEORGES

Mersi Mr Speaker. Mr Speaker, anba *Order 76(1)* nou *Standing Orders*, mon move ki *The Accommodation Turnover*

Tax Bill, 2022 as amended I ganny lir en Trwazyenm Fwa. Mersi.

MR SPEAKER

Nou a ganny segonnman.
Onorab Henrie.

HON GERVAIS HENRIE

Mr Speaker, *Motion seconded*.

MR SPEAKER

Mersi Manm a vot lo Mosyon pou *Third Reading*. Manm ki an faver lev lanmen silvouple. Mersi. Mon krwar tou Manm in vote. *Thank you*.

*Lo Formal Third Reading Accommodation Turnover Tax Bill 2022 as amended, 29 Manm in vot pour, 0 kont e zero abstansyon. Alor Accommodation Turnover Tax Bill in aprouve par Lasanble e Madam Clerk a fer *Third Reading*.*

MADAM CLERK

Mersi Mr Speaker. *This Act may be cited as The Accommodation Turnover Tax Act, 2022 and shall come into operation on the 01st January 2023.* Mersi Mr Speaker.

MR SPEAKER

Thank you. Alor, I'll knock it done. Tax, sa Bill in aprouve par Lasanble.

Nou'n arriv a lafen sa ki nou ti annan lo *Order Paper* pou bomaten. Les mon a

eksplike ki dan *Assembly Business Committee* semenn pase, mon'n ganny enformen ki zot to deside ki zot pou donn letan *Bills Committee* sa peryod la, pou travay lo bann *Bills* ki pe vini.

Alor nou akord zot sa letan. E Lasamble a repran apre midi 2er, me selman mon a notifye *Assembly Business Committee* osi ki nou a fer en *meeting* 1.15 pou nou regard kontinyasyon travay sa semenn. Onorab Pillay ou annan en pwen lo la?

HON SEBASTIEN PILLAY

Mersi Mr Speaker. Mersi pou lenformasyon ki ou'n donn nou, akoz nou ti pe ganny bann mesaz ki ti pe dir nou pou annan bann *meeting*. Me la nou konpran poudir *according to* sa ki *ABC* ti deside semenn pase.

Me selman ki mon ti a kontan met devan ou Mr Speaker, mon kote latab nou vreman konsernen avek lakantite Lalwa ki pe vini e lakantite letan ki nou annan pou nou konsider sa bann Lalwa.

Nou annan 2 Lalwa mazer ki sipoze vin devan nou; nou annan Lalwa Kominikasyon e nou annan Lalwa *Home care Agency*.

Sa 2 Lalwa I an relasyon ek 2 diferan Lazans ki'n deza ganny kree anba Bidze. *Home*

Care Agency parey nou konnen I enportan, akoz son Bidze I signifikan par lefe se li ki pou *manage* tou bann carers from now on.

Mr Chairman nou pa satisfe avek sityasyon ki pe pase la, akoz nou napa letan pou nou regard sa bann Lalwa, nou napa letan pou nou lir sa bann Lalwa. E Lasamble pe ganny demande pou pronons li lo la.

Alors mon a fer en pledwari avek ou, pou demann avek Gouvernman silvouple, silvouple fer nou ganny tou lalwa ki zot oule nou pase akoz pou nou kapab ganny letan pou nou gete! Otherwise Mr Speaker, nou vreman napa letan e I afekte nou *output* lo sa bann Lalwa. Mon remersye ou Mr Speaker.

MR SPEAKER

Mersi. Lo sa pwen I annan serten pwen ki mon anvi leve dan *Assembly Business Committee*, mon ti ava plifere diskrit li avek *Assembly Business Committee* avan, pou nou pran en desizyon avan mon enform Manm an zeneral. Donk-

Onorab Georges?

HON BERNARD GEORGES

Yes Mr Chair, mon ti anvi mon krwar I mon devwar pran laparol antan ki *Leader Zafer Gouvernman*. Mon pa kont

propozisyon Lonorab *Leader Lopozisyon*, me selman mon anvi e mon krwar nou bezwen fer sorti ki *Communications Bill I* avek nou depi sote 1an. Mersi.

MR SPEAKER

Mersi. Bon nou ava pran poz la. Mon a remersye Minis e son delegasyon pou zot partisipasyon ozordi. Mon remersye lezot Manm pou zot kontribisyon. Mon swet Minis ek son tim bonn kontinyasyon dan travay.

Nou a pran poz, nou a rezwenn 2er apre midi.

(BREAK)

MR SPEAKER

Bonn apre midi tou dimoun, bann Manm staff e piblik. Nou travay apre midi konsiste an konsider bann kandida pour apwentman Anbasader.

Alor mannyer nou'n deside prosede, nou pour komans avek Mosyon apre nou ava annan entervansyon antretyen avek bann Anbasader, bann kandida e apre nou ava deba lo bann Mosyon e vot.

Alor pour komanse mon pour demann *Leader Biznes Gouvernman Onorab Georges*, pour prezant Mosyon pour apwentman bann Anbasader. Onorab Georges?

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi tou bann Manm Onorab, tou bann travayer Lasanble e tou bann dimoun ki pe swiv nou dan lakour.

Mr Speaker parey ou'n presize, apre midi nou annan 3 Mosyon lo nou *Order Paper* pour laprobasyon lapwentman propoze par Prezidan Larepublik 3 msye koman Anbasader.

E parey ou'n presize, prosedir ki nou pour swiv, mon ava *move* Mosyon enn par enn, i ava ganny segonde apre mon a fer en Mosyon pour al dan *Committee Stage*.

So avek ou permision Mr Speaker, premye Mosyon lo *Order Paper* i lir koumsa: -

In accordance with Article 63(1) and 64(1) of the Constitution, the National Assembly approves the proposed appointment by the President of the Republic of Mr. Gervais Michel Moumou as Ambassador. Mersi Mr Speaker.

MR SPEAKER

Mersi mon a ganny segonnman pour sa Mosyon silvouple?

HON SANDY ARISSOL

Mersi Mr Speaker. Mon segonn Mosyon propoze par Onorab Georges. Mersi.

MR SPEAKER

Mersi Onorab. Next Mosyon
Onorab Georges?

HON BERNARD GEORGES

Mersi.

MR SPEAKER

Onorab Georges.

HON BERNARD GEORGES

Mersi Mr Speaker. Mr Speaker
dezyenm Mosyon. *In
accordance with Article 63(1)
and 64(1) of the Constitution,
the National Assembly
approves the proposed
appointment by the President
of the Republic of Mr. Kenneth
Jacques Gervais Racombo as
Ambassador.* Mersi.

MR SPEAKER

Mersi Onorab. Mon a ganny
segonnman pour sa Mosyon
silvouple. Okenn Manm ki
segonn sa Mosyon Onorab
Woodcock.

HON WAVEL WOODCOCK

Mosyon seconde Mr Speaker.

MR SPEAKER

Mersi. Onorab Georges
swivan?

HON BERNARD GEORGES

Mersi Mr Speaker, e
Trwazyenm Mosyon;

*In accordance with Article
63(1) and 64(1) of the*

*Constitution, the National
Assembly approves the
proposed appointment by the
President of the Republic of Mr.
Georges Jude Emmanuel
Tirant as Ambassador.* Mersi.

MR SPEAKER

Mersi. Mon a ganny
segonnman pour sa Mosyon,
Onorab Roucou?

HON MICHEL ROUCOU

Bonn apre midi Mr Speaker.
Mosyon i ganny segonde.
Mersi.

MR SPEAKER

Mersi Onorab. Onorab
Georges, ou Mosyon pour pas
dan Staz Komite.

HON BERNARD GEORGES

Mersi Mr Speaker, zis avan
mon move sa Mosyon, mon ti
anvi ki bann dimoun ki pe
swiv i konpran ki sa 3 non, i
dan lord alfabetik. Donk i pa
dan okenn lord presedans ki'n
ganny mansyonnen apre midi.

Mr Speaker mersi. Anba
Order 84 nou Standing Orders
84(1) mon move ki Lasanble i
rezourd pour antre dan staz
Komite Lasanble an antye,
pour kapab permet Lasanble
an annan enteraksyon avek sa
3 kandida ki'n ganny propoze
koman Anbasader Sesel.
Mersi.

MR SPEAKER

Mersi nou a pas dan Staz Lasanble. Wi nou a segonn sa Mosyon, wi?

HON SANDY ARISSOL

Mersi Mr Speaker. Mosyon i ganny segonde.

MR SPEAKER

Mersi nou bezwen aprouv sa Mosyon deswit. Manm ki an faver lev lanmen silvouple? Mersi Manm ki kont?

Lo Mosyon pour pas *Committee Stage* pour konsider enteraksyon avek bann Anbasader, bann kandida - 21 Manm in vot pour, 0 kont, e 6 Manm in *abstain*. Mersi, nou a kapab prezan pas dan Staz Komite. E mon a demann madanm rapporter pour apel Mr Gervais Michel Moumou silvouple.

Bonn apre midi Mr Gervais Michel Moumou. Nou swet ou labyenveni dan Lasanble. Ou isi pour Lasanble konsider propozisyon pour en lapwentman *comme* Anbasader. Nou pou annan premyerman en enteraksyon ek bann Manm, mon pour demann ou pou fer en bref lentrodiksyon personnel lo ou menm.

E apre bann Manm i a kapab poz ou kestyon. Nou pou annan aepre 40minit pour sa peryod la. Mr Moumou.

MR GERVAIS MICHEL MOUMOU

Mersi Mr Chair. Mr Chair *Leader Zafer Gouvernman Lasanble Nasional, Leader Lopozisyon, tou bann Manm Lasanble Nasional e tou dimoun ki pe swiv sa sesyon ozordi, bonn apre midi.*

Ste avek liminite ki mon prezant mwan ozordi devan Lasanble Nasional, apropos mon nominasyon. Mon pour komans dabor par fer enn pti lentrodiksyon mon lekor.

Mon apel Gervais Michel Moumou. Mon annan 40an, mon'n en Sesel. Mon'n grandi dan distrik Anse Aux Pins avek mon frer ek ser anba gidans egzanpler mon paran. E i fer 2an ki mon en zabitant distrik Au Cap kot mon pe reste avek mon *partner*.

Mon'n fer mon letid primer kot lekol Anse Aux Pins Primer, e mon letid segonder kot lekol Pointe Larue Segonder, kot mon ti komans mon *O Levels*. Mon ti konplet mon *O Levels* e fer 2an *A Levels* kot Lekol *Polytechnic*, Anse Royale.

An 2003 mon ti kit Sesel pour pou swiv mon letid dan Ledikasyon Fizik avek Spor, lo nivo Liniversite *Cuba*. A sa moman avek lankourazman, - avek lankourazman paran, mon vizyon ti fikse lo en karyer, en karyer medikal,

avek en vizyon ledikasyon fizik
avek spor.

Mon ti konplet mon letid Cuba an 2008 aze 26an. An retournan Sesel sityasyon ti fer ki mon parkour ti sanz konpletman. Koman mon ti ganny entrodwir avek lemonn la diplomasi. Mon ti zwenn Minister Zafer Etranzer, ver lafen 2008 antan ki zofisye Protokol.

Sa pozisyon ti donn mwan loportinite pour aprann e devlop bann konesans e konpetans de baz la diplomasi. E kalite neseser pour devlop en Diplomat. Sepandan sa letan ki mon ti aprann serten lenportans fer sakrifis personnel kan ti neseser, pour benefis lorganizasyon e pei.

Mon ti osi ganny sans partisip dan bann programm devlopman pour bann zenn - bann zenn Diplomat aletranze. E mon ti osi ganny loportinite pour mwan akonpanny Minis sa letan, kot bann konferans internasyonal e rezyonal.

3an apre mon ti ganny transfer, *State House* dan pozisyon Sef Protokol Prezidansyel. En pozisyon ki mon ti okipe pour pandan 5an. Sa pozisyon ti pouz mwan pour aprofondir mon konesans en pe plis dan Protokol, eksposz mwan avek bann devlopman e aktyalite lo nivo Nasyonal e internasyonal.

Antan ki Sef Protokol, mon ti partisip aktivman dan bann langazman protokoler e laranzman dan bann gran manifestasyon Nasional e diplomatik an etrwat lyezon avek Minister Zafer Etranzer.

Fer lafen 2016, mon ti zwenn Biro Ansyen Prezidan Larepublik kot mon ti okip pozisyon *personal assistant*. E parmi lezot responsabilite ki mon ti annan kot sa biro, prensipalman mon ti annan responsabilite Protokol.

Boner 2019 mon ti graduate ek en *Master* dan *Business Administration* e an Out pandan sa menm lannen, mon ti retourn landrwa kot mon ti komans mon parkour, mon komansman mon karyer diplomatik *Foreign Affairs* setfwasi koman Direkter Protokol.

Mon ti antre avek bi donn gidans e partaz mon konesans dan sa domenn e servi sa pour devlop servis ki Biro Protokol i ofer bann *Dignitaire* lo Vizit Ofisyel Sesel comme parey bann Prezidan, bann Vis-Prezidan, bann Minis, Sekreter Zeneral bann lorganizasyon internasyonal, eksetera.

E osi bann Diplomat lezot pei ki baze Sesel, or ki baze aletranze e bann Zofisye Gouvernman, Seselwa. Le 1 Mars 2021, mon ti asim pozisyon Sef Protokol Leta,

avek responsabilite adisyonnelle *public diplomacy*, ki i en younit responsab pour promot *foreign policy* Sesel. E ki donn vizibilite travay Departman Zafer Etranzer e pei an zeneral. En pozisyon ki mon pe okipe ziska prezan.

Mr Chair mon dekrir mwan koman en dimoun kalm, en dimoun pasyan, toleran ki annan respe pour tou dimoun ki se swa son stati sosyal. Mon en dimoun ki disiplinen, mon travay dir e mon touzour ekoute donn soutyen kan loportinite, ou kan sityasyon i permet.

Sa dimoun ki mon ete ozordi Mr Chair, i gras a mon paran, mon fanmir, mon bann zanmi e vwazen pli pros. Mon bann ansennyan, ensi ki mon bann koleg e konesans dan parkour mon karyer.

Mon en dimoun ki annan lentere dan langaz. Mon apresye kiltir. E diferan form lar ki se swa lapentir, ladans e lanmizik.

Mr Chair sa i rezimen lo mwan e mon parkour profesyonnel. E avan konklir mon ti ava zis kontan sezi sa loportinite pour remersye Minis Zafer Etranzer e Sekreter Prensipal pour konsider mwan pour sa nominasyon. E osi Prezidan Larepublik pour konfyans ki in annan dan mon potansyel pour desarz sa responsabilite.

Mersi Mr Chair e mersi bann Manm Onorab e tou dimoun ki a lekout. Mersi.

MR SPEAKER

Mersi Mr Moumou. Mon pran aprezan envit kestyon bann Manm. Nou annan apepre 35minit pour sa. Lasal i ouver. Onorab Arissol – Sandy?

HON SANDY ARISSOL

Mersi Mr Chair. Bonn apre midi tou Manm Onorab, bonn apre midi spesyalman pour Mr Gervais Michel Moumou. Mr Chair letan nou'n ekout li an relasyon ek son pti antretyen, ki'n fer avek nou - parey in dir en zanfan byen elve, sorti dan en bon fanmir. E se sa ki Sesel, i rode pour reprezent li.

E mon ti a kontan demann Mr Moumou de kestyon an relasyon letan i ti Sef Protokol dan son pozisyon, ou konnen souvandfwa letan nou koman bann Manm Lasanble Nasional, nou ti asiste bann fonksyon. I annan plizyer fwa, bann Manm Lasanble Nasional pa ganny rekonné dan bann fonksyon.

Zot mansyonn Ziz, zot mansyonn Minis, zot mansyonn PS. Me nou koman bann Manm Lasanble Nasional souvandfwa nou tande poudir nou'n ganny kit ater, pa'n ganny mansyonnen e apre dan koridor sakenn i

pase, i sey demann ou en leskiz - ou konnen, soz.

Alor mon ti a kontan demann ou, anvi ki ou ki ti Sef Protokol sa bann letan, e i ti en pe anba ou responsabilite pour asire zisteman, poudir lalis Protokol i sa, i sa, i sa.

Mon ti a kontan demann ou e la prezan mwan mon pour bezwen vote oubyen koz avek mon *Caucus*, pour asire ki Mr Moumou ki bann Protokol sa bann letan, bann prosedir pa ti rekonnnet nou koman bann Manm Lasanble Nasyonal, dan bann fonksyon.

E la mwan mon vwar mwan dan en pozisyon. kot mon pour bezwen montre sipor pour Mr Moumou pour ou vin Lanbasader pour ou al reprezent mwan lo en lot nivo.

Alor mon ti a kontan demann ou ki travay, ki annan ki si zanmen ou, ou ganny aprouve pour vin Lanbasader pour ki sa enn ki reste dan ou plas deryer, li i koriz en pe sa bann fot. Kot Manm Lasanble Nasyonal li osi i ganny retrouve son pozisyon, atraver lalis ki i annan, pour ki tou dimoun i kapab fer son travay byen. Me ou pa ganny bann lezot keksoz.

So ki travay ki annan, si zanmen mon vot ou pou vin Anbasader pour ki sa enn ki ou kit deryer li, i kapab pe fer en travay ekselan an relasyon avek bann Manm Lasanble e

tou bann lezot *dignitaries* dan pei?

Mon dezyenm kestyon. E final Mr Speaker, mon ti a kontan demann ou, eski i annan en travay, kot *Foreign Affairs* ansanm avek Lasanble Nasyonal, pour ki letan bann Manm Lasanble zot vwayaze, zot ganny rekonnnet, oubyen i annan keksoz ki ganny fer atraver bann Lanbasader oubyen bann *Chargé D'affaires* ki zisteman nou vot zot Bidze?

Oubyen la mon pe aprouv ou koman Lanbasader, mon pa konnen ki pei pour ale; pour ki letan bann Manm Lasanble nou ganny vwar sa bann pei, be i annan sa kontak ant nou Biro *Foreign Affairs* ek Lasanble Nasyonal pour ki bann Manm zot ganny bann lasistans neseser ki apropriye koman bann *dignitaries*, oubyen bann Manm Lasanble Nasyonal parey nou dir. Mersi bokou Mr Chair.

MR SPEAKER

Mersi Onorab. Mr4 Moumou ou repons.

MR GERVAIS MICHEL MOUMOU

Mersi Onorab pour ou kestyon. Si mon pran premye kestyon Onorab, mon kapab dir poudir an se moman, menm mwan louvraz ki mon pe fer i ganny gide. E i annan

nou annan en *National Order of Precedence* e ki nou swiv.

Mon konpran ou'n mansyonnen ki i annan lenstans ki petet bann Manm Lasanble Nasyonal, i santi ki menm bann Sekreter Prensipal, ouswa bann Ziz i ganny nonmen e zot, zot pa ganny nonmen.

E mon komanter lo la i ki sa lo sa *National Order of Precedence* definitivman sa ki mon asire, mon pa mazin nimo, ki tyenm. Me solman mon asire ki Manm Lasanble Nasyonal i par lao Ziz, i par lao *Principal Secretaries*.

Si in arive ki dan prezans sa de group dimoun ki mon'n nonmen, bann Manm Lasanble Nasyonal pa'n ganny *acknowledge*, mon zis demann en leskiz pour sa. I kapab a sa moman, ki ti annan sa levennman.

Konsernan louvraz ki pe ganny fer e ki pour donn ou en komitman poudir pour annan en petet en kontinyite pour fer sir, ki Manm Lasanble i ganny *acknowledge* dan bann levennman, Mon kapab dir poudir, louvraz in deza komanse.

Mon krwar poudir bann Manm Lasanble Nasyonal, bann levennman ki pli resan zot pour kapab agree ki in annan mansyon bann Manm Lasanble Nasyonal. E sa i fer ki rezon deryer sa, osi si mon

kapab azoute. Nou ti annan en legzersis, or nou ti pe sey swiv en *pattern* ki nou pa neseserman ler nou, pe *acknowledge* bann dimoun dan en levennman, ki nou *acknowledge* petet bann dimoun ki sorti en pe pli o lo lalis presedans, pour fer ki sa *acknowledgment* i pa long.

Me sa parey mon pe dir i annan travay ki'n ganny fer an se moman, e nou'n fer ki nou'n desann en pe nou *order*, e ki'n desann ziskan kot nivo Manm Lasanble Nasyonal e pli ba osi.

Ou dezyenm kestyon konsernan lyezon ek Lasanble Nasyonal kan bann Manm Lasanble i *travel*. Mon panse ki i en bon keksoz, akoz mon konnen poudir mwan mon travay an etrwat lyezon avek Biro Protokol ki baze isi kot Lasanble Nasyonal.

I annan lenstans ki mon'n vini, mon led in ganny rode pour mwan kapab vini donn en pe *training*, lo Protokol and *etiquette* e lezot keksoz ankor. Me sa i pa'n enn keksoz ki ti lo azanda nou diskisyon, nou konversasyon.

E mon panse ki i ou korek ki ler Manm Lasanble Nasyonal i *travel* i bezwen osi ganny son lankadreman. I bezwen ganny kote i pe ale, i bezwen ganny sa Misyon Diplomatik baze dan sa pei kot i pe ale, i ganny enformen pour fer sir ki son *passage i smooth*.

Mon agree avek ou e mon donn ou komitman ki i annan en louvraz ki pour ganny fer lo la. Mersi Mr Speaker.

MR SPEAKER

Mersi. Mersi Mr Moumou. Onorab Georges.

HON BERNARD GEORGES

Mersi Mr Chair. Mr Chair mon annan mon ti annan en kestyon pour Mr Moumou, me mon ti a kontan ranforsi sa pwen ki Onorab *Chief Whip LDS* Onorab Arissol, fek fer.

E mon ti a kontan demann ek Mr Moumou pour konfirmen, ki pandan letan ki i pour ankor atase avek Minister Zafer Etranzer, avan ki i ganny en *posting*, ki i annan en p plis rekonesans ki ganny donnen avek sertennman bann Manm Lasanble Nasional, pour bann rezon ki in fek fer sorti.

Me osi pour prensipalman de Manm sa lenstitisyon;- enn se Deputy Speaker dan labsans Speaker. Akoz ki malgre ki lo lalis Protokol i pli ba ler Speaker i la, me ler Speaker pa la i devret ranplas Speaker avek tou son loner.

E dezyenmman se *Leader Lopozisyon*. Akoz li i reprezant sa group dimoun ki pa'n elekte Prezidan an legzersis. Alor dan sa de ka, dan dernyen rankont tou sa bann dimoun ti prezan,

nou'n remarke ki ni Deputy Speaker, ni Onorab *Leader Lopozisyon*, pa ti annan sa vizibilite ki zot ti merite dan sa levensmann.

E annefe zot pa ti lo premye laliny devan ansanm avek bann lezot O *Dignitaire tel parey* nou ti ava ekspekte. E mon lapel avek ou se pour ed sak lenstitisyon dan sa pei, pour trouv son vre plas. Pa akoz nou kontan, me akoz nou reprezant serten sekter lasosyete e serten brans Gouvernman ki tre, tre enportan dan en demokrasi.

Mon kestyon pour Mr Moumou se sa enn Mr Speaker. Mr Moumou, ou'n eksplik ou parkour, e ou'n enn sa bann zenn dimoun ki'n kapab vwar sa tranzisyon politik, dan sa pei. Ou'n travay tre pros avek Gouvernman avan.

E ou'n eksplik nou ozordi, *in fact*, *Chef de Cabinet* avec en ansyen Prezidan e apre ou'n fer e la ozordi ou vwar ou lekor anba en novo Gouvernman pe ganny aprouve - nou espere - koman Anbasader ki pour servi anba en Gouvernman ki'n ranplas sa enn ki ou ti pe travay etrwatman avek.

Ki lesion ki ou annan pour donn nou dan sa Lasanble e Lepep Seselwa an zeneral, lo sa leksperyans ki ou ou'n viv sorti dan tre pros

avek en seksyon, pour vin tre pros - nou espere - avek en lot? Ki mannyer en dimoun i devret konport li dan sa sirkonstans san ki ou les ou lopinyon politik personnel enfliyans ou travay koman Diplomat? Mersi Mr Speaker.

MR SPEAKER

Mersi Onorab Georges. Mr Moumou.

MR GERVAIS MICHEL MOUMOU

Mersi Mr Chair. E mersi Onorab pour ou kestyon. Onorab pour mwan petet komanse pour reponn ou kestyon. Parey ou'n dir i vre mwan mon en dimoun ki'n ganny petet byen ankadre, an gradisan par mon fanmir.

E mon osi *acknowledge* lefet ki sa karyer ki mon'n annan dan Protokol, in ed mwan ganny serten kalite, serten bagaz dan konpetans pour kapab vwar keksoz dan en fason obzektif.

E mwan mon en dimoun ki mon grandi pour endik, mon grandi pou vin en dimoun *of principles*. Mon konnen what i want, mon konnen poudir mwan *I'm loyal, when I need to be*. Mon konnen kote mon lentere i ete, mon konnen kote lentere pei i ete, mon konnen kote mon leker i ete. E mon annan en laliny. Mon kapab *draw a laliny*, ase solid

ant lwayote, ant lentere pei, ou lentere mon travay.

So sa i en keksoz ki mon kapab fer, e i pa vin difisil pour mwan. I zis mon *I need to* -, mon'm touzour *focus*, mon'n touzour kit mon lizye *lo good, lo the right thing*. Mersi Onorab.

MR SPEAKER

Mersi. Mersi Mr Moumou. Onorab Vidot.

MR GERVAIS MICHEL MOUMOU

Mersi Mr Speaker.

MR SPEAKER

Onorab Vidot ou kestyon.

HON AUDREY VIDOT

Thank you. Mr Chair. Bonzour. Bonn apre midi Mr Chair. Bonn apre midi Mr Moumou e tou Manm Onorab, e tou dimoun ki a lekout. Mr Moumou a laz 40 an la ou pe ganny nominen pour vin Anbasader.

Mon kestyon i al enn pti pe dan laliny avek pour Onorab Georges. Me selman ou pa'n tro al o profon. Petet mon ti ava demann ou, pour bann zenn ki petet la dan diplomasi. Ki mesaz ki ou ti ava kontan profite pas avek zot, ki menm si ou nominasyon pa ankor ganny aprouve, me ou'n ariv a sa nivo nominasyon, ki mesaz ki ou ti

a kontan pas avek zot dan zot parkour, karyer pour ki zot osi zot ava enspire en zour ganny nominen - pe enport ki Gouvernman ki la, pour zot kapab pran en pozisyon oubyen en responsabilite parey.

E ou'n dir dan ou lentrodiksyon, ki langaz pa en baryer. E nou konnen, nou pa ankor konnen ki pei ou pour ganny atase avek - e eski ou santi pe enport pei ki ou ganny atase, ou konfidan ki langaz i pa pour en problemm menm pour ou, baze lo ou lentrodiksyon ki ou'n fer?

MR SPEAKER

Mersi Onorab. Mr Moumou.

MR GERVAIS MICHEL MOUMOU

Mersi Mr Chair. Mersi Onorab. yes Onorab, wi mon annan 40an. Mon krwar sa laz osi mon konsider mwan ase zenn. E mon'n dir pli boner mwan mon dimoun kalm, pasyan, toleran;- en dimoun ki annan respe pour tou dimoun.

E mon ti anvi souliny sa konmsi touzour annan respe pour bann zenn laba deor, touzour annan respe pour nenport ki;- touzour pare pour ekoute. Ekoute i fer ou aprann, i fer ou grandi, e touzour pare pour ede. *It goes a long way.*

Mwan mon en dimoun ki *believe* parey mon'n dir mon *believe* dan travay dir. E mwan mon panse ki travay dir, i enn bann fason pli onnet ki nenport ki dimoun i kapab progrese dan swa son lavi personnel, ouswa son lavi profesyonnel.

Mwan personnelman mon konnen poudir mon'n touzour - dan tou keksoz ki mon'n fer, mon'n touzour met plis ki 100poursan. Mon'n kapab, dan pozisyon mon'n kapab *lead*. Me selman mon pa'n zanmen ezite pour mwan get my hands dirty pour mwan kapab desann anba avek mon bann staff, pour nou kapab akonplir nou lobzektif.

Be dan en fason ki *you be modest* e fer serten keksoz. E mon krwar sa i ki mon ti ava kontan ki bann zenn, i vwar e zot swiv. Sa *sense of annan prensip, of travay dir, persevere pour ou achieve, what it is that you aspire to achieve.*

E mon krwar sa i lesion ki mon krwar zenn i kapab retire. Sa i ti pou premye kestyon Onorab.

Pour ou dezyenm kestyon, konsernan langaz. Wi parey mon'n dir mon en dimoun ki pasyonnen par langaz. Mon'n kapab ganny loportinite aprann detrwa langaz an plis ler mon ti al, pandan mon letid *Cuba*.

Me selman mon poudir ki rol en Lanbasader Onorab i pou reprezent, i pour protez e ki promot zentere Sesel nenport ki kote ki i ete, en Lanbasader. Langaz i ede wi, me selman mon pa santi poudir, langaz i en baryer.

Nenport ki dimoun i kapab, i kapab dan en pozisyon ki i pa pe kapab koze sa Angle. Me solman i annan fason, komunikasyon ki ou kapab fer serten negosyasyon lo serten, ou en serten korperasyon nenport ki landrwa.

Mon krwar i annan en kantite pour fer avek kalite ki ou posede e ki mannyer ou e *deliver* sa ki ou anvi. Ki mannyer ou *deliver* sa azanda, vin devan. Mersi Onorab. Mersi Mr Chair.

MR SPEAKER

Mersi. Onorab Roucou?

HON MICHEL ROUCOU

Mersi Mr Chair. Bonn apre midi a tous, bonn apre midi Mr Moumou. Mr Chair mwan mon enn parmi bann zenn ki'n ganny sans konn Mr Moumou. Akoz mon'n reste enn pti pe letan mon osi tou Anse Aux Pins. E osi i en garson ki vreman disiplin, lafason ki mwan mon'n konn li - toultan pare pour li konekte avek lemonn otour li.

Mr Chair mwan mon kestyon pour Mr Moumou, se ki mon vwar lo son *CV* se ki in fer son *Bachelor* mon kapab dir dan ledikasyon, fizikal, sport e osi an term lo kote ou kapab dir *sport* li menm li. Mon kestyon pour li se ki nou annan bokou zenn ozordi la, ki zot angaze dan sport.

E si i arive demen, kot i vin en Anbasader, ki kontribisyon i pour anmennen dan nenport ki pei kot i pour ganny poste, pou nou bann zenn isi Sesel, ki zot kapab zot osi ganny sa loportinite. Mersi.

MR SPEAKER

Mersi Onorab. Mr Moumou.

MR GERVAIS MICHEL MOUMOU

Mersi Mr Chair. Mersi Onorab. E mersi pour bann bon komanter lo mon konportman, lo fason ki mon ete koman endividé.

Onorab i vre wi mon'n fer 5an *Cuba* dan *Physical Education ek Sports*. E mon panse ki mwan, koman si avek zot volonte si mon arive apwente koman Lanbasader, i annan en kantite keksoz ki mon kapab fer pour bann zenn.

Mon santi ki zenn i *the leadership of tomorrow*, e zot bezwen ganny byen ankadre, ganny byen proteze. I touzour annan loportinite pour bann

zenn mon krwar. Me selman i *just a matter of how to reach out and grab it.*

E i annan lenstans parey nou konnen ki i annan zenn, ki vre *they are very focus and guided* par kontenan bann lezot zenn ki pour bezwen en pe plis lankadreman, en pe plis sipor. Espesyalman la parey ou konnen nou annan sa, *the drug issues* dan lakominote.

E mwan mon panse, koman en Lanbasader, sa *drug issue* ki mon'n mansyonnen, mon pran li en pe aker, akoz mon krwar bokou dan potansyel lazenes.

E en keksoz ki pandan mon parkour, dan diplomasi, i en topik ki mon'n, mon santi mon'n asosye mwan avek i *maritime security*. Mon konnen ler ou ekout li i santi i donn lenpresyon ki i *very far from* pour protez lazenes.

Me selman ki mwan mon'n vwar osi ki i annan en kantite sa bann *drug trafficking* i arive dan lanmer. E nou, nou annan en *EEZ* ki ase *vast* e ki bezwen ganny proteze.

E sa *drug trafficking* ki la nou'n vwar ki i pe *lead to even human trafficking*, e i pe fer ki i pe ariv kot nou. I pe ariv lo later. E ler i ariv lo later i pe andomaz sa group zenn, ki la.

Me pour mwan, enn;- i pour kontinyen lager e pour

pous lazanda Pti Leta Zil an sa ki konsern *maritime security*. Pour fer ki nou kapab protez nou *area* byen menm, ki pour fer ki pou kapab rod fason pour *mitigate*. Si nou pa kapab eliminé me selman redwir sa lefe ki sa fleo drog i annan lo nou zenn.

Akoz i sa ki pour determinen *if we have a bright future or not*. Si nou kapab kontrol sa, *then* nou konnen nou pou donn loportinite sa bann zenn pour zot kapab epanouir.

E naturelman antan ki Anbasader, atraver bann dyalog, atraver bann langazman ki mon pour kapab annan - avek bann lezot *partners* swa bilateral, miltilateral ouswa bann *partners* prive.

E ki pour fer ki i annan, ki kapab annan en dyalog ant bann Lotorite lazenes isi avek bann *why not* avek Lotorite lazenes dan nenport lezot pei, ki pare pour kolabore e pour fer ki pour met a laporte bann zenn bann diferan loportinite.

E an plis i annan bann posibilite, par egzanp *exchange programs*. E mon panse pour mwan, mon krwar fortman dan *exchange programs*, akoz i donn loportinite sa zenn, pour li vwar ki mannyer bann lezot zenn pe viv dan en lot pei. E zot, zot aprann.

E mon krwar sa i pou devlop zot valer. E i annan en kantite Onorab ki mon panse mon kapab fer. E sa i zis en rezimen. Mersi.

MR SPEAKER

Mersi Mr Moumou. Onorab Cosgrow?

HON WALLACE COSGROW

Mersi Mr Speaker. Bonn apre midi tou dimoun, bonn apre midi Mr Moumou. Mr Chair mon'n vreman fer konesans Mr Moumou ant 2015.

E mon krwar ziska aprezan nou'n konn kanmarad pour en bon pe letan. Mon pour ateste ki Mr Moumou *is a real gentleman*, e touzour devoue travay dir e touzour montre sa determinasyon dan son travay, dan sa ki i fer. Annefe sa ki mwan mon'n vvar, mon'n kapab obzerve.

Mon kestyon pour Mr Moumou i se ki ou'n dan diplomasi en pe letan. Me la avek ou apwentman ki si i arrive, Lasanble i apwent ou koman en Lanbasader, ou pou sorti en *step*, ou pour mont en *step* enn pti pe pli o dan la diplomasi. So eski ou santi ki poudir, ou'n pare pour sa, pour sa novo *step* ki ou pou pran?

E eski ou santi ki poudir la diplomasi Sesel ozordi - *bear in mind* - ki i annan en

kantite ki'n ganny fer dan lepase, pour fer Sesel vin pli vizib, diplomatikman aletranzé.

Ou santi ki i annan lezot potansyel ankor pou Sesel benefisyé atraver la diplomasi ek bann diferan pei lemonn ki ozordi Sesel i zanmi avek. E ki Sesel i form parti bann diferan kominote. So eski ou santi potansyel pour Sesel benefisyé ankor plis avek la diplomasi? Mersi.

MR SPEAKER

Mersi Onorab. Mr Moumou.

MR GERVAIS MICHEL MOUMOU

Ok mersi Mr Chair. Mersi Onorab. I vre Onorab ki nou'n fer en parkour ansanm ki mon'n arrive konn ou. Nou'n travay ansanm pour en peryod letan. E mon remersye ou pour keksoz ki mon'n kapab aprann avek ou, petet i kontribisyón, ou'n kontribyé osi pour fer ki mon la ozordi.

Pour reponn ou kestyon Onorab. Onorab si ou pa *mind zis* dir mwan sa premye kestyon. Sa premye.

HON WALLACE COSGROW

Yes Mr Chair vitman. Premye kestyon i se ki eski ou santi ou a sa moman la pare pour mont dan sa lot letap koman en Diplomat, koman en Anbasader? Mersi.

MR SPEAKER

Mersi. Mr Moumou.

MR GERVAIS MICHEL**MOUMOU**

Ok, mersi Onorab. Onorab mon pou dir ki mon santi mwan pare. Mon pou dir pare akoz - parey mon'n mansyonnen pli boner - pour mwan pour ou vin en Anbasader i vre, ki i esansyel ki ou annan gran *knowledge* dan *current affairs* - ki ou annan *knowledge* dan *geo geopolitics*. I esansyel pour sa louvraz.

Me selman keksoz de-baz mon krwar e mon *believe* fortman ladan i pou bezwen annan sa karakter, sa personnalite, ou bezwen annan sa kalite. E ou bezwen en dimoun ki konnen konsyan *the back of your mind* ki *you are going to be serving the people, serving the country* e ki ou pare pour fer sa.

E mwan mon poudir pour ki sa parkour ki mon'n fer dan Protokol - e parey mon krwar nou konnen poudir Protokol i labaz diplomasi. Sa karyer enn pti pe plis ki 10an, in kapab ed mwan ranforsi en pe sa bann kalite, sa bann valer. E naturelman parey zot konnen poudir Protokol i touzour *humble*, rod en fason pour an servis touzour.

E sa mon panse ki'n ed mwan santi mwan confortab, ed mwan santi mwan konfidan, ki mon pour kapab fer fas avek nenport ki *challenge* ki annan. Akoz parey mon'n dir mon en dimoun ki determinen e ki *focus* e ki krwar dan travay dir. Sa i pour premye kestyon Onorab.

Pour ou dezyenm kestyon lo potansyel plis devlopman. Mwan personnelman, mon krwar poudir potansyel i touzour la, dan - menm dan lavi toulezour, nou devlop zanmi toulezour, i zis ki mannyer ou fer li, ki lapros ki ou fer.

E ler ou kree lanmitye dan diplomasi, i la ki ou vvar poudir i annan potansyel pour plis devlopman, pour plis korperasyon. Mon panse poudir wi i annan. Nou bezwen zis *tap into* sa bann possibilities. Mersi Onorab.

MR SPEAKER

Mersi Mr Moumou. Onorab Henrie.

HON GERVAIS HENRIE

Mersi Mr Chair. Bonn apre midi tou dimoun. Mr Moumou *welcome to the National Assembly*.

Mon annan de pti kestyon tre senp. Premyerman ki ou pli gro ouswa pli gran febles? Mon dezyenm kestyon

ki mannyer ou *deal* avek, ouswa ou fer fas avek en kriz? Mersi.

MR SPEAKER

Mersi Mr Moumou.

MR GERVAIS MICHEL MOUMOU

Mersi Mr Chair. Mersi Onorab. I pou enn pti pe drol pour sa larepons ki mon pour donnent. Me selman i en keksoz ki i vre e ki ganny konstate, mon ganny *constantly reminded*, kot mwan e nenport ki landrwa, mon ganny dir ki i mon en *workaholic*.

Mon pour pran sa koman en pwen for, wi. Me selman i annan i vin avek son febles osi tou. Mon *workaholic* akoz mon vreman travay dir e mon touzour pouse. Mon anmenn travay dan lakour, mon - petet i vin enn pti gin mon lavi personnel.

E sa bout mon poudir i mon febles, akoz mon *allow* ki mon lavi profesyonnel i mont lo mon lavi personnel. Si ou pou demann mwan, mon poudir sa i mon febles.

Lo kote *deal with crisis*. Ok. Wi Onorab parey mon'n dir pli boner, par natir mon kalm mwan, *this is the way i am*. E dan Protokol i annan en kantite - mon pou apel li kriz. I annan en kantite keksoz ki arive ki ou pe bezwen tenny dife, tou lazournen.

Ou *deal* avek diferan kalite dimoun e keksoz ki ou pa'n ni ekspekte i kapab arive, e ou pour bezwen rod fason pour ou *deal* avek.

Me mon'n touzour fer li dan en fason *composed*, kalm, akoz mon'n touzour panse ki si mon pran en *step back from* en sityasyon ki ase eksplozif mon pour ganny en pli bon perspektiv ler mon pran sa *step back*, pour mwan kapab analize dan en fason *analytical*, pour mwan kapab pran bann desizyon.

E sa i permet mwan kapab retournen e atak sa sityasyon dan en fason byen. Dan en fason ki mon'n byen enformen. Mersi Onorab.

MR SPEAKER

Mersi Mr Moumou. Onorab Pillay.

HON SEBASTIEN PILLAY

Mersi Mr Chairman e bonn apre midi tou dimoun ki pe ekout nou ki pe swiv nou. Bonn apre midi tou koleg Onorab. Bonn apre midi Mr Moumou e byenveni dan Lasanble Nasyonal.

Premyerman les mwan lo lapar mwan menm, mwan fanmir e byensir mon bann koleg felisit ou lo ou nominasyon. Mon krwar ler mon'n ekout ou lentrodiksyon, ou parkour kot ou sorti. Mon konn ou, enn pti pe, mon'n

deza travay akote ou ti ankor bokou pli *junior* ki mwan.

Me mon'n konn ou koman en dimoun tre *humble*, toulstan pare pour ekoute. Mon krwar i ler mon vvar ou, ou'n sorti dan *Foreign Affairs*, e ou'n pas atraver sa bann diferan nivo ou'n ariv la, mon krwar i en sours lakonplisman enportan pour ou fanmir e pour ou paran e pour ou bann ser, ou bann dimoun dan ou fanmir.

E mon krwar tou dimoun ozordi i probableman devan televizyon pe get ou, e zot annan en gran sans lafyerte pour zot osi mon dir zot felisitasyon.

Mon kestyon pour ou, mon vvar dan ou parkour kot ou parkour in en parkour bokou plito protokoler. E ou'n probableman en dimoun ki'n devlop en konpetans e en *knowledge*, ou'n ganny detrwa kestyon o komansman, lo la. Petet mon ava de kestyon pour ou;

Premye kestyon ki mon annan pour ou se, ou konnen sa *etiquette* souvandfwa ou rankontre li a enserten nivo. Petet eski ou personnelman, ou krwar sa i en keksoz ki devret ganny anmennen pli ba? Ziska menm depi komansman bann dan bann lekol segonder?

Nou komans fer bann zenn komans anvi pran en

karyer dan diplomasi. Eksplik zot kwa en karyer dan diplomasi.

Kwa ki ou kapab fer *basically* koman en, kwa ki ou kapab fer, ki ou pou sey fer, koman en dimoun ki'n pas atraver diferan letap dan ou karyer pour ou ankouraz lezot, lezot zenn dimoun ki pe enport ou *background* kote ou sorti, Kot ou ti komanse.

Me ou kapab achieve en kantite si ou montre serten dilizans e ou travay dir.

Dezyenmman, mon dezyenm kestyon, Mr Chairman. Mon kontan ler ou'n dir poudir *there's no substitute for hard work*. Nou tou ki'n ariv kot nou'n arrive ozordi, nou bezwen travay dir pour nou ariv laba, e pour nou reste kot nou'n arrive oubyen pour al pli devan dan nou lavi.

Kwa ki ou poudir i enn ou bann, ou bann forte, en keksoz ki ou santi ou for ladan? Ki ou santi poudir sa ler ou pe koz Gervais, ok sa i ki ou vvar, sa ki ou pou gannyen?

Kwa ki ou santi sa i ou pwen for konmsi. Mon pa pou fokaliz lo ou febles, mon pour plito ranforsi bann keksoz ki ou pli for ladan. Mersi Mr Speaker.

MR SPEAKER

Mersi Onorab. Mr Moumou.

MR GERVAIS MICHEL
MOUMOU

Mersi Mr Speaker. Mersi Onorab. Onorab mon remersye ou pour sa bann mo ankourazman e *it means a lot*. I vre nou'n travay ansanm. E a en pwen *you were my supervisor* si ou mazin byen. So mon remersi ou pour *the person* ki mon'n vini ozordi osi.

Pour ou premye kestyon Onorab, ler ou ti demann mwan sa kestyon mon ti souriye akoz mon ti santi ki ou ti pe *gage* menm keksoz ki mon'n touzour aspire pour fer.

E mon pour dir mon'n touzour aspire e pour ki i *work in progress*. Aktyelman nou ti sipoze fini pe fer li *during* dan letan Zen, ki nou'n pa'n kapab fer li.

Akoz mon osi mon'n santi ki Protokol *and etiquette* i sipoze vin *part and parcel of* - i fason viv, i fason fer li menm. E mon panse ki si i komans zenn, i pou fasil an grandisan. I pa pour bezwen annan en dimoun ki dan Protokol, ki pour ki prezan pe montre Protokol *etiquette* bann profesyonnel.

Akoz zot pou fini annan labaz, depi dan lekol, e parey mon'n dir sa in komanse, *hopefully* nou pou kapab met li an aplikasyon koman boner lannen prosenn. So i *target group* i *the schools*.

Lo kote mon forte Onorab, mwan mon vwar poudir mon en *good listener*, mon krwar mon en *very good listener* aktyelman. Akoz mon santi poudir i annan en kantite dimoun ki vin - otomatikman zot vin ver mwan e mon kapab ekoute, *well ekoute* e donn konsey.

E sa i mon krwar *even* mon bann dimoun ki mon travay pros avek. E zot touzour santi, ki mon en dimoun ki abordab en mon dimoun ki pour zis, i pour fran e pour kapab gid zot dan nenport ki sityasyon ki zot in vwar zot lekor ladan pour sorti, ouswa pour zot amelyor sa sityasyon ki zot vwar zot lekor ladan.

E en lot pti keksoz, mon sans lorganizasyon. I plis selman dan travay, akoz dan lakour mon tro, tro- Solman mon sans lorganizasyon dan travay mon enn pti pe *meticulous*. Mon kontan keksoz i drwat e i ganny fer *the way it's supposed to be done*.

So sa mon panse poudir mon forte. Mon kontan vwar ki mon annan mon bann *staff* ki pe travay avek mwan ozordi ki zot pe *grab* sa bann pti keksoz akoz mon vwar ki *they are the future of protocol*. Mersi Onorab.

MR SPEAKER

Mersi Mr Moumou. Bon mon pour termin entervansyon pour Mr Moumou la. Mon espere ki atraver sa detrwa kestyon ki bann Manm i kapab poz, zot repons ki zot in ganny sans ziz son karakter son tanperaman e son abilite pour sa travay. Mon a remersye li e mon a swet li orevwar e bonn kontinyasyon. Mersi Mr Moumou.

MR GERVAIS MICHEL MOUMOU

Mersi Mr Chair. Mersi bann Manm Onorab. Ti en plezir pour avek zot ozordi apre midi. Mersi.

MR SPEAKER

Mersi. Nou a pran enn pti poz *sanitizing* antretan ki madanm rapporter i apel lot kandida e sa se Mr Kenneth Racombo.

(technical break)

MR SPEAKER

Bonzour Mr Racombo e byenveni dan Lasanble pour l'entervansyon avek bann Manm pour konsiderasyon, propozisyon pour en apwentman koman Anbasader.

Mon pour envit ou fer enn pti l'entrevues bref vitman, lo personnelman lo ou menm, avan ki bann Manm i kapab poz ou kestyon. Mr Racombo.

MR KENNETH RACOMBO

Bonn apre midi Mr Chair. Bonn apre midi *Leader Government Business*, bonn apre midi *Leader Lopozisyon*, Tou Manm Lasanble, bonn apre midi.

Mon apel Kenneth Jacques Gervais Racombo, mon pa'n marye, mon napa zanfan. Mon annan 3 ser, 2 i anba mon responsabilite. Mon reste Perseverance.

Mon'n fer mon Lekol Primer Pointe Larue, mon Lekol Segonder Anse Boileau. Mon'n fer mwan 3 A *Levels* dan *Geography, Maths* avek *Economics*.

Vi ki mon ti anvi persi en kayer dan *Economics*, mon'n al liniversite kot mon'n *study* en *BSc in Economics*. Ler mon'n retournen mon ganny apwente koman *economist* dan Minister Zafer Etranzer - sa lepok ti Minister Zafer Etranzer avek Lanvironnman.

Mon'n komans koman *economist*, mon'n vin *Senior Economist* epi mon'n vin *Principal Economist*. Sa bann letan ler mon ti *join*, nou ti pe *deal* avek bann *International Financing Organizations*.

E ti en letan kot nou ti pe ede pour redres lekonomi. Akoz sa bann letan nou pei ti en pe andete avek sa bann *international financing organizations*.

An 2008, mon ti al baze Sidafrik dan Lanbasad koman *First Secretary*, ki mon'n fer ziskan 2011. Pandan sa letan ki mon ti laba, mon'n osi fer mon premye *Master*. Mon'n fer en *Master in Strategic Management*.

Apre mon ti ganny demande pour mwan vin *Head the International Economic Affairs Division*, dan Minister Zafer Etranzer e sa ti an 2011. E an 2012, mon ti ganny promote pour vin Direkter Zeneral e sa divizyon ti sanze ti apel Devlopman avek Lentegrasyon Rezyonal.

E osi son responsabilite adisyonnell, ti annan pou fer avek *Devise* en *National Development Plan* pour Sesel. Me 2017 mon ti al travay *SADC Tourism Office* koman *The Head for Human for Resource Mobilization and Development*.

Me apre enn pti letan mon ti ganny apwente koman *the Acting Chief Executive Officer* - en parkour ki mon ti fer ziska Novanm 2018.

Apre mon ti ganny ofer *PS Blue Economy*. An Fevriye 2019, ki mon pe fer ziskan prezan. Mersi.

MR SPEAKER

Mersi Mr Racombo. Mon a envit kestyion bann Manm, nou a komans ek Onorab Gill.

HON CHURCHILL GILL

Mersi Mr Chair. Bonn apre midi Mr Racombo. Mon premye kestyion, pour benefis tou lodyans ki pe ekout deliberasyon *nominee* ozordi, eski ou kapab dir nou Lasanble, ki bann *major achievement* signifikan, dan ou karyer koman en zenn, ki'n kontribye pour ou ganny nominen, pour en tel pos? Sa i mon premye kestyion.

Mon dezyenm kestyion, ler mon'n get ou CV, e ou parkour i kler ki ou kapab ganny poste si ou ganny aprouve ozordi plizyer landrwa kot nou annan lyen Lanbasad.

Vi ki ou dan post *PS Blue Economy*, eski ou pour dan en pozisyon, pour re-negosye Lakor Lapes ki Sesel i annan avek Linyon Eropeen, pour en rezulta pli favorab ki i ete ozordi, ler ki i *due* pour negosye? Mersi Speaker.

MR SPEAKER

Mersi Onorab. Mr Racombo.

MR KENNETH RACOMBO

Mersi Onorab pour ou kestyion. Onorab ou'n demann mwan bann sikse signifikan. Mon ava fer referans lo 3. Premyerman sa lannen, nou ti finaliz, mon ti *lead* en tim ki ti finaliz etablisman nou bann *maritime zones*. Nou annan 4 *maritime zones*, nou'n *Gazette* li.

E sa i fer ki Sesel la prezan i annan *rights* dan sa bann diferan *maritime zones legally*. Premye.

Dezyenmman mon ti dan en tim ki ti al negosye *Economic Partnership Agreement* avek Linyon Eropeen. Epi apre sa mon ti *lead* sa tim, ki ti pou al negosye en sipor finansyel, pour asiste avek lenplimantasyon sa Lagreman. Kot parey ou konnen i fer nou ganny *favorable terms of trade* avek Linyon Eropeen. E nou ti kapab negosye e ganny en fasilite €10milyon.

Trwazyenmman mon ti dan sa lekip avek Minis sa letan e Anbasader sa letan, pour re-negosye nou *entry into SADC*. Sa ti fen term peryod 2006 pou 2008. E osi *following that*, mon ti al avek sa Anbasader pour nou ouver nou *High Commission in Pretoria*, set li up e reetablir bann Korperasyon ki nou annan ek SADC. Sa premye.

Onorab 2enm ler ou ganny apwente Anbasader, mon krwar ou kapab dan nenport ki ziridiksyon ki Prezidan or Minis i assign mwan. Me selman parey ou konnen tou Lagreman ki Sesel i sinyen avek en *external parties* i annan en letap ladan or a year, ki i en *year* ki ou bezwen *review* sa Lagreman.

E pli ou *review* sa Lagreman i devret ganny *spearhead by* sa sekter, koman sa departman respektif. Me vi ki mon dan *Minister Fisheries* avek *Blue Economy* - wi i en Lagreman 6an. Annefe son *year review* i 2023.

E si mon ganny plase dan sa ziridiksyon - *meaning* dan sa ka i *Brussel* - mon krwar mon pour dan en pozisyon, vi ki mon *privy* en pe bann detay sa Lagreman e son bann *challenge*.

So mon pour dan en pozisyon ase confortab, pour kapab pou bann linisyativ ki kapab fer li vin pli favorab an benefis nou pei Sesel. Mersi.

MR SPEAKER

Mersi. Onorab Esparon.

HON REGINA ESPARON

Mersi Mr Speaker. Bonn apre midi *PS Racombo*. Parey ou'n dir ou ti en *First Secretary* ki ti ganny plase *Pretoria*. E pli tar ou'n al travay avek *SADC Tourism* kot ler nou le ki *Pan African Parliament* ti vin Sidafrik. Nou ti zwenn ou laba. Nou'n ganny sans rankontre ou. E nou'n vwar ki mannyer ou debourye.

Eski ou krwar sa *exposure*, i ed ou pour *build* sa *self-confidence* e sa profesyonnalizm pour ou

kapab deservi ou pei koman en Anbasader?

Eski ou pare pour deservi dan nenport ki Lanbasad ou ganny plase e koman en Anbasader? Eski ou krwar ou pour kapab delivre parey dan nenport ki pei? Mersi.

MR SPEAKER

Mersi Onorab. Mr Racombo?

MR KENNETH RACOMBO

Onorab mersi pour ou kestyon dabor. Ti en plezir pour mwan - i toultan fer plezir letan ou annan Seselwa ki vizite pour *attain to them*. Ti en plezir. Mon parkour dan SADC *Tourism Office* i ti fer mwan - vi ki ou konnen mon napa en *background* dan *tourism* - me selman mon ti ansarz *resource mobilization* depi enn pti moman apre mon ti vin, *the Acting Chief Executive Officer*.

Ler ou pe diriz en lorganizasyon rezyonal, i fer ou kapab, i met ou dan en pozisyon kot ou bezwen *deal* avek diferan spesifisite, diferan pei.

Ou pe *head* en lorganizasyon *tourism* ki 14 *member states*. Ki zot annan zot *particular need*, so i devlop en sense - konmsi i *build up* ou *management skills*, at en lot nivo.

Pour ou dezyenm kestyon, ler ou ganny apwente Anbasader ou bezwen pare

pour servi ziridiksyon ki Minis i *allocate* avek ou. E mon santi mwan *very* konfidan, dan nenport ziridiksyon ki zot met mwan, pour mwan kapab deservi. Mersi Onorab.

MR SPEAKER

Mersi Mr Racombo. Eski Onorab Labrosse in lev lanmen? Wi ok mon a donn ou laparol.

HON RICHARD LABROSSE

Mersi Mr Speaker. Dabor mon ti a kontan felisit Mr Racombo pour son nominasyon. Mr Speaker mon'n revwar en pe lo son CV, sirtou lo kote lentegrasyon rezyonal, eski Mr Racombo si ou kapab, dir nou eski sa i ankor relevan pour Sesel ozordi?

MR SPEAKER

Thank you, Onorab. Mr Racombo.

MR KENNETH RACOMBO

Mersi Onorab pour ou kestyon. Wi mon parkour mon'n *deal* en pe, en bon pe avek lentegrasyon rezyonal. I annan serten faktor Onorab ki fer en pei pour deside pour reste dan en *regional grouping*.

Ou pour dakor ek mwan parfwa ler ou dan en group, ou annan plis lafors pour ou kapab reflekte ou bann pozisyon, epi even ler ou mobiliz resours - konmela i

annan en tandans pour bann *International Cooperating Partners* pour donn plis fon dan en *grouping rather than dan en pei bilaterally*.

Sa tandans pe sanze. Me *as long as ki ou cost i weigh less* ki ou benefis ki ou gannyen, *being number of sa grouping*. Wi i still relevans. E osi *as long as ki ou lentere i align avek sa grouping* ki ou ladan, wi i relevans.

E parey ou konnen nou *still member of SADC, COMESA, IOC* pe *converge into en regionally economic communities*. E mon krwar i pour *wise* pour pei reste, dan sa trwa *grouping* ki nou ladan. Mersi.

MR SPEAKER

Mersi Mr Racombo Onorab Henrie.

HON GERVAIS HENRIE

Mersi Mr Chair. Bonn apre midi ankor enn fwa tou dimoun e *welcome* Mr Racombo dan Lasanble Nasyonal.

Mon premye kestyon, ki mannyer nou konvenk en zabitan Mont Buxton, Dan Lenn, Mont Signal, Crève Coeur, ki la diplomasi i enportan e ki i fer sans ki pei i investir dan en prezans diplomatik aletranze?

I mon premye kestyon. E mon dezyenm kestyon. Kot ou vwar ou dan 5an? Mersi.

MR SPEAKER

Mersi Onorab. Mr Racombo.

MR KENNETH RACOMBO

Onorab mersi pour ou kestyon. Onorab vi ki mwan mon annan en *background economics*. Mon pour tant poudir ou ler ou annan en prezans a leksteryer, i met ou dan en pozisyon pli avantaze pour ou kapab mobiliz resours.

E nenport resours ki ou mobilize, ki annan en *ripple effect* lo devlopman ekonomik ou pei, mon krwar, i annan en *spillover effect* lo tou dimoun dan sa pei. Si ou pa *mind* Onorab, ou kapab repet ou dezyenm kestyon?

HON GERVAIS HENRIE

Mon dezyenm kestyon sete kot ou vwar ou, dan ou progresyon ou karyer dan 5an? Mersi.

MR SPEAKER

Mersi. Mr Racombo.

MR KENNETH RACOMBO

Onorab mon en dimoun ki patriyotik, mon kontan mon pei. Mon kontan mon pei en kantite annefe. E ti enn bann rezon akoz mon ti aksepte pour retournen pour vin *PS Blue Economy*.

So dan 5an mon ti a kontan, *still* lo en platform diplomasi si zot aprouv mon nominasyon. E pe defann lentere mon pei avan tou. Mersi.

MR SPEAKER

Mersi. Onorab Sandy Arissol?

HON SANDY ARISSOL

Mersi Mr Chair. Bonn apre midi Mr Racombo. I annan en keksoz mon remarke avek Mr Racombo Mr Speaker. I pa en dimoun ki riy byen, byen. Byen rar i annan en sourir lo son figir enn pti parey mwan menm. So mwan i *ok*, mwan mon gard.

So ou pe al reprezant nou lo en nivo enternasyonal, so eski detanzaot ennler ou fer enn pti *smile*, ou riy enn pti git? Mon premye kestyon.

Mon dezyenm kestyon ki mon ti a kontan demann Mr Racombo, an vi koman *PS Blue Economy* e atraver ou bann travayer, mon tann keksoz pozitiv lo ou laba.

E mon aprann ou devlop zot en kantite, i annan ki ou'n ankouraz zot, ou'n met zot lo serten nivo. Me la anvi ki si zanmen Lasamble Nasyonal, i vote pour vin Anbasader otomatikman, i pour annan en pert deza, kot *Blue Economy*.

So kestyon ki mon ti a kontan demann ou, eski i annan travay ki'n ganny fer

parmi ou bann *staff* anndan, pour ki si zanmen en zour Mr Racombo parey i dir i ti kontan son pei ti ganny ofer en lot plas travay avek en lorganizasyon enternasyonal.

Eski i annan en travay ki'n ganny fer zisteman anndan avek bann *staff*, pour ki sa pos i vin *vacant* pour ki enn ant zot i ganny sa promosyon?

Annefe mon kestyon mon anvi demann ou, eski ou ti a kontan enn ou bann *staff* anndan, letan ou sorti pou pran en lot responsabilite pour pei, eski ou ti a kontan enn ou bann *staff* anndan ki ganny sa promosyon koman PS Lekonomi Ble?

Ouswa en dimoun *from nowhere* nek i vini nou vvar li, i revin zwenn bann *staff*, rekomans *back to square one* e en lot latmosfer i kontinyen. Mersi bokou Mr Speaker.

MR SPEAKER

Mersi Onorab. Mr Racombo?

MR KENNETH RACOMBO

Onorab pour ou premye kestyon kekfwa i enn pti pe *unfortunate* ou pa zwenn mwan dan bann lokazyon ki mon sourir bokou. Me mon en dimoun ki ase souvan mon an souriyan, *trust me with that*.

Dezyenmman Onorab i annan en *practice* dan *management*, kot ler sa

dimoun ki lo latet par la, ou pour bezwen tou kou kree, en striktir pour fer li marse. E bokou fwa, koman *PS* mon'n absante. Mon'n dan konze, oubyen mon'n al *overseas*.

Fonksyon departman in tou kou marse. Annefe *as* en *PS* ou bezwen get sa bout teknikal e sa bout *management* osi. E mon'n fer sir ki ler mon ti'n *join PS* depi Fevriye 2019, sa i en keksoz ki ou met an plas.

E Onorab mon pe *confirm* ek ou, mon annan en tim dinamik, en tim byen zenn. Nou'n asize ansanm nou'n devlop en plan pour *Blue Economy*, ki vin avek *son action plan*, ki vin i annan son stratezi. E i annan son fason pour nou *monitor and evaluate* li.

So Onorab sa tim dinamik, nenport ler ki mon absante, oubyen si zot aprouv mon nominasyon mon pa pour *around*. Zot pare pour zot *take onboard*. E wi mon preferans si mon ti annan *say ladan*, i sipoze enn en *staff* ki la, akoz osi zot in pran par dan sa devlopman dan sa Sekter Lekonomi Ble ansanm.

E Onorab i osi enportan note ki ler mon ti vin *PS Blue Economy* sa tim ki ti la, *most of them* zot ankor la, so zot kalifye pour zot *move forward* dan en sirkonstans ki mon pa la. Mersi bokou.

MR SPEAKER

Mersi. Onorab Georges.

HON BERNARD GEORGES

Mersi Mr Chair. Mr Chair mon ti a kontan adres Mr Racombo dan lafason swivan; Mr Racombo nou konn kanmarad. Nou pa bezwen al dan detay.

Me mon'n toulstan konpran e ou toulstan admet avek mwan ki ou lanmour se la diplomasi *Foreign Affairs* e ou kontan ganny poste dan bann pei etranze.

E sa i en keksoz toutafe normal e ki nou pa devret pa pe aksepte. Etandonnen ou lanmour pour *Foreign Affairs*, mon ava demann ou en premye kestyon, ki baze lo la, si demen ou'n koz lo *regional integration*, ou'n koz lo *SADC*, *COMESA* eksetera, si demen mon ti Prezidan Larepublik, ki vre *semblablement* mon pa pou - me si mon ti vin kot ou e mon ti dir ou Mr Racombo, ou Anbasader Racombo si ou'n ganny aprouve - nou pa kapab reste dan tou lede *SADC* avek *COMESA*, nou bezwen swazir ant enn ek lot. *SADC* i fer en kantite keksoz otour, an plis ki *trade*, *COMESA* i plito *focus* lo *trade*, nou bezwen swazir ant enn ek lot.

Lekel ki ou ti pou *advice* mwan pour kite, lekel ki ou ti pour *advise* mwan pour reste

ladan? Oubyen eski i annan en trwazyenm opsyon ki ou ti ava ofer mwan? Sa ti mon premye kestyon.

Mon dezyenm kestyon i al dan menm direksyon avek kestyon ki mon'n demann avek Mr Moumou.

E sa se ki ou kon tre byen ou defen ou papa, Mr Finley Racombo ti en Manm Komite Santral en parti politik. E osi enn ou bann tonton, enn son bann frer Mr Max Racombo in ganny li, in pas atraver bann problemm politik akoz i ti siport en lot tandans.

Donk ou'n grandi dan en latmosfer parey bokou dimoun isi Sesel, ki ti annan sa tansyon politik. E ladan ou'n travay anba en Gouvernman e la ou pe ganny nominen pour vin en Anbasader par en lot Gouvernman.

Ki mesaz ki ou annan pour nou pep, pour viv sa bann diferans ek sa bann sanzman ,dan en fason ki pa pour negativ, me ki pou fer nou grandi koman en pep? Mersi Mr Speaker.

MR SPEAKER

Mersi Onorab. Mr Racombo.

MR KENNETH RACOMBO

Onorab mersi pour ou kestyon. De kestyon tre enteresan. SADC oubyen COMESA. Onorab tou kou mon krwar desizyon, i bezwen

ganny fer avek en *very thorough analysis*. Mon deza fer sa legzersis annefe dan mon *thesis* an 2017. E konklizyon sete nou reste dan SADC, akoz i *more of a development organization*.

Me parey mon'n reponn, avan, dan *any* lorganizasyon *as long* ki ou benefis, i bokou plis ki ou *cost* epi pe anmenn devlopman ekonomik, devlopman sosyal, i pe ede pour gard stabilité dan ou pei. E mwan mon pour ankouraz pour reste dan sa lorganizasyon. Sa larepons mon'n seye pour ou premye kestyon.

Ou dezyenm kestyon Onorab i enn ki en pe difisil. Mon krwar mon'n en dimoun ki'n toulstan annan respe, respe pour dimoun, respe pour lopinyon. Wi, mon'n travay avek diferan Minis, mon'n travay avek diferan Prezidan. Mon'n kapab *attend* diferan *summit* avek diferan Prezidan. E mon *believe* dan ou karyer si ou en dimoun ki pa en politisyen *per se*, you will learn a lot from politician.

So mon'n tant pour mwan apresye, oubyen aprann, akoz *everybody has something to bring on the table* ki kapab ed ou pour devlopman personnel. E mon *learn* a lot *throughout* tou sa bann Minis, Prezidan e mon apresye. E *to some extent* zot

in fer mwan vin sa dimoun ki mon ete ozordi. Mersi.

MR SPEAKER

Mersi Mr Racombo. Onorab Porice.

MR SPEAKER

Mersi Mr Racombo. Onorab Porice.

HON DOYACE PORICE

Mersi Mr Speaker. Bonn apre midi Mr Speaker, Mr Racombo e tou bann Manm Lasanble. Mon annan 2 kestyon.

Eski ou santi ou pou kapab desarz sa novo responsabilite, si ou arive vin sa Lanbasader pou Sesel e pou Seselwa? Kwa ki ou pou anmennen an plis ki sa travay ki ou pe fer aktyelman? Mersi.

MR SPEAKER

Mersi Onorab. Mr Racombo.

MR KENNETH RACOMBO

Onorab mersi pou ou kestyon. Mon santi mon ase konfidan. Mon en dimoun ki kontan *challenge*, e *obviously* mon pare pou mon deservi. E pou mwan tou kou i en loner. Mon en dimoun ki patriyotik, i en loner pou servi mon pei. Plizyer fwa mon'n ale, mon'n asiz deryer paviyon Sesel. Mon pa konnen si ou kapab *relate* ek mwan, me selman i en santiman ki vreman diferan ler ou deryer sa paviyon, ou pe

asize, ou pe reprezant ou pei, ou pe defann ou pep. Sa i premye.

Mon krwar pou dezyenm kestyon mon en pti pe... Mon *strong points is* dan *resource mobilization*, e ki ede lo devlopman Sesel. E mon krwar apre *the recent challenges* ki nou'n gannyen, *COVID-19, there's a need* pou nou en pti pe ranforsi *resource mobilization* pou anmenn en pe resours pou pei. So, sa i premye.

Epi mon lekspertiz dan *Blue Economy*; - parey ou konnen *Blue Economy* konmela i *very topical on the international scene*. So, pou mwan i en *added advantage* pou mwan kapab - konmsi diskit sa bann size e *again* mobiliz resours ki pou ariv dan devlopman ek proteksyon nou lanmer. Mersi bokou.

MR SPEAKER

Mersi Mr Racombo. Onorab Pillay?

HON SEBASTIEN PILLAY

Mersi Mr Chairman. Premyerman les mwan swet byenveni Mr Racombo dan Lasanble Nasyonal. E byensir felisit ou pou ou nominasyon koman en Anbasader. Mon krwar i en gran *achievement*, lefe osi ki nou'n lekol ansanm. E pou mwan sa, probableman pou bann dimoun ki'n lekol ek

ou, ki'n konn ou, sa osi i reprezent en bon sours lazwa pou tou sa bann dimoun ki'n konn ou, e ou bann manm fanmir, dimoun ki avek ou.

Mon kestyon Mr Racombo I - Onorab Georges in anmenn non Mr Finley Racombo, ki mwan, mon konn li personnelman tre byen, e ki in akonpli en kantite keksoz.

Apart son lakonplisman koman enn bann pli bon zwer foutbol, enn parmi bann pli bon zwer foutbol Sesel, i ti osi *manager* lekip Nasyonal ki ti pran meday lor dan Zwe Dezil. E in annan en karyer ase long dan servis piblik. E i en gran *shadow*, petet ki ou bezwen sey toulstan sirpase e mon asire bokou dimoun in mansyonn sa ek ou.

Ki mannyer koman en profesyonnel ki pe aspire pou devlope, ki mannyer ou menm ou, ou sey *strike* ou *own semen*? Ou *own* - pa *legacy* - me ou prop listwar? E eski sa i *drive* ou pou ou akonpli ankor plis? Premyerman.

Dezyenmman ou'n mansyonnen dan ou lentrodiksyon, ki ou osi okip ou 2 *siblings*. Mon krwar sa i en keksoz tre nob e mon felisit ou pou sa. Koman en dimoun ki'n pas atraver diferan parkour dan Departman Zafer Etranzer, ou'n fer diferan louvraz, mon asire pou bann dimoun ki'n dan sa

departman, sa i en sours ki be si zot osi zot travay zot kapab ariv sa nivo.

Ki ou pozisyon ou lo la diplomasi? Eski la diplomasi i kapab ganny fer par... Mon bezwen vey byen ler mon demann ou sa kestyon, mon pa priy ou dan en pyez. Eski la diplomasi i demande parfwa ki ou annan serten konesans ki ou'n pas atraver serten fonksyon?

Oubyen eski sa bann fonksyon ki ou'n pas ladan i ed ou pou ozordi, ki ou pe vin en Anbasader, pou ou kapab deservi ou travay pou ki ou annan pou fer? Parey Onorab Gill in dir, apard lezot, pou al sey re negosye sa Lakor Lapes. Mersi Mr Chairman.

MR SPEAKER

Mersi Onorab. Mr Racombo.

MR KENNETH RACOMBO

Onorab, mersi bokou. Epi mersi pou konplimant, oubyen *make* referans lo bann parkour ki mon papa in fer pou pei. Wi, i en dimoun ki'n... I parmi bann dimoun ki'n enspir mwan pou ariv kot mon'n arive dan diferan karyer, akoz parey ou konnen, *you look up to ou paran*. Me selman, dan lavi sakenn i fer son semen. Li in zwe foutbol, mon mon'n zwe *volleyball*, li i dan lagrikiltir, mwan mon dan la diplomasi.

So, petet si mon laprouvasyon i ganny *endorse*, mon ava fer Sesel fyer. Kekfwa in *1 or 2 years'* mon ava anmenn en keksoz ki mon ava kit deryer koman en *legacy*. Wi, annefe mon get mon 2 pti ser, zot totalman anba mon responsabilite. Me selman sa i en keksoz ki mon fer avek loner, mon kontan, *zot keep me grounded*, vi ki, parey ou konnen mon napa en fanmir.

Onorab mon krwar nou tou dan nou *daily* lavi nou fer la diplomasi *to some extent*. E petet ler ou pe koz lo pozisyon formel *as* en Anbasader, kekfwa i depan ki nou pozisyon stratezik, oubyen ki i pe reflekte dan nou *foreign policy* ki ou pou *assign* en *particular* dimoun dan en *particular* ziridiksyon. Mon krwar i lo *dynamics* nou *foreign policy* avek nou *partner* a leksteryer, ki nou oule an sa moman pou kapab *identify* lekel ki ou plase dan diferan ziridiksyon. Mersi.

MR SPEAKER

Mersi Mr Racombo. Nou a termin lenthervansyon pou Mr Racombo la. E mon remersye li pou son bann repons, e mon espere in ase kler pou bann Manm. Nou a swet ou orewwar e bonn kontinyasyon dan nenport semen ki ou tonm ladan. Mersi.

MR KENNETH RACOMBO

Mersi bokou Mr Chair.

MR SPEAKER

Nou a pran en pti poz *sanitizing*, antretan ki madanm reporter i apel Mr Georges Tirant.

(technical break)

MR SPEAKER

Bonn apre midi e byenveni dan Lasanble Mr Georges Tirant, anba en novo...Dan en novo rol, ki nou'n war ou dernyen fwa. Ou isi pou en entervansyon avek bann Manm pou konsiderasyon ou propozisyon, pou apwentman koman Anbasader. Nou pou demann ou pou fer en pti lentrodiksyon bref, personnelman lo ou e apre nou a pas lo kestyion bann Manm. Mr Tirant.

MR GEORGES TIRANT

Mersi e bonn apre midi Mr Chair, tou bann Manm Onorab, *Leader Zafer Gouvernman*, *Leader Lopozisyon*, e tou bann dimoun ki pe ekout nou dan lakour.

Wi, dan en lot pozisyon, byensir. I parey en *interview* kot presyon i la, wi. Mon pa pou al nonm mon non, tou dimoun i konnen. Mon'n marye e mwan ek mon

madanm nou'n ganny nou 4 garson. Mon ti ne le 23 Avril 1977. Mon en zabitant St Louis. Mon'n pas en pe parti mon lanfans St Louis, me a en tre zenn laz mon ti al reste ek mon granmanman, Madanm Ah-Yune Glacis, kot mon'n grandi ziska ki mon'n al etidye.

Mon'n lekol mon parkour Primer e Segonder Lekol Beau Vallon. Apre lannen letid Cap Ternay, mon ti al fini *mon O Level's* ek *A Level's* lekol *Humanities and Science*, e *A Level's* dan *Economics, History and Geography*. Pou separ en dezir profon, a laz 20an mon ti kit pei pou al *La Reunion* kot mon ti al fer 3an seminar.

E apre mon ti al kontiny mon letid *Bayonne*, e kot mon ti fini avek en *Canonical Bachelor Degree in Theology* avek en *Major* dan *Philosophy*. Mon'n pas 3an koman pret, parey tou dimoun i konnen kot la Katedral.

An 2008, mon ti deside pou revwar mon desizyon, e pli gran desizyon ki mon ti fer ki mon pa regrete, se pou fer fas ek realite e travay pou Sesel. Mon ti komans travay kot Labank Santral koman en zofisyen pou superviz bann konpannyen lasirans. Apre 1an mon ti ganny promosyon pou vin Direkter dan sa menm seksyon.

An 2011 mon ti ganny ofer en plas koman Direkter kot *FTC*, pou met an plas bann mekanizm pou protez bann konsonmater. E an 2013 mon ti ganny en promosyon pou vin Sef Egzekitif sa menm lenstitisyen. Apre 4an edmi koman *CEO*, mon ti ganny demande pou pran plas Sef Egzekitif kot *Public Enterprise Monitoring Commission*, pos ki mon pe desarze ziska prezan.

Pandan sa bann letan dan *public service*, mon'n agrandi mon konesans e serten letid dan Lalwa Biznes. Mon'n ganny sans fer *networking*, travay ek bann lorganizasyon parey *World Bank*, *IMF* e *UCTAD* e *COMESA*.

Kot mon'n ale, e kot mon ete, mon kontan fer diferans, mon kontan keksoz i bouze. Anmenn sanzman pou delivre pli efektivman, menm si de fwa i anmenn konstrent bidzeter. Mon ganny dekrir koman en dimoun ki senp, en *people person*.

Mr Chair, apre bokou refleksyon, set avek bokou imilite ki mon vin devan sa Lasanble ozordi, pou sa lodisyon koman en kandida pou sa pos. Mon ti a kontan remersye an premye Bondye, pou lavi e bann don. Mon sezi sa lokazyon pou remersye Minis pou Zafer Etranzer e Prezidan Larepiblik pou zot

konfyans par rekomande e nominen. Mon osi oule remersye mon manman, mon madanm e pou zot sipor.

Me mon pa pou kapab fini san dir ki mon lapriyer i tourn ver lesyel, pou dir mersi osi mon granmanman e mon defen papa pou tou bann dibyen. E osi pou demann mon pti lanz, mon garson ki mon ti perdi en pe lannen pase avek kanser, pou kontinyen regard lo nou fanmir. Mon a dir zot mersi. Mon met mwan a dispozisyon pou zot, pou reponn zot bann kestyon. Mersi ankor enn fwa.

MR SPEAKER

Mersi Mr Tirant. Bon, i annan plizyer Manm ki'n lev lanmen ansanm. Alor mon a pran loportinite pou pas en pe bann Manm ki'n deza lev lanmen. Onorab Romain premye.

HON GEORGES ROMAIN

Mersi Mr Chair. Bonn apre midi Mr Tirant. Mr Tirant, ou en dimoun ki nou'n deza rankontre plizyer fwa atraver FPAC, e mon konnen ou en dimoun ki vreman serye. E par kont sa louvraz Anbasader i en louvraz mon konnen osi, en louvraz ki *tough*. Alors mon kestyon pou ou, an vi ki i pou en konpletman diferan louvraz, ki si i arive ou ganny nominen, e nou konnen osi ler ou vin en Anbasader, byensir

ou bezwen promot ou pei osi koman en destinasyon pou touris. Mon krwar konmela bann Anbasader pe fer sa louvraz.

E mon konnen la diplomasi osi pou novo pou ou, mon krwar ou pou kapab fer li. Be alors, mon kestyon lo kote *tourism*, eski ou santi ou annan sa abilite osi pou kapab promot nou pei lo sa nivo pou nou atrakte plis viziter, baze lo sa pei ki ou pou al reprezent Sesel? Mersi Mr Chair.

MR SPEAKER

Mersi Onorab. Mr Tirant.

MR GEORGES TIRANT

Mersi Onorab. Letan mon regard plan stratezi ki osi Polisi Zafer Etranzer, ki byensir disponib lo *website* sa departman, ki byensir mon novo. Mon vvar poudir ki en Anbasader i vin en *focal point* pou tou lezot domenn, par egzanp pou kiltir, pou *tourism*, pou lenvestisman. E nou konn byen pou dir nou pei, nou vreman bezwen *tourism*.

E enn mon lobzektif, se ki mannyer nou travay avek bann diferan *jurisdiction* kot mon kapab ganny plase, pou nou ogmant nou sif touris. Me selman an menm tan, ou bezwen osi mon mazinen pou travay ek departman touris Sesel. Mwan, mon en dimoun ki kontan *tourism*, selman ki

mon santi, nou mank sa kote *culture tourism*, kot bann touris letan i vini i war nou kiltir, e i war nou kiltir kiliner. E osi pou dimoun kapab apresye sa, ki mannyer ou kapab kree sa posibilite ki nou bann santer i kapab vin...

Moutya in ganny deklare koman en leritaz UNESCO. Ki mannyer nou kapab anmenn sa lo lasenn enternasyonal, kot nou kiltir i ganny valoriz en pti pe parey *La Reunion*. Kot ou war poudir *La Reunion*, menm si Franse, son kiltir i ganny valorize dan letan i konsern pou fer ek *tourism*. Mersi.

MR SPEAKER

Mersi Mr Tirant. Onorab Bistoquet.

HON ROSIE BISTOQUET

Mersi Mr Chair. Bonn apre midi Mr Chair, bonn apre midi Mr Tirant e bonn apre midi tou bann Onorab. Mr Tirant, mon'n war letan mon pe get dan ou *CV*, mon'n war ou'n *graduate* dan *Business Law*, me selman ou'n komans en karyer dan *theology*, e ki mannyer ou vwar sa 2 pou may ek kanmarad, pou kapab ed ou dan sa ki ou pe al antreprann si ou ganny aprouve?

Apre dezyenmman, mon war sa bout kot ou fer *part time competition COMESA*.

Petet sa mon pa tro konnen kwa ki ou ti fer egzakteman. Me selman, ki mannyer sa pou ed ou dan, par egzanp, si ou bezwen devlop bann stratezi bilateral ou multilateral, ki pou ed Sesel? Mersi. ‘

MR SPEAKER

Mersi Onorab. Mr Tirant.

MR GEORGES TIRANT

Mersi Onorab, mersi Mr Chair. Sa letid an *theology* i enn bann pli vye letid ki egziste dan lemonn. Enn son pli gran laspe ladan i filozofi, kot i ed ou pou revwar ou fason panse. So, letan byensir mon antre dan *public service*, mon'n anvi *venture* dan *business law*, me malerezman avek lanmor mon pti garson ek son maladi mon ti bezwen deside pou pa al pli lwen.

Me, la kot mon'n ete, mon'n toulstan analiz sityasyon, regarde ki mannyer i ete. Kwa ki nou kapab fer pou amelyore? E se pou sa ki letan mon'n *Fair Trading Commission*, letan ki mon'n *PEMC*, mon'n kontinyen toulstan pe fer sa *networking* la kot mon ganny anvoye.

Letan mon al *COMESA* mon rod lasistans, akoz i en lorganizasyon rezyonal kot bokou larzan i sorti *EU*.

Par egzanp, si mon pa tronpe i annan 2 proze ki'n ganny fer *sponsor* par

COMESA anba larzan *EU*. Letan mon'n al *IMF*, mon'n al *World Bank*, *UNCTAD*, nou'n rode fason ki nou kapab benefisyé *from* sa bann lorganizasyon.

So, byensir i pou tout en seri *training* prezan, akoz Lalwa i Lalwa, me selman *as* kot ou pou ganny anvoye, ou pou bezwen konn sa bann *jurisdiction*.

Let's say multinational, multilateral or regional, konn tou bann Lagreman ki annan, tou bann dosye, e fer sir ki i ganny delivre ase efektivman, ki nou bouz tou sa bann keksoz pli devan.

Kote *COMESA*, parey nou konn *Fair Trading Commission*, i annan sa laspe konsonmater ek laspe konpetisyon, mon ti ganny apwente koman en *Commissioner*, kot mon ti ganny sans al *EU* pou *swear*. Kot mon ti ganny...

E mon ti vin en *Commissioner part time* kot detanzaot mon ti ganny *call COMESA* pou mon kapab delivre lo bann *case*, parey bann *case merger* ki pe demann nou laprouvassyón, *let's say, D.R JO* pe *merge* ek en lot lakonpannyen labwason, limonnad, ki fer sir ki napa bann lefe advers lo bann lezot ziridiksyon. Mersi.

MR SPEAKER

Mersi Mr Tirant. Onorab Samynadin.

HON KELLY SAMYNADIN

Mersi Mr Chair. Bonn apre midi Mr Tirant e tou dimoun a lekout. Mr Tirant, apard *tourism* ek kiltir ki ou'n met lanfaz lo la pli boner, dan ki domenn politik etranzer ki ou santi plis lyen i merit ganny etabli, pou ki relasyon bilateral ant Sesel e sa pei pou ki ou pe reprezante, oubyen avek lezot pei an zeneral, i ava kontinyen ganny ranforsi? Mersi.

MR SPEAKER

Mersi. Mr Tirant.

MR GEORGES TIRANT

Mersi Onorab pou ou kestyon ki tre byen. Byensir avan mon pou kapab, letan si mon ganny aprouve, e letan mon ganny poste, mon pou bezwen konnen ki bann priyorite sa departman. Priyorer pei pli enportan. Me selman mon konnen, mon krwar senserman, akoz mon'n fer tou mon parkour servis piblik anba bann lorganizasyon ki tonm anba parasol Minister Finans. So, kote *trade*, mon krwar i enportan.

An fet, an se moman mon pa ti sipoze dan pei, mon ti sipoze *Brussel*, kot nou ti anba en negosyasyon avek *ESA*, ek Linyon Eropeen. Me selman vi

ki, mon ti konnen pou annan sa lodisyon la, mon'n bezwen met sa koman en priyrite e nou kapab fer li *virtually* tou fason. E demen i sipoze annan sa *virtual conference*.

So i enportan pou nou devlop sa bann bout lo *trade*, sa bann Lagreman ki annan. E de fwa ennler petet i annan bann posibilite, ki bann zofisyen pa kapab monte. I pa neseser pran larzan piblik, e kot Lanbasad li i kapab zwe sa rol.

En legzanp, si i dan Lafrik, *let's say* Etyopi, ou annan ou kantmenm *AU*, kot ou kapab zwe sa rol, i annan pa mal finansman ki vini, ki ganny donnen atraver Linyon Afriken. Ki mannyer nou kapab *tap in*, akoz promot e protez lentere Sesel, e benefisyen lo sa kote.

Selman en lot lobzektif osi ki mon krwar i enportan, i sa *Multidimensional Vulnerability Index*, kot nou bezwen pouz sa lazanda, akoz mon ki'n travay ek Minister Finans, ou konnen pou dir nou *GDP per capita* i o, e an 2021 ti pli o dan Lafrik. E sa i afekte nou sans ganny bann *loan* avek bann bon konsesyon, bann bon *rate*. So, byensir pou bann...I depan kot mon ganny poste. E apre *training* definitivman, ki mon kapab pouz lazanda Sesel pli devan. Mersi.

MR SPEAKER

Mersi Mr Tirant. Onorab Henrie.

HON GERVAIS HENRIE

Mersi Mr Chair. Bonn apre midi ankor enn fwa. Mr Tirant, *welcome to the National Assembly. PEMC* i lo en bon parkour kot sa dernyen 2an, ou'n travay avek Lasanble Nasyonal pou revizyon en Lalwa eksitan ki pe vini lannen prosenn, *then boom*, Mr Tirant pe ale.

Ki mannyer ou'n kapab trouv sa kouraz, ou si non, ki sa lanbisyon konmsi, ki'n fer ou regard sa novo loportinite avek plis...Konmsi pou ou al laba e kit *PEMC*? Sa i mon premye kestyon.

Dezyenm kestyon, en keksoz ki toultan mon'n diskit avek bann Diplomat se, la diplomasi i egziste, me selman sa kontak ant pep, parfwa mon pa war.

Resaman mon'n al en fonksyon en Lanbasad, e mon realize letan mon laba, mon'n al dan sa pei plizyer fwa, zanmen mon'n deza zwenn en dimoun sorti dan sa pei pou annan en konversasyon, koman 2 imen, avek.

Prezan mon realize, mon pe demann mon lekor, be *then akfer nou dir nou 2 Pei Zanmi lekel ki zanmi ek kanmarad?*

So, ki mannyer dan sa

letan ou - si ou ganny konfi sa pos, sa responsabilite la, ou kapab fer sa vin larealite? Akoz kestyion ki mon ti pe demann Mr Racombo avan se ki, akfer nou envestir? Akfer nou fer sa zafer la, konmsi ki dimoun i war zot ladan dan sa aktivite? Mersi Mr Chair.

MR SPEAKER

Mersi. Mr Tirant.

MR GEORGES TIRANT

Mersi Mr Chair. Mersi Onorab pou ou kestyion. Pou premye mon krwar poudir ki - premye kestyion. Zanmen kot mon'n ete mon kontan kree mon pti prop *kingdom* kot mon mazinen mon pou reste plizyer lannen, me mon konnen i bezwen annan siksesyon.

Wi nou'n travay nou Lalwa. Lalwa in fini ganny Gazete. E i pa zis mon tousel. Mon toulstan travay ek en tim. Mon toulstan travay e promot mon bann koleg. E tou mon koleg i pou konnen ki tou le bomaten mon pas kot zot, dir zot en bonzour, gete mannyer zot ete, e osi donn zot kredi pou zot louvraz.

Mon'n ... *FTC*, donn zot kredi. Letan mon ganny envite devan *Cabinet*, toulstan mon annan en koleg ki'n travay lo en dosye.

So, donn zot sa loportinite pou montre. Mon *believe* ki dan *PEMC* li menm i

annan 1 petet ki mon'n *earmark*. Me selman malerezman son letid ti pli enportan in kit nou. Li i ti definitivman, mon ti pou rekemann li 100poursan. Me mon pe war en lot *rising star*, ki kapab pran plas si i ganny en bon soutyen.

Me selman ankor enn fwa, i kapab annan bann dimoun ki anmenn sa bagaz *from an deor*. *Let's say from* lofis oditer. *Let's say from* Minister Finans ki...Nou'n travay ek Minister Finans sa bann dernyen letan, pou *ensure* i annan sa relasyon.

Letan nou koz lo *fiscal risk*, nou bezwen travay avek *MFAD*; nou bezwen travay ek *Debt Department*. Zot konnen ki nou pe fer. E la letan nou pou etabli nou sistem *automated*, zot pou kapab annan sa lyen direk.

So mon krwar Prezidan e atraver ek nou *board* ek Minis i kapab trouv en dimoun ki kapab ranplase e apre tou i pa mon propriete personnel, selman byensir mon pou kontinyen donn zot mon gidans kot fodre, si mon ganny aprouve.

Letan mon ti ganny demande - sa propozisyon ti vin devan mwan, apepre 1an pase, mon'n reflesir lo la. Be a lafen mon'n pran en desizyon pou dir *ok*, mon pare pou vin devan Lasamble, akoz *PEMC* i

en bout dan nou pei. Be la nou annan nou, nou pei, lentere nou pei. Si mon kapab...Zot in war sa bann atou, pou kapab reprezant nou pei, pou kapab pous pou keksoz al pli lwen, *why not?*

Kote sa dezyenm kestyon, mon mazinen letan nou bann delegasyon i vin dan sa pei kot mon pou ete, i pou enportan kot atraver sa...*let's say*, sa Minister Zafer Etranze, rode ki mannyer nou kapab fer sa bann lesanz.

Akoz nou pa ganny sans al fer lesanz en lot pei, even lot pei i vin fer lesanz Sesel? Akoz nou pa kapab promot plis bann zimlaz, ki kapab anmenn plis benefis pou sa 2 Nasyon, ki kapab anmenn osi lenvestisman.

E kot mon pou ganny poste si mon ganny aprouve, definitivman i pou annan en travay ki nou pou bezwen fer ek bann Konsil Onorer, ki nou osi nou benefisy. E mon *believe* toulstan dan en *win-win situation* kot sa pei osi i benefisy.

Be selman pou le moman mon pa ankor konnen egzakteman ki pou arive, me selman i pou en keksoz mon pou travay tre fortman lo la, e byensir travay ek Lasanble Nasyonal lo bann diferan size ki annan. Akoz la pou mwan si mon ganny aprouve, pou en *learning curve*. Mon'n

demande ki mon ganny asire pou annan en moman *training* enportan, ki pou ed mwan desarz mon responsabilite pli byen. E sa mon pe *look forward for it*.

MR SPEAKER

Mersi Mr Tirant. Onorab Arissol. Sandy?

HON SANDY ARISSOL

Mersi Mr Chair. Bonn apre midi Mr Tirant. Mr Speaker nou'n vwar 2 Gervais antre. En Gervais Moumou avek en Gervais Racombo. La nou vwar de 77 i rante, nou war Mr Tirant 77, Mr Racombo 77, Onorab Sandy Arissol osi 77. Sa ki enteresan Mr Tirant i annan 4 garson, Mr Arissol osi i annan 4 garson.

Mr Chair, Georges Jude Emmanuel Tirant ti fer kanpanny kont mwan dan en eleksyon St Louis. I ti menm fer kanpanny kont mon Prezidan dan en eleksyon St Louis. Alor, mon ti a kontan demann Mr Tirant, an vi ki i ti fer kanpanny kont mwan, la i war mwan, bezwen vin kot mwan pou aprouv son laplikasyon, pou li vin Anbasader ek mon lekip ki la. E anvi ki i ti fer kanpanny kont mon Prezidan, i war mon Prezidan ki'n nomin li pou li vin Anbasader, olye Gouvernman Onorab Cosgrow ki pe "tyouk, tyouk, tyouk",

selman i ti la pandan sa bann letan, Mr Tirant ti la.

Alor kestyon ki mon ti a kontan demann Mr Georges Tirant an relasyon ek mon komanter ki mon pe fer, se ki mannyer ou santi ou Mr Tirant, zisteman ou'n ganny swazir anba en novo ladministrasyon, pou ou al fer en travay Anbasader pou pei; Ki mannyer ou santi ou anba, koman en zenn Seselwa, anba sa moto, "Sesel pou tou son zanfan?"

Mon dezyenm kestyon ki mon ti a kontan demann ou se, i annan en pe mirmirasyon kot *Foreign Affairs*. Parey ou konnen, taler Mr Moumou in dir ek nou ou bezwen annan personnalite, ou bezwen annan kalite, ou bezwen annan karakter, ou bezwen annan konesans, ou bezwen annan en pake senaryo in dir nou, pou ou ganny sa pozisyon.

Me Georges Tirant - Mr Georges Tirant, in sorti en landrwa, zis in ganny propoze. Prezan i annan tou sa bann zenn ki laba, ki Mr Tirant in pas devan zot, kekfwa ki ti pe aspire, ki ti pe sey zot mye, ki ti pe sey donn tou, zisteman pou zot kapab en zour zot osi, Prezidan nomin zot, pou zot vin en Anbasader.

Me malerezman Mr Tirant, son *jackpot* in monte, parey nou dir. Son *Maz Million*

in arive. E alor la i avek son tiket, zisteman i pe al espere taler letan nou met lanmen dan sak si son *bingo*, oubyen ler i ava antre dan lakour i ava kriy "*Bingo!*", parske li ki pou'n gannyen.

So Mr Tirant, mon dezyenm kestyon, ki mannyer ou santi, oubyen kwa ki ou krwar ou pou fer bokou pli byen pou pei an zeneral, plis ki bann zenn profesyonnel kekfwa ki laba dan *Foreign Affairs* ki ti pe travay, ti pe debourye, zisteman pou zot ganny sa pozisyon parey ou ou'n ganny propoze ozordi, par Prezidan Larepublik, e pe rod laprouvason Lasanble Nasional? Mersi Mr Tirant pou bann larepons.

MR SPEAKER

Mersi. Mr Tirant.

MR GEORGES TIRANT

Mersi Mr Speaker. Mersi Onorab Arissol. Wi, nou 77, nou ti komans en parkour dan menm *cluster before*, apre mon ti al dan *B2* akoz mon sorti Glacis. Mon pa tro asire kan ki mon'n fer kanpanny. Dimoun i konnen poudir ki mon sorti dan en fanmir tre demokratik. Dan parti demokratik, Glacis. Parti kote mon manman St Louis kot mon'n, *at the end of the day* mon'n vin reste. Mon ti antoure sa bann lepok, letan mon ti dan *S4*, ek tou mon

fanmir ti *SPPF*. Kan lepok ti annan gro lager politik.

E mwan mon'n toulstan en *free thinker*, kot i mal mon dir. *Ok*, par egzanp dan mon distrik St Louis, byensir mon koz ek novo Onorab. I annan en ta travay pou nou fer. Mon ti ann kontan ganny sans vin lo teren. Annou pran St louis kot mon reste, basen, nou annan en laplenn ki la, ki nou bezwen a size, bouz li pli devan, pou nou bann zenn kapab zouir, kapab sorti dan sa bann febles.

Atraver Prezidan li, mon koz tre byen avek li. I en frer pou mwan. Byensir kot mon santi keksoz ennler i mal, mon *voice out* e mon en *free thinker*. Me, mon'n toulstan dan *public service*, met politik akote. Mon'n deza menm ganny kriye akoz mon ti'n pran en *staff* san *police clearance*. Mon ti ganny dir met li a laport. Mon ti dir zot non.

Zot ti dir mwan zot pou met mwan a laport. Mon dir, *let's be it. I'm ok to go. So*, mon'n toulstan met mon... Fer sir ki mon travay i ganny fer avek serten letik.

Kote *Foreign Affairs*, mon konsyan mon pa en, mon pa'n zanmen ganny sans travay dan sa departman avan i ti en Minister, akoz mon ti annan lezot priyorite. Mon'n anvi fer kot mon ti anvi...Kot mon ganny plase, fer pli byen. Mon

mazinen pou dir ki i annan bann zenn ki pe ganny vwar koman bann potansyel dan le fitir.

Mon mazinen osi, mon ti demann mon lekor sa kestyon. I posib ki zot in regard mon parkour ki mon'n fer dan *public service*, war ki mon kapab anmenn en pe diferan.

Me parey mon'n dir taler, mon krwar ki poudir letan ou regard bann *foreign policy*, i pa napa zis sa bann lyen politik etranzer, i annan tou sa bann laspe parey *trade, socioeconomic; - i annan bann laspe tourism, culture*.

E possibleman mon mazinen i annan sa laspe ki'n fer mon ganny nominen. E byensir mon ti a kontan Bondye i gid zot tou pou fer en bon desizyon lo sa kote. Mon krwar mon'n delivre, mon'n reponn ou kestyon Onorab. E mersi bokou, e mon fyer nou'n 2 koleg avek Onorab Pillay menm lannen.

MR SPEAKER

Mersi Mr Tirant. Onorab Roucou?

HON MICHEL ROUCOU

Mersi Mr Chair. Bonn apre midi Mr Tirant. Mr Tirant, dan ou parkour, parey ou'n dir lo komansman, ou'n travay dan plizyer landrwa. Menm dan lasirans. Si ou kapab dir nou en pti pe ki ou pli gro

achievement dan bann letan ki ou'n travay dan plizyer departman?

Apre osi mon dezyenm kestyon, ou'n nonm en pti pe lo kote bann Konsil ki ou pou travay en pti pe pli pre avek zot. Nou'n war dan le pase ki bann Konsil in zwenn avek plizyer distrik, kot la zot in anmenn zot sipor pou fer plizyer kontribisyon. E mwan, mon anvi konnen lo langazman, si i arive demen ou ganny apwente, pou vin sa Anbasader, nenport ki pei.

Ki kontribisyon ou pou anmennen pou bann zenn, bann distrik, ki nou ava anmenn en pti pe plis sa devlopman lo kote lazernes? Parey ou'n dir ou'n toulstan annan sa lanvi pou al avek Onorab Naidu ki tonm dan ou distrik, pou progre pou bann lazernes? Mersi.

MR SPEAKER

Mersi Onorab. Mr Tirant?

MR GEORGES TIRANT

Mersi Mr Chair. Mersi Onorab. Bann *achievement* ki mon santi in vreman enportan dan mon parkour dan servis piblik, enn *major* i letan mon ti ganny aprose pou join *Fair Trading* koman en Direkter pou konsonmater, ti annan zis en bout Lalwa.

So sey gete ki mannyer nou met an plas bann diferan

mekanizm. Ti annan en Tribunal la, e ti napa avoka, ki mannyer ou met tou sa bann keksoz an plas, e al lo semen? E mon pa ti ezite koman en Direkter pou al lo semen, pou al preski tou le semenn, pou fer bann lenspeksyon, konmans fer le sansibilizasyon ledikasyon, apre komans pran aksyon.

E dezyenm *achievement* pou mwan i kot mon ete ozordi. Letan mon ti vini, kestyon ki mon ti demann mon lekor, be akoz nou la, kot *PEMC*? So, mon ti pran Lalwa mon ti regard nou manda. E la atraver avek led ek Minister Finans, sey tap laport e la nou ti ganny *IMF* ki ti pare.

E ozordi letan nou pe vwar, nou pa parfe. I annan ankor en ta pou nou avanse. Me nou ganny regarde lo nivo...Avek *IMF* ek *World Bank* koman en model ki kapab ed lezot pei Lafrik. E nou'n ganny plizyer lekip ki'n vini, par egzanp sorti *Zimbabwe*, ki'n sorti *Botswana*, ki'n sorti *Gambia sorry*. Ki'n sorti *Eswatini*, ki'n vin regard nou model, e nou osi nou aprann avek zot. So, sa i en *achievement* enportan mon krwar.

Kote pou bann distrik, mon annan en pti pe latous partikilye pou bann lesanz dan sportif e osi dan kiltirel ek lazernes. Se regarde ki

mannyer atraver bann Konsil Onorer nou kapab ganny plis led. Akoz nou pa kapab ganny petet ... Prepar nou bann zenn, ganny bann *training* pou bann *trainer*. Pou bann dimoun kapab dan bann *sports*, par egzanp.

Sa mon mazinen i enportan pou nou kapab benefisy. E si posib osi ganny lasistans pou bann devlopman dan bann distrik. E mon mazinen sa i enportan, letan ou ganny en Anbasader, pou kapab pouse ki pa zis pei i benefisy, me fodre ou pep osi pe benefisy. Mersi.

MR SPEAKER

Mersi Mr Tirant. Onorab Esparon?

HON REGINA ESPARON

Mersi Mr Speaker. Bonn apre midi Mr Tirant. Mr Tirant en lot zanfan Glacis ki pe ganny demande pou deservi son pei koman Anbasader. Sa apre ki nou ti al aprouv nominasyon Anbasader Madeleine ki ozordi i *New York*, ki osi en zanfan Glacis.

Ki bann *achievement* ki ou'n annan dan ou parkour lavi? E ki bann *positive qualities* ki ou annan ki pou fer ou fer sa diferans, ki ou'n dir ou kontan fer, si ou ganny aprouve koman sa Anbasader? Mersi.

MR SPEAKER

Mersi Onorab. Mr Tirant?

MR GEORGES TIRANT

Mersi Mr Chair. Mersi Onorab. Kote bann *achievement apart* sa ki mon'n mansyonnen, dan atraver kestyon Onorab Roucou, mon krwar lo kote mon lavi personnel, mon'n fer pa mal *achievement*. Byensir mon'n pran en parkour apre be mon'n deside pou mwan re oryant mon lavi.

Mon kapab fyer ozordi mon dir mon'n marye, mon annan - nou'n ganny nou 4 zanfan, ozordi nou annan 3. E nou gard sa valer en pti pe, menm si de fwa i pa fasil dan lavi, pou gard sa valer kretyen, sa bann prensip, fer nou zanfan grandi byen. Sa pou mwan i en *achievement* personnel ki mon krwar i enportan.

E kote profesyonnel osi mon'n devlop sa lanmour pou gouvernans, bonn gouvernans avek tou son bann prensip. Ki ladan ou annan lentegrite, ou annan *fairness*. E parey byensir, *accountability* avek *transparency*. So, pou mwan sa i vreman enportan.

E mon krwar poudir ki par mon bann parkour, mon bann letid, letan nou met imen o sant, nou rekonnet poudir nou la pou en pli gran boner pou lezot, nou bann lezot dimoun. Sirtou bann ki pli

vilnerab, mon krwar sa i vreman enportan e primordyal. Mersi.

MR SPEAKER

Mersi Mr Tirant. *Well*, mon annan 2 *Leaders* ki reste. I reste mwan 10 minit. Alor, mon ava envit zot pou partaz sa letan pou nou kapab fini 4er. Onorab Pillay.

HON SEBASTIEN PILLAY

Mersi Mr Chair. Mon a pran 9 mon a donn li 1. Bonn apre midi Mr Tirant e bonn apre midi tou koleg Onorab ki pe swiv, ki pe demann bann kestyon Mr Tirant. E byensir bonn apre midi ou manman. En ansenyan ki'n devoue bokou son letan, e ki'n dedye bokou letan pou nou. Mon krwar ou fanmir pe ekoute, e tre fyer ozordi kot ou'n arrive, ou bann lakonplisman.

Mr Speaker, premyerman mon bezwen dir Mr Tirant ek mwan nou konn kanmarad depi byen lontan. Zanfan annefe. Mr Tirant in lanfandker, mon'n lanfandker. Mr Tirant in zwe foutbol Glacis, mon'n zwe foutbol Glacis.

(laughter)

HON SEBASTIEN PILLAY

Mr Tirant in lekol Beau Vallon, nou'n lekol Beau Vallon dan menm laklas. Lavi in anmenn

nou tou ver nou parkour, me selman mon krwar ozordi, bokou dimoun ki konn ou, i fyer pou ou. E nou felisit ou pou ou nominasyon koman en Anbasader. I ava depan lo Lasanble pou aprouv ou kandidatir koman en Anbasader.

Mon premye kestyon pou Mr Tirant, mon bezwen reoran en pwen ki'n ganny souleve par Onorab Henrie. Se lefe ki in annan bokou travay ki'n ganny fer par *PEMC* e sirtou resaman ti annan bann travay ki'n ganny fer ek bann konsiltan etranze, pou met an plas serten kad ki *PEMC* i bezwen travay lo la.

Mon ti a kontan ou met lanfaz lo sa kestyon, se ki, ozordi in ariv en staz, *well*, i annan en pratik osi kot bann Anbasader i kontinyen okip serten pos zofisyen piblik. Par egzanp, i annan ki kapab okip en pos *PS*, oubyen *post sa*.

Eski ou dan ou lespri, ou lentansyon se en Anbasader, *from* en - pa zis en kad diplomatik, e osi ou kapab reste koman en dimoun ki kontinyen travay dan en servis piblik. Me petet i ava lo en lot lesel, dan en lot laliny, dan en lot sa, kot ou kontinyen donn ou ekspertiz, akoz en kantite lekspertiz in ganny *shared* avek ou, an se ki konsern zerans e vey lo bann sosyete,

bann antrepriz piblik? Sa i mon premye kestyon.

Mon dezyenm kestyon pou ou Mr Tirant, se eski ou krwar poudir ... Mon bezwen vey byen mannyer mon demann ou sa kestyon, akoz mon bezwen admet ki dan lepase ler in annan bann kandida ki'n ganny prezante koman bann Anbasader - e mon krwar depi from Onorab Georges e tou bann dimoun ki asiz lo lot kote latab laba, sirtou bann ki'n dan 6enm Lasanble, in annan en retisans ekstrem pou pa pran sa bann kandidatir, menm pou en *interview*.

Par egzanp mon rapel Mr Andre Pool, ki sa letan ti annan 29an ekek en karyer. In annan Minis ki'n vini nou pa'n pran. So nou, nou pe montre ozordi ki poudir, nou valoriz ou konpetans e ou travay e ki ou annan sa konpetans pou delivre lo sa nivo.

So, petet mon kestyon pou ou se, ki mannyer en zofisyen piblik i kapab devlope? Ki lankourazman i devret fer devlope dan son karyer pou ki i kapab kontinyen fonksyonnen, san ki i regard okenn kote politik? En keksoz ki ou'n sey fer, san ki regard en kote politik.

E pou li reste lo sa ki enportan dan son louvraz se delivre lo manda ki son

lorganizasyon i annan. Mersi Mr Chairman.

MR SPEAKER

Mersi Onorab. Mr Tirant.

MR GEORGES TIRANT

Mersi Mr Chair. Mersi Onorab. Onorab mon krwar ou ti annan 2 kestyon, non? I riske mon'n mank enn, apre ou a retourne mwan. Wi, be mon ti a kontan dir ou mersi ou'n rekonnexion mon manman, wi i en ansennyan.

E mon ti a osi kontan dir mersi, malgre la kot mon pou ete, tou mon bann ansennyan depi lakres, sa premye mis ki ti donn mon en pti kout lareg, Miss Gerda, anler St Louis, ki in met mwan lo drwat semen, so, ziska ki mon'n fini tou mon letid aletranze. Mon manman osi i en Digwaz. En pe parey Ian. So, i vedir nou annan menm parkour.

So, mon get kote *public servant*, mon krwar poudir in en travay ki pe ganny fer avek *PSB* an se moman, ki nou kree bann profesyonnel dan *public service*. Ki nou kapab annan nou konviksyon politik, me nou konnen poudir *by the virtue*, sirtou nou bann lofis, nou gard serten *non-political affiliation*. E sirtou ki menm si nou annan nou konviksyon, nou bezwen regard nou travayer ki avek nou e bann dimoun ki nou pe servi, san

regard zot kouler, san regard zot afilyasyon politik, san regard zot larelizyon.

E sa pou nou letan zot pe etidye, se ti pli enportan ki ti annan. Ou bezwen letan ou pe zwenn sa dimoun, pa pe ziz li, ou pe ed li. Mon krwar i enportan ki nou devlop sa kiltir. E i pou anmenn bokou valer, e bokou benefis pou nou pep.

Ki lot kestyon, si mon pa'n kapab reponn, ou kapab zis re dir mwan? Mersi.

HON SEBASTIEN PILLAY

Non, mon premye kestyon...

MR SPEAKER

Ekliersi li silvouple, vitman.

HON SEBASTIEN PILLAY

Wi, Mr Chairman, mon krwar mon'n pran 5minit, i reste 4.

MR SPEAKER

Non, i reste 1 Onorab.

HON SEBASTIEN PILLAY

I reste 1 en? Mon a fer li vitman. Wi Mr Chairman, mon premye kestyon sete pou rekonnexion sa parkour ki ou'n fer dan servis piblik. Me petet pou ou kapab dir nou en pti pe ki mannyer ou marye tousala ansanm?

Akoz ou'n annan en fonksyon enportan kot *PEMC* ou. E mon ti a kontan konnen ki mannyer sa relev i ganny

pran, en pe pli kler, en pe pli drwat pou nou konpran konmsi? Mersi.

MR SPEAKER

Thank you. Mr Tirant?

MR GEORGES TIRANT

Mersi Mr Chair. Mersi Onorab. Onorab mon krwar pou dir apre sa deba ozordi, si i ganny aprouve, mon nominasyon i ganny aprouve, i pa pou en keksoz vitman ki pou ganny fer. I pou annan byensir serten diskisyon avek mon Minister ek mon Minis, pou annan serten *handing over*.

Parey mon'n dir pli boner, tou louvraz ki ganny fer kot *PEMC* i annan en tim ki deryer. I annan en *Management Team*. I annan lezot travayer ki ganny *involved*, so i pou annan en kontinyasyon. Akoz nou pa travay en pti pe an izolasyon avek kanmarad.

Minister Finans osi i okouran tou sa bann louvraz ki nou fer, tou nou bann proze ki *ongoing*, so mon pa krwar i pou annan sa vid. E i pou annan serten, byensir en letan pou swazir en dimoun pou ranplase si mon ganny aprouve. And mwan mon donn mon komikman ki byensir mon pou ede, pou kapab annan sa tranzisyon;- pou kapab osi kontinyen motiv

nou bann *staff* pou delivre a la meyer oter ki zot kapab. Mersi.

MR SPEAKER

Mersi Mr Tirant. Onorab Georges?

HON BERNARD GEORGES

Mersi Mr Chair. Mr Tirant, ou war ki mannyer Onorab *Leader Lopozisyon* i en move pti garson. I dir i annan 2 kestyon, i pou demann 1 i pou kit 1 pou mwan apre i demann tou lede. Mr Speaker, mon kestyon pou Mr Tirant i sa enn swivan.

Apre midi dan sa parkour nou'n vwar en premye kandida, ki li i sorti prensipalman dan Zafer Etranzer. En dezyenm ki li i annan en kote ekonomis, e en kote Zafer Etranzer, e la enn trwazyenm ki napa en kote Zafer Etranzer ditou, ki en pir ekonomis. E ou'n annan en karyer ki *span;- lantrepriz, banking, Fair Trading, PEMC, competition commission* eksetera, donk in en karyer ase varye.

Kisia dan *sa history* ki ou annan, atraver ou fanmir ki ou'n dekrir ozordi, e avek ou sik travay, kisia ki fer ou krwar ki ou annan en konpetans pou ou anmennen koman en Anbasader, kot si ou ganny poste aletranz, ou pou pe fer en travay ki annan en konponan ki ziska prezan

ou pa konn naryen ladan? Me i annan en konpetan, i annan en konponan ekonomis ki ou tre konpetan ladan? Mersi Mr Chair.

MR SPEAKER

Mersi Onorab. Mr Tirant?

MR GEORGES TIRANT

Mersi Mr Chair. Mersi Onorab. Mon krwar tou sa bann keksosz ki mon'n koz lo la, dan mon lavi personnel, mon letid, mon parkour dan *public service*, e bann mayon ki'n fer mwan vin sa ki mon'n ete ozordi.

E par lefe ki mon pa sorti dan sa departman, petet osi Prezidan son sazes, in vwar atraver rekomandasyon ki i enportan anmenn en nouveau fason fer.

E letan mon regard bann *foreign policy*, i annan sa kote inovativ, sa kote dinamizm, e mon mazinen ki en Anbasader ou pa negosye ek zis bann pei, zot Minister Zafer Etranzer, me i annan bann lorganizasyon ekonomik, bann lorganizasyon kiltirel, edikasyonnel. I tre probab ki kot mon a ganny swazir – kot zot a swazir pou met mwan, si mon ganny aprouve, poste, i pou annan serten kontribisyon.

E ozordi mon konpran, mon en bon konesans lo kote nou lekonomi, *trade* li menm. Kote nou bezwen pou pouse

pou nou lenvestisman. E sa mon santi pou zwe, i pou en atou. Kote sa kote *foreign agreements*, sa i pou pran letan pou bezwen konnen. *First* ou bezwen konnen ki priyorite pei. Ou bezwen konnen ki pei ou pe ganny poste, ki bann ziridiksyon, ki ou pou bezwen aprann e lir.

E mon pa ti a swete ganny large, ganny mete dan en landrwa toudswit kot ou pe al aprann sir plas. Byensir *you learn on the job*, me mon krwar dan lepase osi in arive kot i annan bann Anbasader ki'n ganny nonmen ki pa sorti dan Minister Zafer Etranzer.

I annan ki sirman in fer bann bon louvraz e byensir mwan, mon en dimoun ki pa kontan *fail*. Mon en dimoun ki pa kontan asize. So, mon pe espere ki letan sa nominasyon, si i ganny aprouve, e mon ganny tou mon *training*, ki mon fer mon mye pou tou bann dosye bouz pli vit, pou war ki mannyer nou kapab promot lentere Sesel. Promot e protez lentere nou pei, sirtou sa sosyoekonomik pou mwan i tre enportan. Mersi.

MR SPEAKER

Mersi Mr Tirant. Bon nou'n ariv a lafen sa sesyon kestyon la. Mon kontan ki nou'n kapab pran tou Manm ki'n lev

lanmen pou demann kestyon dan sa dernyen peryod.

Nou pou remersye Mr Tirant pou son partisipasyon e nou a swet li bonn kontinyasyon. Pou bann Manm, nou ava pran en pti poz e annefe nou kapab re pas dan staz Lasamble la -ler nou antre nou a repran e avek deba lo sa bann kandidatir. Nou ava repran 4er edmi. Mersi.

(BREAK)

MR SPEAKER

Bon, nou ava apel bann Manm pou deba lo Mosyon. Mon ti a kontan ganny Manm ki ti pou oule entervenir silvouple, pou mwan kapab ziz en pe letan. Sa ki pou pran laparol lev lanmen silvouple, an se moman?

Tre byen, mon annan 5 Manm - le 2 *Leaders'* apre mon annan Onorab Zialor, Onorab Henrie e Onorab Lemiel, korek? Non? Onorab Zialor ou...? Ok. 4 alor. Dan sa ka, mon a permet tou Manm 15 minit. E bann *Leaders'* si zot bezwen i kapab, ou kapab gard li anba 15 minit, sa pa pou problem en? So mon krwar sa i a kapab permet nou fini a tan.

Onorab Georges, koman *Leader*, koman prezanter Mosyon, ou ti a kontan adres premye, oubyen ou prefere

adres dernyen? Dernyen, *ok?* Dan sa ka nou a pran lezot e nou a revin lo bann *Leaders'* an dernyen. Les mwan apel dan sa ka, Onorab Lemiel.

HON SYLVANNE LEMIEL

Mersi Mr Speaker. Bonn apre midi tou mon bann koleg Manm Onorab e tou bann dimoun ki pe ekout nou. Mr Speaker, mon lentervansyon li menm lo sa Mosyon pou vreman ase kourt. Mwan personnelman, mon'n konn Mr Moumou, ki nou'n travay ansanm *State House*. Mon konn osi Mr Kenneth Racombo. In en dimoun ki mon'n zwenn dan diferan parkour, e mon'n konn li ase lontan. E tou lede in annan en karyer, mon kapab dir, ki zot in komanse dan la diplomasi avek *Foreign Affairs*.

E an swivan sa de zenn garson, mon kapab dir, dan zot parkour kot *Foreign Affairs*, mon krwar zot in 2 zenn dimoun ki'n vreman delivre. Zot in 2 zenn dimoun ki'n vreman profesyonnel dan sa travay ki zot in fer. E zot in travay avek bann *dignitaries*, zot in travay avek Prezidan pei. E mon santi ki zot in kapab ganny ase bagaz li menm dan la diplomasi.

E an menm tan, si i arive nou aprouv zot ozordi, dan sa karyer pou fer Anbasader dan nenport ki pei ki pou met zot,

mon konnen ki zot pou vreman delivre dan sa travay ki zot pou ganny demande pou fer.

Mr Tirant li menm, mon'n konn li kot *PEMC*. Mon konnen petet in desarz son responsabilite *comme il faut*. E mon panse ki li osi, petet la diplomasi i novo. I en karyer novo ki pe al antre ladan, ki pe al fer. Me mon panse avek bann leksperyans, petet dan bann diferan parkour travay ki'n fer, mon panse ki kekfwia i ava en novo keksoz pou li.

E ki mon panse, ki i ava kapab i osi, atraver bann negosyasyon petet ki'n partisip ladan, bann diferan kour or bann diferan konferans ki in *attend*, bann diferan keksoz ki'n partisip ladan, lo nivo pou anmenn serten keksoz, serten benefis pou Sesel, Mon panse ki li osi i ava kapab desarz byen sa responsabilite koman en Anbasader dan nenport ki pei ki petet pou met li.

Me Mr Speaker, ler mon lo sa size, koman en madam, mon santi ki madam i merit ganny en pe loportinite zot osi. Mon napa naryen kont 3 msye ki'n ganny swazir, me selman mon ti a kontan ki a lavenir i pou annan ankor bann loportinite kekfwia ki Prezidan, Minis, oubyen Gouvernman nou pe dir, ki ti le petet anvoy ankor serten lezot dimoun

koman ranplas bann
Anbasader petet ki pou *retire*;
oubyen annan novo
Anbasader dan bann lezot pei.

Petet mon ti ava fer en pledwari avek Gouvernman, pou petet konsider osi bann madanm ki deza dan la diplomasi. E ki menm ki pa dan la diplomasi, me selman ki la deor, ki annan potansyel, e ki pou kapab vreman byen reprezent Sesel lo en nivo aletranze koman Anbasader pou Sesel.

Akoz mon *believe* dan bann madanm. Mon *believe* ki madanm i bann bon *leaders*, mon *believe* ki madanm i vreman kapab zot osi, dan bann negosyasyon ki kapab ganny fer, de lapar pei. Akoz en Anbasader ler ou regarde i koman pe reprezent sa Prezidan dan sa bann pei li menm, an term kot zot al diskit bann diferan keksoz ki pou konsern Sesel, avek sa bann diferan pei. E vwar kote ki nou Sesel nou kapab benefisyé atraver zot negosyasyon ki zot pou al fer.

So alors, mon ti a demann Gouvernman pou *next time*, annou swazir de trwa madanm. La ozordi nou'n vwar 3 msye. *Next time* petet nou a war en 3, 4 madanm la devan, ki ava kapab vini, nou a *interview* zot, e ki zot osi zot ava pe ede pou zot kapab fer paviyon Sesel flote.

E bann madanm osi ki zot osi zot sans a monte. Ki zot osi zot a kapab fer vwar ki zot kapab fer pou Sesel.

Mr Speaker i reste mwan pou swet bonn sans Mr Kenneth Racombo, Mr Georges Tirant, e Mr Gervais Moumou, bonn sans dan sa novo karyer ki zot pe al pran. E mon espere ki zot pou fer byen dan sa travay e mon *wish* zot *all the best*.

E ki paviyon Sesel i ava toulstan pe reste flote kot zot, zot pou ale, kot zot, zot pou pase. Annou fer Sesel fyér! Mersi.

MR SPEAKER

Mersi Onorab. Mon apel Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker, normalman nou vwar i annan, dan mon leksperyans sa ki mon'n vwar atraver Lasamble Nasional, 2 fason, ouswa 2 kategori dimoun ki souvandfwa vin devan nou, e ganny propoze koman bann Diplomat pou vin Anbasader ou *High Commissioner*. Depandan kot zot pe ale.

So, souvandfwa in bann dimoun ki zot in annan en karyer dan la diplomasi, ouswa i annan en group ki zis bann dimoun ki sorti dan

politik. So mon'n toulstan war sa *pattern* dan Sesel.

E ozordi, mon kapab dir avek konfidans ki i pa kestyon 3 dimoun ki'n annan en koneksyon politik avek parti ki o pouvwar. Mon krwar zot bann zenn Seselwa avek abilite pou deservi nou pei dan pli o pozisyon ki nou kapab fer zot konfyans. E ki pou zot non monte, bann dimoun ki'n reflesir lo sa seleksyon, in vwar en kalite dan zot ki zot kapab fer konfyans sa bann dimoun.

E anfet parmi sa bann dimoun ki'n vin la, se zis Georges Tirant ki, mon kapab dir, mon konn li lontan, depi letan i ti pe etidye *La Reunion* '98 a 2001 mon ti al en vakans *La Reunion* '99. Mon ti annan en zanmi ki ti dan menm letid avek li, e nou'n ganny sans zwenn e depi sa nou'n byen.

Premye fwa mon tann Gervais Moumou koze mwan. So, mon pa konn zot. Solman, konmsi premye fwa mon tann son lavwa, premye fwa mon war sa kalite enteraksyon. Mon'n deza tann li sante en fwa. Be solman letan mon'n ekoute, bann kestyon ki nou'n demann zot, larepons zot in donn nou, zot in enterakte avek nou dan en fason *calm*, ki'n montre lasazes, ki'n montre konesans, ki mwan koman en frer Seselwa pou zot, mon annan konfyans

poudir, zot pou kapab fer sa travay avek sipor e soutyen *maximum* si zot gannyen. Zot pou kapab fer.

E alor mon pa pou koz lo zot merit akoz mon pa telman konn zot, solman sa ki mon'n vwar la, baze lo zot CV sa ki mon'n lir, mon *trust* zot konpetans. Mon ti ava dir ek zot poudir profit sa lokazyon pou fer byen pou zot lekor, pou zot fanmir, pou kominate kot zot sorti, me pli enportan, pou Sesel avek Seselwa.

Akoz zot pe ganny en loportinite eksitan e ki pou anmenn zot personnelman e nou pei bokou rekompans si zot travay byen.

Mon rekonnet pou dir zot bann dimoun ase zenn. 2 ladan i annan 45an, enn 40an. E mon apresye vwar poudir ki sa bann zenn pe ganny loportinite pou zot avans devan e reprezent nou pei. Mon ti ava osi demann zot pou ... Mr Tirant in koz lo posibilité pou zot ganny *training* avan ki zot ganny poste. Sezi tou loportinite, parske i depandan kot zot pe al ganny mete. Zot pou bezwen vin bann dimoun ki efektiv dan zot travay. Zot pou bezwen bann dimoun ki bann *tough negotiator*, akoz depandan kote ki ou pe ale, ki relasyon nou pei, avek sa bann dimoun pou nou kapab negosye bann keksoz. Ki swa lesanz prizonnyen, ki swa

Lakor Lapes, ki swa Lendeks Vilnerabilite, ki tousala in bann term ki nou'n koze la apre midi.

Me mon'n rekonforte par zot bann keksoz ki zot in dir, zot bann pwen for. Par egzanp, Mr Racombo mon rapel dan bann zafer *asset* (ki sa lekspresyon in servi?) - pou mobiliz resours, vwala. Pou mobiliz resours, Mr Moumou in koz lo son lanmour pou tou bann form lar. Mr Tirant in koz lo kestyon pou pei kapab servi la kiltir koman en *asset tourism* pou nou ganny plis. So mon apresye avek tousala.

E mon'n sey demann bann kestyon ki pou mwan kapab analize *whether* zot kapab pran presyon, *whether* zot kapab *deal* avek *stress*. Partikilyerman kestyon ki mon ti'n demann Mr Moumou, kareman, ki son febles. I pa ti en kestyon mon ti pe sey *antagonise* li, akoz i annan en Manm ki'n sot lo la, ki'n dir, mon pa pou demann ou, ou febles.

Me sa i ti en fason pou mon konn tenasite son karakter. Ler in vin la devan nou, akoz nou ti pe koz tro lo sa bann *good quality*, me ki mannyer in reponn sa in pran en keksoz ki swadizan son febles, in turn li *into a positive*, kot in dir nou i en *workaholic*.

E malgre i en febles, me selman nou war savedir i en

zenn ki pou donn tou pou tou letan nou donn li en louvraz, nou konnen poudir i pou delivre.

Alor pou terminen Mr Speaker, sa ki mon ti ava demann zot - e sa mon'n dir avek bann lezot dimoun ki'n vin isi, dan letan nou'n dan 6em Lasanble pou pran bann pozisyon Anbasader, la diplomasi, mwan mon ti a kontan vwar li i egziste, i vin vivan dan kominote ki mon, mon reprezante.

Nou'n war en demars dabor avek bann *Honorary Consul* ki nou pe sey fer en travay avek zot, pou zot adopte bann distrik. I annan distrik ki sa pe al pli byen ki lot. Nou'n komans sa *diaspora desk*, Mosyon ki mon ti anmennen, pou siport demars ki *Foreign Affairs* pe fer.

Me mon anvi vwar sa lesanz ant nou koman en pei avek plizyer lezot pei. E se zot sa bann Anbasader, bann *Honorary Consul* ki reprezant nou atraver lemonn, ki kapab fer arive. Parske si nou koman *tax payers Sesselwa*, nou peye pou annan en Lanbasad dan en pei;- en dimoun i ganny poste, i ganny en saler, i bezwen anmenn en keksoz ki pli direk pou nou.

Larepons Mr Racombo ti byen, akoz in eksplike pou dir nou reprezantasyon laba i anmennen en keksoz;- i

anmennen en keksoz. Me selman mon anvi war en keksoz pli direk.

Kekfwa akoz lepok ki mon'n grandi. E bokou nou la i ava rapel ti annan en kantite lesanz ant Sesel avek bann pei ant lannen 80. Tou le-z-an ti annan en tim foutbol Reyonnen ki ti vin isi, Lenn, bann madanm ti vin zwe *netball* avek Sesel. Ti annan bann bato ki ti vini, zot zwe *hockey, badminton*.

E dimoun i desann. Dimoun Mont Buxton i reste pre ek laval. *At least* ou war poudir relasyon dimoun ek dimoun nou kapab *build* en relasyon, me ki sa relasyon i pa zis lo nivo Gouvernman, politisyen ouswa bann *public servant*.

So, savedir sa bann lesanz i kapab vin dan en levantay aktivite, depi *sports*, kiltir, biznes, komers, nou kapab nonm en long lalis. So sa ki mon ti a kontan pou ed zot fer, se travay pou fer sa arive e sirtou akoz zot bann zenn dimoun, devlop sa lanbisyon pou fer sa arive.

E mon pa pou kapab rat lokazyon Mr Speaker, pou mwan dir ki, sa ki mon'n vwar la apre midi - sa 3 endividé ki'n vini - e parey mon'n dir, mon pa'n telman konn zot, mon fyer akoz nou'n kanpanny lo en slogan, "Sesel pou tou son

zanfan", e mon vwar sa mon pe vin vivan.

Akoz bann dimoun ki zot pa'n konmsi pe ganny rekonpanse pou en keksoz ki zot in ... en faver ki zot in fer nou, me Sesel pe rekonnet talan, pe rekonnet bann endividé avek leksperyans, kalifikasyon. E savedir i donn mwan lespwar poudir tou Seselwa ki travay dir i annan en rekonpans pou zot dan sa pei.

E se sa alor ki nou lo sa kote latab nou pe pouse pou Seselwa vin pli prodiktiv, vin responsab, avans devan, pran ou vre plas dan sosyete. E parey Mr Moumou in koz lo son lekor poudir i en dimoun ki annan lanbisyon, i *focused*, se sa, sa novo klima ki nou le kree. E ozordi i en legzanp kler sa kalite devlopman an term kapasite bann Seselwa ki nou pe sey met devan.

Alor, mon swet zot tou de bon dan zot responsabilite ki zot pou al pran. E mon priye ki zot fer Sesel e Seselwa fyer dan responsabilite ki nou pe donn zot. Mersi Mr Speaker.

MR SPEAKER

Mersi Onorab. Mon apel Onorab Pillay.

HON SEBASTIEN PILLAY

Bonn apre midi, bonswar Mersi Mr Speaker, e bonswar tou koleg Onorab, e bonswar

tou dimoun ki pe ekout nou, e bonswar byensir fanmir nou 3 dimoun ki pe ganny nominen Anbasader devan Lasanble Nasyonal ozordi.

Ou konnen Mr Speaker, koman Manm Lasanble, nou annan nou en privilez ekstraordiner nou. En privilez ekstraordiner kot an sa ki konsern Minis, an sa ki konsern bann Anbasader, bann apwentman ki ganny fer dan Gouvernman, nou ganny sa loportinite koman Manm Lasanble pou nou - pa *vet* - me pran en desizyon lo karyer lezot dimoun. I *unique* sa. *Very unique privilege* ki nou, nou gannyen.

E ozordi mon pe ganny sa loportinite, sa privilez ozordi, mwan personnelman, pou pran desizyon lo karyer 3 dimoun ki mon konn zot personnelman. E ki mon krwar zot in disteng zot lekor dan zot landrwa kot zot in fonksyonnen, kot zot in servi nou pei.

Me selman Mr Speaker, mon krwar ... Annou servi sa ki pe pase ozordi dan Lasanble koman en lesion pou bann Lasanble le fitir. Annou pa repet sa ki 6enm Lasanble in fer. Ler mon dir sa Mr Speaker, i relevan akoz, pandan 6enm Lasanble, nou'n annan plizyer dimoun ki'n prezant devan nou avek kapasite e abilite, pou bann

pozisyon dan Gouvernman. En zis lo en...baz...politik, nou'n deside blok lapwentman sa bann dimoun!

I annan ki menm in vini in asize dan *meeting room* laba, pe espere pou ganny *called in*, kot Lopozisyon ki ti an mazorite sa letan, *LDS*, ti deside pou sa dimoun pa vin devan! Ni ganny menm sans pou eksplike, akoz i *deserve* pou li ganny sa loportinite.

Mon krwar se sa, akoz mon fer lentervansyon ki la baze lo lentervansyon ki mon'n tande avan, ki'n pas a sa fwa pou mwan la. Ler nou pe koz sa slogan, "Sesel pou tou son zanfan", premye keksoz ki vin dan nou lespri, e nou donn lezot dimoun en sans pou vwar dan nou *psyche*, premye keksoz ki vin dan nou lespri se en konsiderasyon politik! Fodre sa dimoun in deservi nou dan en fason politik. Nou regard sa dimoun i annan en kol tasyon politik.

Mon rapel, ler nou ti pe propoz Mr Andre Pool, pa ti vin menm devan Lasanble; nou ti propoz Ms. Luciana Lagrenade pou Minis, pa ti arriv devan Lasanble. Me nou koman en Lopozisyon, nou pou fer keksoz diferaman. E mon'n toulstan krwar ki pou dir dan sa bann konteks ki la, ou bezwen regard sa ki sa dimoun i prezant devan ou e eski i pou

kapab deservi sa fonksyon ki ou pe al donn li?

Personnelman mon krwar tou le 3 dimoun pou kapab deservi sa fonksyon ki nou pe al donn zot. Sa i mon lopinyon. E personnelman mon krwar pou dir zot pou a la oter legzizans sa bann travay ki zot pe gannyen devan zot.

E se sa ki nou bezwen fokaliz nou lekor lo ki mannyer nou pran bann lapwentman pou bann dimoun. E mon sagren e konsernen ler mon tann dir nou pe donn 3 dimoun loportinite ki pa'n neseserman fer naryen pou sa Gouvernman ki la. Sa i pa mon parol sa, i parol entervenan ki'n fek koze avan mwan.

Parey mon'n dir mon pa ti pou al dan sa laliny, me ler mon'n ekout sa i enportan ki mon sonn en *warning*, en *alarm bell*. Fodre nou arete sa kalite konversasyon dan sa pei.

Mon tann serten zot pe riye, konmsi en keksoz ki byen, nou fer, me fodre nou arete. Si nou aspire pou nou vin pli meyer ki sa ki ti la, e pou fer pli byen ki sa ki ti la, nou pa kapab repet sa ki'n ganny fer dan lepase.

Mon krwar i enportan ki nou realiz en keksoz fondamantal. E mon ler mon'n ekout Mr Moumou koze, mon lespri i al kot i ti grandi. E i annan en fwa dan en

diskisyon avek en dimoun, kot i ti dir ek mwan koumsa, le sel dimoun ki kapab *define* ou zetwal se ou lekor. Pe enport kot ou sorti e kot ou ti konmanse - le sel dimoun ki annan kontrol lo kote ou le arive se ou lekor.

E si ou annan en bon latitud, ou latitud pou anmenn ou tre lwen. Parfwa ou latitud i pli enportan ki ou *aptitude* ki ou annan.

E mon krwar i kler dan ler nou pe get sa bann apwentman ki devan nou ozordi, akoz i montre poudir nou pe donn loportinite 3 frer Seselwa pou fer en louvraz. Me mon osi zwenn Onorab Lemiel kan i dir, nou bezwen osi promote e ankouraz bann madanm osi pou antre e kree sa bann lespas pou loportinite, pou sa bann madanm kapab ganny sans avans devan.

E mon siport son pledwari ki'n fer pou ki sa i kapab arive. Mon osi regard serten komanter ki nou'n fer e ki mannyer nou konekte travay ki en Anbasader pou fer avek nou distrik. Me ler nou get par egzanp bann proze lekol ki'n ganny fer dan bann distrik; bann proze lakaz ki'n ganny fer dan bann distrik, sa in vin atraver en kontak diplomatik ki ganny souvandfwa facilite par bann Anbasader, ki nou donn zot sa

responsabilite pou fer sa travay.

Se dan sa konteks ki nou bezwen konpran travay en Gouvernman. Bann brans Gouvernman pa fonksyonn an izolasyon, zot fonksyonn koman en konpliman avek kanmarad pou arive ariv a en rezulta.

E ler nou regard sa 3 dimoun ki'n prezant devan nou ozordi, sakenn antre zot pou bezwen realiz sa - si oule - sa konsep ki zot fonksyonn koman en parti entegral, pou anmenn sa ki pli byen pou Lepep Seselwa. E primordial ki sa i ganny fer.

Me i osi enportan Mr Speaker, ki nou met lo rikord, ki malgre ki Lasanble Nasyonal i *endow* ou avek sa responsabilite, malgre ki Lasanble Nasyonal i donn ou sa loportinite pou deservi ou pei a en tre o nivo, dan en pozisyon vreman prestizye, fodre pa ki ou perdi sans kote...ou...sorti! Fodre pa ki nou pozisyon i mont dan nou latet e nou blye kote nou'n arive. Fodre pa ki nou fer sa.

E mon kontan pou vwar ki atraver son parkour kot in travay avek Lekonomi Ble, kot in *involve* dan en kantite dosye, ki'n *involve Economy* Ble, ki lemonn ozordi pe pran sa size *climate change* avek plis lanfaz, e ki mannyer ou kapab konekte le de avek

resours. Lefe ki Sesel i en pei ki annan bokou resours maritim, mon vwar ki Mr Racombo i annan en loportinite la pou li al devlop en lot - antre dan en lot landrwa kot i deza annan en serten baz, me osi pou li kapab ranforsi sa ki nou pe fer.

Mon vwar lo en baz lesanz ant bann pei ozordi, ki nou'n deza annan bann relasyon ki, Mr Moumou lefe ki en dimoun ki *fluent* dan diferan langaz, i pou kapab ed nou osi pou li kapab reasir langazman ki nou annan koman en pei avek nou bann partener, lo en pwennvi bilateral oubyen miltilateral. E sa i neseser pou nou pei.

E mon note ki Mr Tirant avek son parkour atraver *PEMC*, bann lesanz ki'n gannyen atraver *PEMC*, konpetans ki'n devlope atraver *PEMC*, i pou en pwen fokal ki kapab servi an relasyon ek rol ki nou annan bann diferan antrepriz lokal, antrepriz piblik, ki bezwen komans regard en fonksyonnman avek en lentegrasyon pli larz ki zot kapab annan lo nivo larezyon, e menm si oule lo en nivo pli internasyonal ankor.

So i annan merit ozordi dan sa diskisyon ki nou pe fer. E dan sa merit nou bezwen osi mazin bann lezot profesyonnel dan Zafer Etranzer. Mazin Mr Jacques Belle, en zennonm ki

mwan osi mon'n vwar li grandi. Mon mazin Mr Agrippine.

So, i annan - mon war i annan lespas dan sa Departman *Foreign Affairs*, pou kree ankor loportinite pou en lot zenerasyon ki pou kapab deservi pei, zisteman parey Minis Radegonde i fer, Anbasader Claude Morel in fer, pou pran larelev si oule. Pou sa ki pe arive ozordi. E se dan sa laliny osi ki mon vwar sa renouvelman ki nou pe vwar avek lapwentman sa 3 nouveau dimoun devan zot.

Alors Mr Speaker, i toulstan en plezir ler ou vwar en Seselwa, en zenn Seselwa ki'n devlope, ki'n debourye, ki'n gard respe, ki'n gard bann valer ki fer nou bann pli bon valer ki nou annan koman Seselwa ariv pli devan. E ki mannyer sa i anmenn en sours lafyerte pou zot fanmir e fer mwan mazin bokou sa bann profesyonnel ki nou annan ki travay dan Minister Finans, ki'n grandi atraversistem ki'n la dan le pase. Ki'n permet bokou zenn devlope, e ki mon krwar sa i en testaman sikse.

Ki koman en parti - sa parti ki mon reprezante, malgre tou son febles, malgre tou sa keksoz ki ou kapab dir lo li, in anmenn en kontribisyon signifikan pou devlopman sa pei. E dayer

mon swiv Onorab Deputy Speaker, ler i dir bann lannen '80 lakantite lesanz ki ti annan, i montre ou poudir byensir nou'n fer en kantite keksoz ki byen dan sa pei.

Alors Mr Speaker, ler nou koz lo sa ki byen, sa ki pou byen pou Lasanble fer ozordi se donn en afirmasyon pozitiv pou 3 Seselwa ki'n montre zot konpetans, zot devouman, e pou zot ganny loportinite pou al deservi nou pei lo en pli gran lesel. Mersi Mr Speaker.

MR SPEAKER

Mersi Onorab. Mon pas laparol Onorab Bernard Georges.

HON BERNARD GEORGES

Mersi Mr Speaker. Mersi pou donn mwan laparol apre midi a lokazyon vot lo lapwentman 3 nouveau Anbasader pou nou pei. Mr Speaker, parey ou konnen, semenn pase mon ti *La Zambie* pe asiste en seri meeting ki lakour COMESA ti'n organize.

E annefe mon ti pou sipoze rantre dan pei o plito ozordi 5er, me avek konsiltasyon avek Biro Clerk e sa 2 *Chief Whip*, mon'n ganny dir ki ti ava preferab ki nou pas sa vot lo sa bann Lanbasader ozordi. E donk mon'n retourne en pe pli boner

pou permet mwan anmenn sa 3 Mosyon apre midi.

Mon dir sa Mr Speaker pa pou ponp mon lekor, pa pou montre ki mon en dimoun enportan, me pou dir ki mannyer mon pa regret ditou ki mon'n koup sa vizit kourt pou mwan isi apre midi, akoz sa set en apre midi ki devret e ki fer nou fyer koman Manm Lasanble, koman Seselwa e ki devret fer nou fyer koman en nasyon ann antye.

Mr Speaker, annou komans par regard nou responsabilite koman en Lasanble Nasyonal anba Lartik 64, akoz se anba sa lartik ki nou ganny demande pou nou aprouv en propozisyon ki Prezidan i annan pou li nonm en Anbasader.

I pa kapab zis nonmen, me i bezwen ganny nou permisyon koman en Lasanble Nasyonal - nou laprobasyon, nou vot konfyans pou sa Lanbasader. E sa i tre, tre enportan. E annan de fwa, nou pa konsyan lenportans nou travay.

Prezidan osi for ki i for, osi o ki i o, i pa kapab san nou, apwent dimoun pou reprezent Sesel a leksteryer. Tel parey, i pa kapab siny en Trete san ki sa i vin par sa Lasanble pou nou ratifye son desizyon. E sa i byen, akoz i donn en loportinite pou Lasanble

Nasyonal regard tre pre, regard tre pre lekel bann dimoun ki li i pou al reprezent nou pei deor;- oubyen regard tre pre lekel sa bann Trete enternasyonal ki nou pei pe sinyen lo nou non. Akoz Mr Speaker?

Akoz en Anbasader pa azir pou en Gouvernman, me i azir pou en Nasyon e en pep ann antye. E sa reprezantan Lepep, sel reprezantan Lepep dan pei, nou bezwen asize, egzaminen, e donn ou permisyon. E sa set en responsabilite tre, tre gran.

E set en responsabilite ki mon kontan pou dir ozordi i napa en mo kontrer. Tou sa ki i ganny dir, tou sa kestyon ki'n ganny demande, sak lopinyon ki'n ganny partaze, malgre ki annan de fwa ti bann lopinyon en pe strik, i pa'n bann parol kontrer, e o kontrer in bann parol lankourazman.

E nou kapab dir donk, ler sa 3 novo Anbasader i ganny nou laprobasyon apre midi la, e mon konnen ki zot pou nou laprobasyon apre midi, nou ava kapab dir ki nou'n travay parey nou ti fodre anba Lartik 64 Konstitisyon, e mannyer e dan la fason ki demann nou travay.

E dan sa konteks Mr Speaker, mon ti a kontan remersye ou, ki apre midi ou'n deside, akoz i annan 3 Anbasader, nou pou pran

Mosyon separeman, nou pou vot separeman, me nou pou debat tou le 3 ansam.

Akoz, se pa 3 endividé ki'n pas devan nou la ozordi, me set en konteks ki'n pas devan nou la ozordi. E ler nou regarde - parey mon'n fer sorti taler dan enn mon bann kestyon - nou vwar sa sazes ki'n ganny donneen avek direksyon pei pou swazir sa 3 dimoun a sa moman dan nou listwar.

E sa 3 dimoun pou fer en lansanm, akoz malgre ki zot pou travay dan en Minister ziska ler zot ganny poste e apre dan diferan landrwa ler zot in ganny poste, zot pou travay pou en sel pei, pou en sel pep, e zot tou zot pou zanfan Sesel.

Mr Speaker nou tou isi, nou konnen *background* sa 3 dimoun, e nou konn li tre kler. Personn pa bezwen *remind* nou. E nou annan loportinite ki 6enm Lasanble, in devlope pou nou antre, pou nou angaz avek bann Anbasader aspiran, pou konn en pe plis zot *background*.

E apre midi nou'n aprann en pe plis ki nou ti deza konnen. E parol in ganny dir e in ganny dir pli byen ki mwan. Sa ki nou pe al fer la ozordi nou pe demontre ki nou kapab koman en Lasanble, nou kapab koman en pep, met tou keksoz akote e regard en

dimoun pou sa ki i ete, e non pa pou kote i sorti, e ki i ti fer dan lepase.

E se sa - e se sa Mr Speaker ki apre midi la, i en lesson pou nou tou, akoz nou kapab regard en dimoun dan son fen fon e nou kapab dir sakenn parmi nou, e nou tou ansanm, nou pa pe vot pou en dimoun akoz nou byen avek li, oubyen nou kontan kote in grandi, oubyen ki parti i ti siporte, me nou pe vot e nou pe aprouv en dimoun akoz son konpetans.

E dan sa 3 dimoun la ozordi mon krwar zot tou le 3 zot in fer prev zot konpetans endividyle; - enn koman en dimoun ki'n travay bokou dan domenn *protocol* avek zafer protokoler; - enn ki'n travay e dan domenn ekonomik, e trwazyenm ki'n plizoumwen en ekonomis.

E nou vwar donk sa levantay devan nou la ozordi atraver sa 3 dimoun, ki mannyer dan zot diferan landrwa, e dan zot diferan fason, avek zot diferan formasyon, zot pou kapab tis sa latwal ki nou apel Sesel e fer en fason ki nou pei ava vin pli for, pli rezilyan e i ava grandi bokou plis ankor.

E se sa mon krwar mesaz ki sa 3 zenn zonm ki'n vin devan nou Lasanble la ozordi, in anmennen. Sesel Mr Speaker, pou tou son zanfan,

e la apre midi nou pe fer en laprev ki nou pa zis koz sa parol, nou pa zis kriy sa parol dan *rally*, me nou viv sa parol koman en pep.

Permet mwan malgre tousala Mr Speaker, en *note diskord*. Akoz, wi, i annan serten keksoz ki ti ann kapab pli byen fer, e si nou pa kritik nou lekor, oubyen kritik desizyon ki'n ganny pran, ou ki pe ganny pran, nou pa pou zanmen grandi koman en pep.

E wi, mon, mon ti ann kontan parey Onorab Lemiel, e nou tou isi ki mon'n koz avek, sirtou dan nou *Caucus*, nou ti ann kontan vvar plis reprezentasyon madanm.

Annefe Mr Speaker, bomaten ler mon'n ekrir mon *Registrar* lakour COMESA, pou dir li ki mon pa pou kapab *join* zot *virtually* apre midi dan zot *meeting* administrativ, mon'n anvoy li en kopi *Order Paper* pou montre li egzakteman akoz.

Son premye reaksyon sete, be oli madanm? Oli madanm? Zot pe fer parey Lafrik zot pe fer menm zafer, zot pe zis anmenn bann msye. E sa napa ... i pa en kritik kont sa 3 kandida ki'n devan nou la ozordi. I pa en kritik, me i en keksoz ki nou bezwen dir, e ki nou espere ki bann ki pou pran desizyon, i ava mazin sa dan le fitir e nou ava annan

bann lenstans ki pli *gender balanced* dan nou pei.

En dezyenm *note diskord* Mr Speaker, e vreman mon pa kontan fer li, me mon bezwen fer li, akoz set en *note diskord* ki'n ganny sonnen apre midi, e ki pa ti annan son plas. E sa sete poudir ki in annan lenstans ler dimoun in vin devan sa Lasanble, ki nou pa'n aprouve pou bann rezon politik.

I vre, i vre. Me, annou pa blyie Mr Speaker, ki se pa zis dimoun ki'n vin isi ki pa'n ganny aprouve pou rezon politik ki mal, me in annan osi Anbasader ki'n vin isi e ki'n ganny aprouve pou rezon politik e sa i osi mal!

E i annan 2 ki nou konnen ki sel rezon zot in vin Anbasader, se akoz zot ti'n travay dan 5enm Lasanble e zot ti'n defann sa Gouvernman sa lepok dan 5enm Lasanble.

Ou war, i pa gou, en zour koumsa pou nou retourne an aryer. E se sa nou problem isi. Se konmsi nou annan en bol ki'n anmare avek nou e pe *drag* nou deryer ler nou, nou e al devan. E annou silvouple met sa bann zafer deryer. in fini, in pase, pa ti byen, nou'n aprann nou lesson, annou bouz devan!

E se sa ki fer mon kontan, ki ozordi nou annan en loportinite pou nou kapab dir, "Sesel i vreman pou tou

son zanfan”, akoz ozordi nou annan 3 zanfan Sesel, ki nou pa pe gete kote zot in sorti, nou pe get zot lo merit, e nou pou al aprouv zot taler!

En trwazyenm *note* diskord Mr Speaker. An mezir ki nou pe felisit sa 3 zenn ki pe al pran en karyer, annou osi mazinen, eski in annan sifizaman travay ki'n ganny fer pou ranplas zot? Sa kestyon in ganny demande plizyer fwa avek zot apre midi.

E nou war fodre pa nou blyie, fodre pa nou blyie ki ler en dimoun pe bouz devan, fodre dan son plas i annan enn ki pe antre, pou ki li demen, i kapab li osi, aspire pou li bouz devan. E dan sa konteks - e dan sa konteks, nou bezwen zet en regar lo bann travayer, bann zenn Diplomat, bann Trwazyenm Sekreter, bann Dezyenm Sekreter ki pe travay dan Minister Zafer Etranzer, ki zot, zot ankor pe espere, e zot war dimoun ki pe pas devan zot;- ki pe sorti *Blue Economy*, ki pe sorti *PEMC* e ki pe sorti protokol sa enn fason.

Alor nou bezwen toultan, malgre ki nou annan konfyans avek nou Gouvernman. E nou konnen ki dan en moman kot resours i meg e kot kapasite pa toultan egziste parey nou ti a kontan, nou bezwen sonn en sonn *alarm* an di-z-an silvouple, pa zis regard sa

bann ki pe ale, me regard osi sa bann ki pe reste.

E ankouraz zot pou ki zot osi demen zot a kapab vin isi devan sa Lasanble pou zot ganny en loportinite pou defann zot lekor e pou zot osi bouz devan. Akoz se koumsa ki en pei i renouvele son lekor.

Mr Speaker, ler mon regard okenn apwentman ki nou fer - e sirtou apwentman Anbasader - toultan mon annan 3 kestyon, akoz mon vin isi avek en lespri ouver. Mwan mon pa kapab vot kont sa 3 apwentman, zot tou zot kapab.

Mwan mon pa kapab, akoz mon ki'n anmenn Mosyon, mon pa kapab zet mon prop Mosyon. Me malgre sa, toultan mon demann mon lekor 3 kestyon. E la apre midi mon'n demann sa 3 kestyon.

Premyerman, eski nou pei pou dan bon lanmen si nou apwent sa dimoun?

Dezyenmman, eski si mon ti dan problem dan en pei deor, eski mon ti pou annan konfyans avek enn ant sa bann dimoun pou sofgard mwan?

E trwazyenmman, eski sa dimoun pou kapab antre dan negosyasyon avek Linyon Eropeen, avek Linyon Afriken, avek SADC, avek COMESA, avek Prezidan Biden, e kapab sorti la avek en keksoz pou Sesel sa ki in perdi en lekay?

E mon fyer pou dir Mr Speaker, ki tou le 3 sa kandida apre midi in reponn mon kestyon dan en fason pozitiv e zot in reponn, wi.

E se pou sa rezon ki ozordi, malgre ki i pa ti mon lentansyon, mon kapab dir lo en nivo konpletman obzektif, se 3 dimoun ki merit ganny nou laprouvasyon apre midi.

E donk Mr Speaker, nou pe al pran donn - si nou kapab dir li koumsa - en *license drive* 3 zenn dimoun ozordi, ki osito ki zot in ganny apwente, annou pa blyie, zot pou vin Anbasader pou lavi. Ler zot pou mor, zot pou *still* apel Anbasader;- Anbasader Moumou, Anbasader Racombo, Anbasader Tirant. E sa set en *enorm loner!* Sirtou ler ou ankor en zenn aspiran dan en pei.

Mr Speaker e mon ti a kontan, mon dernyen parol, koz avek sa 3 zenn zonm ozordi, poudir zot mersi ki zot in vin devan nou Lasanble e ki zot in apros nou e reponn tou nou kestyon avek fransiz. Ki zot pa'n kasyet naryen; ki zot in fer zot mye pou tal devan nou sa ki zot, zot vwar koman zot lakonplisman dan lepase e zot laspirasyon pou demen.

E mon sir Mr Speaker, ki avek sa 3 zenn, Mr Moumou, Mr Racombo e Mr Tirant, byento Anbasader Moumou, Anbasader Racombo e

Anbasader Tirant, nou pei pou dan bon lanmen.

Alor, avek sa detrwa parol Mr Speaker, mon ti a kontan remersye tou bann Manm apre midi ki'n koz an faver sa Mosyon. Mon remersye zot pou sipor ki zot in anmennen pou sa desizyon ki Prezidan Larepublik in fer, pou *single out* sa 3 dimoun, pou pouz zot dan en karyer demen. E mon swet zot tou le 3 tou sa ki pli bon dan zot novo karyer. Mon remersye ou Mr Speaker.

MR SPEAKER

Mersi Onorab. Bon prezan nou kapab pas lo vot. Nou a repas lo sa bann Mosyon enn par enn. E zis pou rapel nou, nou pou sitye nou kot nou pe vote, mon a demann Onorab *Leader* Biznes Gouvernman pou zis re nonm son Mosyon e Manm i a kapab vot lo la. Onorab premye.

HON BERNARD GEORGES

Mersi Mr Speaker. Mr Speaker, mon premye Mosyon i demann sa Lasanble, annakor avek Lartik 63 ek 64 nou Konstitisyon, pou aprouv propozisyon Prezidan Larepublik pou nonm Mr Gervais Michel Moumou koman Anbasader. Mersi.

MR SPEAKER

Manm ki an faver lev lanmen silvouple? Mersi. Tou Manm in vote. Bon lo Mosyon annakor avek Article 63(1) and 64(1) of the Constitution, National Assembly approves the proposed appointment by the President of the Republic of Gervais Michel Moumou as Ambassador. 29 Manm in vot pour, 0 kont e 0 abstansyon. Mosyon in aprouve. Onorab Georges, next?

HON BERNARD GEORGES

Mersi Mr Speaker. Mr Speaker dezyenm Mosyon, se ki annakor avek Lartik 63(1) ek 64(1) nou Konstitisyon, Lasanble Nasyonal i aprouv lapwentman propoze par Prezidan Larepublik *de* Mr Kenneth Jacques Gervais Racombo koman Anbasader. Mersi.

MR SPEAKER

Mersi. Manm ki an faver, lev lanmen silvouple? *Thank you.* Tou Manm in vote. Lo Mosyon pou aprouv lapwentman Mr Kenneth Jacques Gervais Racombo koman Anbasader, 29 Manm in vot pour, 0 kont e 0 abstansyon. Mosyon in aprouve. Onorab *Leader* Biznes Gouvernman, 3enm Mosyon?

HON BERNARD GEORGES

Mersi Mr Speaker, 3em e dernyen Mosyon annakor avek

Lartik 63 e 64 nou Konstitisyon, Lasanble i aprouv lapwentman Mr Georges Jude Emmanuel Tirant par Prezidan Larepublik dan post Anbasader. Mersi.

MR SPEAKER

Mersi. Manm ki an faver, lev lanmen silvouple? Mersi. Lo Mosyon pou aprouv apwentman par Prezidan Larepublik of Mr Georges Jude Emmanuel Tirant koman Anbasader, 29 Manm in vot pour, 0 kont, 0 abstansyon. Mosyon in aprouve.

Mon krwar i reste mon pou zis eksprim felisitasyon e fotespere mon ankor kapab koz pou tou Lasanble, pou sa 3 kandida ki'n ganny aprouve koman Anbasader. E pou eksprim santiman ki'n ganny eksprimen plizyer fwa ki zot a la pou deservi Sesel e Seselwa avek lafyerte, avek lakonplisman. Mersi.

(APPLAUSE)

MR SPEAKER

Mersi nou'n arriv a la fen nou travay ozordi. Madam Clerk pa'n *remind* mwan pou biznes demen. Me selman mon a zis anons zot. Demen nou pou pran en Lalwa ki konsern manda TRNUC e osi en Mosyon finansyel pou depans Gouvernman. Onorab Pillay mon pe termin la. Mersi. Nou

ava terminen silvouple. Nou a
adjourn ziska demen *matin*
9er.

(ADJOURNMENT)